

## JESUCRISTO JIYARAMIQUISHANO PUEYA MIISHANO

*“Pueyaso Sohuanu niaacua jiyarosaanutaniya”*

<sup>1</sup> Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijosano coteequiaari mijiriani. Puetunu na miishanojuanaa naajio-taquiaarinijia, mariyata na niishitiojosano na coteenu-jiniji, jaara tacanishaaquiaariuhua jiyocuaaanu na Queta na quiniuhua. <sup>2</sup> Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. <sup>3</sup> Jesu cusonu nuhuaji, nojuajaari muetaquiaariuhua na saquirojosano pueyacua. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminio quiya. Nojoritia pocoojoquiaariiri taa Pueyaso jitianutaniya na muerasuni.

<sup>4</sup> Nojoritia na pocoojosacari tamonu juuca, Jesuuri nojori numootequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijiaara cua Que cuaara niquitioorajaara na Sohuanu nijaniya. Nojuajaari cua sequequiaari na niquitionutaniya nijaniyana, taa cua caminiujuquiaari tari niaaracuajani. <sup>5</sup> Naa sequequiaari nijaniyacujani: “Tiuquinijiona Juanri nia tiuquinijioquiaari moojinia, Pueyaso tojijiaara nia jatasacari. Pueyasoori saniniuujia na Sohuanu nioojiajinia tiuquinijionutaniya, seetanujuanaa Pueyaso tojijiaara nia quiniuria”. Quera niaacua tiuquiniutianiyacuajaari. Naaratej, nia sashiri.

*Jesu tacasacariuhua jiyocuacaanu*

<sup>6</sup> Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijara jiyatesaanutaniya quiarijia Israel pueyara, maninia pa quiniuhuara tama pa jiyaniijatajaaja, taa pa supuetanaa quiquiaaricuaani?

<sup>7</sup> Jesuuri nojori riucuaaree:

—Nio cutaraari maja nia niishishocoriquiano, taacari Israel pueya jiyaniijara cua jiyatesaanutaniyani. Pa Que Pueyasoori cuno niishishano racataa tama nera-jaaja. Saa nojuajaari na niishiya cutara. <sup>8</sup> Naajaa, niaari Pueyaso cumaaca masenutaniyacuaja, Pueyaso Sohuanu jaara nioojajinia tiuquiri. Niaari janiyajiniji pohuatanutaniya pueya niquiara Jerusalén tiacajinia, puetunu Judea jiyajiniajanaanio, Samaria jiyajiniajuhuaj. Naa pohu-ataasaanutaniyajaariuhua puetunu jiyacajiniajanaa, socua tucuacaanu jiya puequeetujinianio.

<sup>9</sup> Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquiniuucujaji nojuaja. <sup>10</sup> Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jiyanoehua cohuajaque quiriquiaa. Nojoriiri jiyocuacaanujinio Pueyaso seya quiquiaari. <sup>11</sup> Nojoriiri Jesu pueya sequeree:

—Galilea jiyajinijinio pueyanaa, ¿casaara nia mautaa jiyocuacaanuni? Taa nia niquirii tacaanocuajani, niaari naa na niquiniutianiya tacatehuanohuajuahuaj.

<sup>12</sup> Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajiniohua tacatequiaari. Cuniquiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuacaanu

nojori rucuanenura samaatenu juuca. <sup>13</sup> Nojori tiuquijiosacari Jerusalén tiacajinia, nojoriiri nojori quijia tiajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujani. Quiquiaarijiaariuhua Simón, cante tari quiquiaari Romano pueya jatanu panijiacujani. Mariyata quiriquiaari Judas, Santiago tarajanu. <sup>14</sup> Nojoriiri jiyacari pueyaracaanu Pueyaso seconuuriquiaa tii maajipohuata, mariyata Jesu nucua Mariata, Jesu tapueyocucatanio.

*Pueya saquirijosacari Matías Judas niti*

<sup>15</sup> Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuj ciento veinte pueyari tii quiriquiaa puetunujuanaa. Naa nojori sequereeri:

<sup>16</sup> —Cua tapueyocucanaa, Pueyaso Sohuanu sequesanoori maja na naata naajaa fajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacujitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niqitiosaacanu cumaneeca, naa nojori na niishitiniucua Jesu quiasaanura. <sup>17</sup> Nojuacuajaari parta Jesu saquirijosano pueyano quiquiaarijuhuaj. Nojuajaari mariyata Jesu jiyaramiquishano quiriquiaa juhua pajaniyajuhuaj. <sup>18</sup> Tamonu cuhuariquiaari masesaacanu sesa na miishano samitia. Na nuhuaji, tama cusoyareearijia. Jiyocuaaanuji tiquianu na nacaraari. Na sara-caari cocuaretasee. <sup>19</sup> Jerusalén tiacajinia quiniaa jaara na niishiquianu, nojoriiri cuno cuhuariquia sesojoree “Acéldama”. Acéldamaari pueyano rupaajinia sequeya

“Nanaca samitia masesano cuhuariquia”. <sup>20</sup> Judasjinijiiri naa naajiotasaaquiaarijuhua tariucuacaanu supuetana David jaaquequejojuajinia. Naa sequeyari:

“Na quiquio cuaara quiiria shaaco. Cuaara quiiria sanaaca, camaruuju”.

Sequeyajaariuhuj:

“Tamonu pueyano cuaara jiyatesaaria na poonijosano miiriquiano na niti”.

<sup>21</sup> 'Cuarta Jesu saquiriojosano pueyanaa, niya quiy-acuaja pueya, canapuetucujaja pa tarajaquiaarini pueyara-caanu pa Jiyaniijia Jesu quishacari pata. <sup>22</sup> Nojoriiri Juan niquiquiaarijuhuaj Jesu tiuquiniyano moojinia, Jesu tacasacariuhua jiyocuaaanunio. Canapuetucujaja puetunu nio niquiquiaarijianaani, niquiriyatu nojorijini-jinio cuaara jiyatesaaria Jesu jiyaramiquishanora, pata na quiniuria, Jesu samiitianujiniji na pohuatanurajuhuj.

<sup>23</sup> Naaratej, pueyari caapiqui pueya saquiriojoquiaari. Cuniqi quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhuj, Matías. <sup>24</sup> Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijia-ajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quini-uria, Judas niti poonijioriquiano. <sup>25</sup> Judasri quia niqui-tiosano poonijosanojiniji catecanu sesa na miiniuucua, naquiya miishaqui na quianura, sesa miijia na quiniuucua.

<sup>26</sup> Na nuhuaji, pueyari naajosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matíasri Jesu saquiriojosano pueyanora quiquiaarijuhuaj. Naacuajitij Jesu saquiriojosano pueyari juhua juhuanoraja quiquiaariuhua doce.

## 2

*Pueyaso Sohuanu tiuquishacari*

<sup>1</sup> Pentecostés juuca jaara quiquiaari, puetunu Jesu-ucua tiuuniaajanaari rerejono quiquiaari tamonu tiajinia Jerusalén tiacajinia. <sup>2</sup> ¡Canashiyaquiji, paratuuri tojishaaquiaari jiyocuacaanuji, juhua paratu pocuaano jiyanohua cojuata! Jiyanohua tojishaareeri cuno tiajinia tee Jesu pueya cajitiuriquiaacuajani. <sup>3</sup> Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. <sup>4</sup> Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

<sup>5</sup> Cuno quishacari, queraatia Judiocuaca puetunu jiyacajinijiniojuanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojiti-ajaca quiquiaari. <sup>6</sup> Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyanohua cushitiirii. Naatej, puetunu rucoonaajanaari tama na jiyajinijinio rupaacajaaja tojitiariquiaa, cuno pojori pocoosacari. Nojoriiri maja na niishiniu quiquiaari casaara naa nojori miiriini. <sup>7</sup> Nojoriiri jiyanohua jiuuji-atecoree. Tama sequetooreejaarijia:

—¡Juhuej! ¿Cuno pojoriti maja Galilea jiyajinijinio pueyacuaja naa pocoyaniquitij? <sup>8</sup> ¿Taa nojori pocuaa puetunu coteenu pa rupaacajanaani? Pajaniyacuajaari queraatia tamaatia jiyacajinijinioni, puetunu tamaatia rupaaca pocuajacajanaa.

<sup>9</sup> Seetanujuanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio,

Capadocia jiyajinijinio, Ponto jiyajinijinio, Asia jiyajinijinionio. <sup>10</sup> Quiquiaarijiaariuhuj Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucujaji quiquiaari. Roma tiacajinijinio pueyari tii quiquiaarijuhuaj, canapuate Jerusalén tiacajinia pacunaa quiquiaaricujani. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatuuquia co miatejosaaquiaari Judiocuacara na quiniuria, Pueyaso tojjijacara nojori quiniu panishacari. <sup>11</sup> Creta jiyajinijinio pueyari tii quiriquiaajuhuj, Arabia jiyajinijinionio. Puetunu cuno jiyacajiniajanaari tamaatia rupaaca pocuajaca quiquiaari. Nojoriiri socua naa sequetooquiaari:

—¿Taateni? ¡Puetunu pajaniyajanaari cuno Galilea pueya tojitiaani Pueyaso cutara miishano pohuataano, tama pa coteenu rupajiniajaaja!

<sup>12</sup> Puetunu nojorijianaari jiuujiteriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casaa na miitiuyajaaranojoni?

<sup>13</sup> Tamasaca nojorijinijinioori saaja Jesu pueya macaatirii. Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuhuata.

*Pedro pohuatasano pueya niquiara*

<sup>14</sup> Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya nijaniyani. Puetunu Jerusalén tiacajinia quiniaajanaa cuara niishiiria cua pohuatasano.

<sup>15</sup> Niaari canaa jiyaniya mashaasequenuyano. Pananucujaari shusha taqueejiya. Maja canaa mashaasequenuunu. <sup>16</sup> Niaari canaa tojitiaa tamaatia rupaaca pocuaano. Niocujaari tariucuacaanu Pueyaso sequesano caminiujunia Joel pahuatasano. Cuno niaa na niquiyani, cunocujaari na sequesano, shusha tohuateyani. Nojuajaari na sequequiaaritij:

<sup>17</sup> “Pueyasoori naa sequeyaquij: ‘Quera jiya puequesacari, janiyari cua Sohuanu niquitionutaniya puetunu pueyarajanaani. Naacuajitij, mashiquioriiri janiyajiniji pahuatanutaniya, niyacoojorinio. Cua Sohuanuuri cua niishishano niquitiniutianiya mashiquiori juhua na maquenujinia. Cua niishishano niishitiojonutaniya saaquiapue na maquenujiniajaariuhuj. <sup>18</sup> Cuno quishacari, janiyacua cua Sohuanu niquitiore puetunu cua tojitianaajanaani, canuu, maajipohuanio. Nojoriiri janiyajiniji pahuatanutaniya pueya niquiara. <sup>19</sup> Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniyajuhuj, pueya na numootenura. Nanacaari niquishaanutaniya, mani, jiyanhua najacanio. <sup>20</sup> Pananuuri ninishiquiria quiniutianiya. Racaari juhua nanacara quiniutianiyajuhuj. Naa coteenutaniyari jiya puequenura. Na nuhuaji, Jiyaniijajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhuj. Jiyanhua shanhua quiniutianiyari na rosesacari. <sup>21</sup> Puetunu Jiyaniijia secojonaa pueyajanaari jiyanooshaanutaniya Pueyaso pueya nojori quiniuria’”.

'Supuetana Joelri naa naajiotaquiaari Pueyaso sequesano tarijiatej. <sup>22</sup> Naaratej, socua cua tojitiare cuarta Israel pueyanaa. Jesujiniji nia pohuatanutaniyanijia, Nazaret tiacajinijinio pueyano. Pueyasocuaajaari pa ni-ishitiquiaari, Jesuuri na jiyarosano pueyano quiquiaari. Naacujitij, Pueyasoori na poonitijioquiaari pa niqiuara jiyanohua jiyajeneta casaa na miiniuria. Paacuaajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajanicyacuaajaari maninia niishiya puetunu maninia na miishanojuanaa. <sup>23</sup> Saniniuujia, Jesu jaara niq-uitiosaarucuaa niajaniya, niaari na quiarucuaa juhua sesa miiijia. Na nuhuaji, niaari Pueyaso tojiyashijiaca pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu. <sup>24</sup> Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. <sup>25</sup> Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niqiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. <sup>26</sup> Naaratej, coojiaari timirii. Cua niti taquiriocuateree cua shuquiriniutianijia. <sup>27</sup> Naajuhuaaj, cua cusosacari, cua que-teeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miiijaja cua quishacari quia niqiuara. <sup>28</sup> Quiaari cua niishitiojoree maninia cua



miiniuria, pueyaracaanu quijiara cua quiniuria. Quiaari jiyanoehua cua shuquiritiniutianiya quiata cua quishacari pueyaracaanu”.

<sup>29</sup>’Cua pueyanaa, paacuajaari niishiyani, pa supuetanaa jiyaniijia Davidri jamosaaquiaari na cusosacari. Na jamaari niya quiyajaa Jerusalén tiacajinia. <sup>30</sup> Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutaniya quiajanijajiniji, jiyanoehua quia nuhuaji. Cuno pueyanoori Jiyaniijiaara cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

’Pueyanaa, paacuajaari niishiyani Davidri Pueyaso sequesano caminiujiunia quiquiaari. <sup>31</sup> Naacuajitij, Davidri Cristojiniji pohuatariquiaa jiyanoehua tariucuacaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. <sup>32</sup> Pueyasoori nio Jesu samiitianiriohuacuaa. Na samiitianu nuhuaji, puetunu canaajanaari na niqiquianuni. Janiyari nia pohuataa seetanu canaa niquishanojuanaani. <sup>33</sup> Cutara na cumaacata, Pueyasoori na tacaniriohua na miaquetajara cajiriquiano, Jiyaniijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarjia canaa na niq-uitioree. Naaratej, niaari canaa niquirii tamaatia rupaaca pocuaano. <sup>34</sup> Majaari David tacanu quiquiaari jiyocuaaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: <sup>35</sup> ‘Cua miaquetajara quia cajishiijiaara, janiya cuara

quia paraa shocotarejaatijia' ”.

<sup>36</sup> Cunora, puetunu niajanijajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijiaara. Majaari canaa pohuatasanojiniji nia taacanuunu pueyanaa.

<sup>37</sup> Pueya tojishacari naa Pedro pohuatasanotej, nojori-iri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

<sup>38</sup> Pedroori nojori riucuaquiaari:

—Nioojia nia tacatore sesa nia miiniujiniji. Niajaniya cuara moojinia tiuquinijiosaaria Jesucristoocua nia tiushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niqutiore na Sohuanu. <sup>39</sup> Pueyaso sequesacari nojuaja na Sohuanu niqutionutaniya pueya, cunoori niaaranocuaaja, nia niqiohwaranonio, tucuacaanu quijiacarajuhuj. Pueyaso Sohuanucuaajaari puetunu pueyajanaa niqutiosaanutaniya, cana pa Jiyaniijia Pueyaso sequeya na muerasura na quiniuriacuajani.

<sup>40</sup> Pedroori jiyacari pueya pohuataree queraatia socua Jesujiniji na niishishano. Jiyanohua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejooonu mani quiquojinia.

<sup>41</sup> Pedro pohuatasanoocua tiuuniaari tiuquinijiosaaquiaari. Cuno juuca, tres mil pueya naasucuaari coteenu Jesu tojitianaa rupuenara quiquiaari. Pueyaso pueyari naa canequiaaritij. <sup>42</sup> Puetunu nojorijianaari maninia tojitiaquiaari pueyaracaanu Jesu jiyaramiquishano pueya niishitiojosano. Nojoriiri jatiqiquijia maninia. Majaari nojori juayonuujutanu quijia.

Nojoriiri pueyaracaanu rerejojua neecaruu serotanura Jesu cusonu niishiniuria. Mariyata Pueyaso secojonuujua pueyaracaanuuri.

*Panitiojuaca Jesu tojitianaa quishacari juhua tapueyocucata*

<sup>43</sup> Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacujitij, puetunu pueyajanaari puereturiquiaa. Pueyari shiriiqitiurii. <sup>44</sup> Puetunu Jesuucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niqutiojoquiaari nareja casamiijiuniucua pueya. <sup>45</sup> Tamasacaari na jiiitasano casami niqutioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasaca niqutioquiaarijuhuaj, casamiijiuniucua jiiitanura puetunu nojori panishanojuanaajuhuj. Tamasaca pueyari na cuhuariquia niqutioquiaari nojori jiiitanura na cumaneeca, tamasaca na naacunurajuhuj. <sup>46</sup> Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojojua tiajinia. Mariyata tama nojori tiajiniaaja nojoriiri rerejojua, neecaruu neecasenura Jiyaniijia Jesu cusonu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujiaraca quiquiaari. Nojoriiri maja tamonu pueya shocotanu panijiaca quiquiaari. <sup>47</sup> Nojoriiri pueyaracaanu Pueyaso maninihuaqueetariquiaa nojori shuquiriniutia. Puetunu Jesuucua tiuyashijiaca pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiushacari nocua.

<sup>1</sup> Tamonu juuca, Pedroori Juanta tacatariquiaa Pueyaso Secojojua tiajinia. Tari quiquiaariiri pananu piriushacari. Nojoriiri jiyacari quiojonu jiitiquiaari Pueyaso secojonura Secojojua tiajinia. <sup>2</sup> Jiyacaritij, tamonu sesarunocua pueyanoori tii cajitiariquiaa Secojojua tia tohuateyaji. Nojuajaari naa rasanjuhuanaja quiquiaari. Pueyaracaanu patoojotasaaquiaariiri Pueyaso Secojojua-jiniara, pueya na mashiniquiniuria cumaneeca nojori tiuquitasacari. Na cajitiasaqui tohuateya sesa quiquiaari “Tohuateya Maniniu”. <sup>3</sup> Sesarunocua pueyano jaara niquiquiaari Pedro, Juannio, nojori tiuquitianu panishacari Secojojua tiajinia, nojori maseree juucua na cumaneecaari. <sup>4</sup> Pedroori Juanta na shootiaree tacuriitia. Jiyacaritij, Pedroori na sequeere:

—Canaa quia niquiri.

<sup>5</sup> Sesarunocuaari juucua shootiariquiaa nojori. Cumaneeca niquitiosaariquiano jiyaniriquiaa juucuaari. <sup>6</sup> Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiitiasanota quia naacureera quiarijia. Quia sequeya Jesucristo sesajinianijia: “Quia sanere. Quia rucuanerejuhuj”.

<sup>7</sup> Pedroori na juaashiquiajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniujaacara quiquiijuhuj. <sup>8</sup> Sesarunocuaari juhuacatecara rucuanequiaari. Nojoritia tiuquiquiaari Pueyaso Secojojua tiajiniaari. Maninia rucuaneriquiaari. Jaacuatariquiaari. Pueyaso maninuhuaqueetariquiaajaariuhuj. <sup>9</sup> Puetunu pueyajanaari na niquiquiaari rucuaneyano, Pueyaso maninuhuaqueetaanojuhuj. <sup>10</sup> Puetunu pueyajanaari na niishiquiaari nojuajaari sesarunocucuaaja, Secojojua tiajinia tohuateya Maniniu-jinia cumaneeca mashiniquijiojuatej. Pueyari cunora jiuujiatequiaari. Jiyanhua shiriiquitiquiaariiri.

*Pedro pohuatasacari Pueyaso rupaa pueya niquiara*

<sup>11</sup> Sesarunocuaari Pedro juaashiquia carteyaquiquiaari, Juan juaashiquiano. Nojoriiri Pueyaso Secojojuajinia nujuaturiquiaa tamocora. Nojori nujuatusaquiiri pueya jiyaniquishano tariucuacaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shiriiquiniutia. <sup>12</sup> Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niquitiaa canaani? ¿Niaate jiyaniya canaa na niohuaca jee careeni? Maja canaa. Majaari canaa cumaacata na jeequenu quirii. Niaa naa-sucuaari jiyaniya canaari nio miiriini socua maninia miijia canaa quiniucua Pueyaso niquiara tamasaca pueyajiniji. ¡Maja! <sup>13</sup> ¡Jesucuaajaari na jee carohua! Nojuacuajaari na Que Pueyaso jiyatesano Jiyaniijiajanaa na quiniuria. Jiyaniijiajanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricua-jani: Abraham Jiyaniijia, Isaac Jiyaniijiano, Jacobo Jiyaniijiajuhuj. Tama pa supuetanaa Jiyaniijia Pueyasocua-jaari Neyanu Jesu jiyatequiaari Jiyaniijiajanaa na quiniuria. Niaa cutaraari Pueyaso Nyanu niquitiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. <sup>14</sup> Niaa maara maninia pueyanoocuaji tacucanu saniya cutara, niaari pueyano puecoojuaacua shiriiquitiurii saaja Pilato cartenura jiyano sesoriquia pueyano seque. <sup>15</sup> Niaari naa motecanu pueyano samiitianijiacuajatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pohuataani. <sup>16</sup> Nio sesarunocua pueyanoori Jesuucua tiurii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricua-janoj. Jesuucua na tiuushacari, na cuaqueya cumaquiriiri. Na cuaqueyari seetanujuanaa jeequerohua maninia,

taa nia niquiyacuajanoj. <sup>17</sup> Cuarta Israel pueyanaa, quiarijia niishiyanjia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaj. Niaari Pueyaso Jiyarosano mocanu nia niishiyaquishacari cante nojuaja quiquianuni.

<sup>18</sup> Naacuajitij, Pueyasoori na sequesano tohuatecanu, tarijia na niishitishano na rupaa caminiujiuniaa. Seetanujuanaa, puetunu Pueyaso sequesano caminiujiuniaa-janaari pa supuetanaa niquiara poojotaquiaari: “Pueyaso Jiyarosananoori naquiya miishaanutaniya”. Jesuuri naa miishaacanu taritij.

<sup>19</sup> Naaratej, nioojia nia tacatore sesa nia miishanojiniji. Pueyasooqua nia tacaterohua sesa nia miiniu tuujusaanura. <sup>20</sup> Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequequiaari pa Jiyaniijiaara na quiniuria. <sup>21</sup> Nojuajaari jiyocuacaanu quiniutianiya na Que shuriucua, Pueyaso cuara tucuatারেjaatijia puetunu tariucuacaanu na pohuatanishanojuanaa na sequenu panishano caminiujiuniaa.

<sup>22</sup> Moiséscuajaari naa sequequiaari pa supuetanaatej:

“Jiyaniijia Pueyasocujaari niaacua jiyaronutaniya nojuajiniji pohuatana tama nia niquiohuacuajinio supuenojuaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. <sup>23</sup> Canapuate cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

<sup>24</sup> 'Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pohuatanuuquiaarijuhuaj. Naacuajitij, Samuelri Jesucristojiniji pohuataquiaari taa na niniutianiyani. Naajuhuj, Samuel nuhuaji, puetunu Pueyaso sequesano

caminiujiuniaajanaari naa pohuatannuquiaarijuhuaj.  
<sup>25</sup> Puetunu Pueyaso sequesano Jesujiniijianaani,  
 cunoori quiarijia pajaniyara, taa Pueyaso  
 pohuataniquiaari tariucuacaanu na sequenu panishano  
 caminiujiuniaacuajani. Nojoriiri pa supuetanaa  
 quiquiaari. Pajaniyaranojaariuhuaj Pueyaso sequesano  
 pa supuetana Abraham. Pueyasoori naa sequequiaari pa  
 supuetana Abraham:

“Quia muetusanojiniji tamonu pueyanoori supuen-  
 taniya quia nuhuaji, cante pueya shuquiritiniu-  
 taniya puetunu jiyacajiniaajanaacuajani”.

<sup>26</sup> Pueyaso jaara na tojijia Niyanu samiitiani-quianu, co-  
 teenu na jiyaroree pocuaari poojia tacatoriquiano, sesa pa  
 miiniu pa cartenura, shuquiriaatia quijjara pa quiniuria.

Pedroori naa pohuataquiaari pueya niquiaratej.

## 4

### *Judiocuaca camarucua nequesoreesacari Pedro, Juannio*

<sup>1</sup> Pedro pohuatasacarijia pueya niquiara, nocua ni-  
 jioquiaariiri pueyacuara secojonaa, Pueyaso Secojojua  
 tia cojuanaata, Saduceocuatano. <sup>2</sup> Nojoriiri Pe-  
 dro tojiquiaari pueya niishitiojijano. Nojuajaari pueya  
 niishitiojoriquiaa macunucuaari saneecuatunutaniuhua  
 na jamacajiniji, naatej taa Jesu samiitiarohuacuaani.  
 Cuno jiyaniijianucua jaara naa tojiquiaari sequeshiyan-  
 otej, nocuaji jiyanohua juaaquoquiaariiri, na ruure-  
 tasacari Pedro sequesano. <sup>3</sup> Cuno juaaquoianoori Pe-  
 dro quiatuquiaari, Juannio. Jiyacariiri tariucua tenacari  
 quiquiaari. Tariucua niucua nujuatejosaaquiaariiri. No-  
 joriiri tii juhuaquequiaari nujuatejojuajinia. <sup>4</sup> Naajaa,  
 queraatia pueyari Jesuucua tiuquiaari Pedro pohu-  
 atasacari Jesujiniji. Quera cinco mil saaja canuuri tari  
 Jesuucua tiuuniaa quiquiaari. Maajipohuari serojosoo  
 quiquiaari.

<sup>5</sup> Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatano. Nojoriiri Jerusalén tiacajinia rerejoquiaari Jesujiniji pohuatanaa nojori nequesoreenura. <sup>6</sup> Anásri tii quiriquiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriquiaajuhuj, tamonu Juannio, Alejandronio, mariyata puetunu secojonaa jiyaniijia tapueyocuacanio. <sup>7</sup> Pedro, Juannio, nojoriiri nujuatejojuajiniji tohuatejosaaquiaari. Nujuatejosaree jiyaniijianucua tajiniaari. Pedro shocua, Juan shocua cajitiuniaari nojori nequesoreeree:

—¿Taa nia miiriucuaa noonijia, sesarunocuatej? ¿Cana cumaacata nia jecarohuacuaanoj? ¿Cante nia sequecanu naa nia miiniuriani?

<sup>8</sup> Jiyacaritij, Pueyaso Sohuanuuri Pedro jiuujia cumaquiuaari Pueyaso niishitiajata na pocuanura. Naacujitij, Pedroori naa nojori riucuaquiaari:

<sup>9</sup> —Canaa camarucuaanaa, nia pohuatareera sesarunocujiniji, taa na jeequerohuacuaani. <sup>10</sup> Níaa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniurijuhuj. Nio pueyano niya nujuaani, nojuajaari Jesucristo cumaacata jeequerohuacuaa. Níaaari Nazaret tiacajinijinio Jesu cusojuacanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhuara. <sup>11</sup> Níajaniyari juhua saitia tiajonaa Pueyasora. Níaa tiasacari, níaaari maniniujijau saajia jataquiaari, nia jyanishacari sesarujajau naasucua. Na camaruuri saniniujia sequeya:

“Cuno nia jatasano saajiani, cunoori saniya cua maniniujijau saajia”.

Níaaari naa Jesu jataquiaari juhua saajia sesarujajau. Naajaa, Pueyasoori na níaaquiaariuhua socua maniniushiqui. <sup>12</sup> Majaari tamonu quiniu pocuaji tacuna.



Puetunu pueya tajinijiojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

<sup>13</sup> Judiocuaca camarucuaari jiyano hua na namijiaa ri-unitiquioquiaari nojori niquishacari taa Pedro, Juan seetanujuanaa cumaacata pohuatariquiaa nojori niqiarani. Nojoriiri Pedro, Juan niishiquiaari nojoriiri seetanujuaanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacaritij, nojoriiri seetanujuanaa niishirii nojoriiri Jesu cojiniaa quiquiaari. <sup>14</sup> Sesarunocua jeequeno huari cuniqui nojori shuriucua nujuariquiaa jacuahuaj. Naaratej, jiyaniijianucuaari socua sanaajetaquiaari. Saaja niishiriojonuuriquiaari. <sup>15</sup> Camarucuaari Pedro, Juan tohuanijioquiaari tamocora nojori tajiniji. Jiyareta camarucuaari tama pocoojoquiaariijaaja. <sup>16</sup> Naa seque-tuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeCASOO. Nojoricuajaari tari maninia na niishitiuya. <sup>17</sup> Nio pojori pa piriyojore juhuari, maja socua quiarjia nojori pohuata-nura Jesujiniji pueya niquiara, nojori miishano paaqueyaquiniuria socua niya pa tiacajiniani.

<sup>18</sup> Camarucuaari socua piiquiaariuhua Pedro, Juannio. Nojori nacasuree jiyano huari, maja socua quenaaja nojori pohuatanura Jesujiniji pueya niquiara.

<sup>19</sup> Pedroori Juanta nojori riucuaquiaari:

—¿Canaatucua casaara Pueyaso samiritiare canaa to-jiniuria niajaniyani? ¿Taa nia sequeyani jiyaniijianucua-naa? <sup>20</sup> Maja cutaraari canaa naata tarinitianu pohuatanu canaa niquishano, canaa tojishanonio.

<sup>21</sup> Camarucuaari nojori piriyojoquiaari juucuohuaj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. <sup>22</sup> Pedro jeecasanohua sesarunocua pueyanoni, nojuajaari cuarenta marijia shocotejoquiaari tari na quishacari.

*Jesu pueya secojosacari Pueyaso, na cumaquiniuria nojori*

<sup>23</sup> Pedro, Juan jaara cartesaaquiaari, nojoriiri narta Pueyaso pueyacia quiojoquiaariuhua. Nojori pohu- atatureeri Judiocuaca camarucua sequesano nojori, ca- marucua nacasunaa sequesanojuhuaj. <sup>24</sup> Na tojishacari camarucua piriyojosano, puetunu nojorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua ship- ininia, jiyanio. Shoniniacu caminiaari quia shipinishano- juhuaj. Puetunu casaajanaari quia shipinishano. Quiaari jiyanohua maninia. <sup>25</sup> Canaa supuetanaa jiyaniijia Davidri quia seru quiquiaari. Naacuajitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacua quiniaa pueya juayani? Pueyari najuhuana sesa niishiriojoriquiaa juucua. <sup>26</sup> Jiyajinijinio jiyaniijianucuaari na juaaquiacaa sanetaree. Queraatia tiacajinijinio camarucuaari Jiyaniijia Pueyasooacara roojotooree, na jiyarosano Cristoocuaranio”.

<sup>27</sup> 'Pueyasonaa, naacuaaquiniatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucucata, Israel pueyatano. Quia Nyanuucuaara roo- jotoocanuuri, tama quia Jiyarosanoocuarajaaja. <sup>28</sup> Naa

nojori miiniuucuatej, nio pueyari tari quia miiniu panishano miiriucuaa, taa quia sequequiaari tariucuaaanucujani: “Cua Niyanu cuaara mosaaria puetunu pueyacuajanaa”.<sup>29</sup> Canaa Pueyasonaa, quia tojishuriucuaraj. Nojoriiri quiarijia canaa miananojiya saniniuuja. Canaacuajaari quia seyani. Canaa jiuujia quia cumaquiri quiarijia, canaa pohuatanura socua quia rupaa canaa puereyaquiniutia.<sup>30</sup> Cusosuhua cuaara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuaara miijiosaaria quia cumaacata pueya niquishocoriquiano. Nojuacuajaari saa maninija.

<sup>31</sup> Nojori puecasacari secojonu, nojori quishaqui tiaari canashiyaquiji jiuuquiutiaquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niquiara. Majaari na pueretunu quiquiaari.

### *Jamueyashijiaa Jesu tojitiana quishacari*

<sup>32</sup> Jesuucua tiunuaari maninia juhua rupuetootesano quiquiaari puetunujuanaa. Nojoriiri juhua seetanujanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiatasano casamiiri saniniuuja puetunu narta Jesuucua tiunuaarajanaa quiquiaarjihuuj.

<sup>33</sup> Jesu saquiriojosano pueyari Jesu samiitianujiniji poojotaquiaari jiyanoehua cumaacata. Naajuhuuj, Pueyasoori puetunu Jesuucua tiunuaajanaa naacuriquiaa jiyanoehua, shuquiriaatia nojori quiniuria.<sup>34</sup> Puetunu Pueyaso pueyajanaari na panishano jiiatiaquiaari puetunujuanaa. Nojorijinijinio jaara cuhuariquia jiiatiaquiaari, tiano, nojoriiri na niquitioquiaari cumaneecara.<sup>35</sup> Jaara cumaneeca masequiaari na casaa sami, nojoriiri nareja na niquitioquiaari Jesu saquiriojosano pueya. Nojoriiri saniniuuja casamiijiu

Pueyaso pueya na serotaquiaari, nojori jiitianura na panishanojuhuaj. <sup>36</sup> Nojorijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. <sup>37</sup> Bernabeeri cuhuariquia jiitiaquiaari. Na cuhuariquia niquitioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niquitioquiaari Jesu jiyaramiquishano pueya, casamiijiu narta Pueyaso pueya niquitiojosaanura saniniuuja.

## 5

### *Ananías, Safira sesa miishanojiniji pohuatasano*

<sup>1</sup> Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niquitioquiaari cumaneecarajuhuj. <sup>2</sup> Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuuari. Juhua papatasoo niquitioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriquiaa Ananías niquitiosacari nareja na cumaneeca. <sup>3</sup> Ananías niquitiosacari na cumaneeca, Pedroori na sequeree:

—Ananíasnaa, ¿casaara quia tiuquinirii Sesaaca quioojiajiniani, quia sapojonura Pueyaso Sohuanu juucuaani? ¿Nojuacuajaari cua niishitiquii nio cumaneecaari maja puetunu quia masesanojuanaa quia cuhuariquia samijiniji! ¿Quiaacuajaari tiji queyataree!

<sup>4</sup> Quia cuhuariquia quia niquitioyaquishacarijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niquitioree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia

niishiriojoreerini? Naa sacuaraatia quia miishacaritij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

<sup>5</sup> Ananías tojishacari naa Pedro sequesantej, ¡macuuri pojoquee! Puetunu pueyajanaa jaara tojiniuuquiaari nocuaji, jiyanoehua shiriiquitiuquiaariiri. <sup>6</sup> Mashiquioriiri na jiuniocoquiaari toquejinia. Na nuhuaji, na patuquiaari na jamonuraari.

<sup>7</sup> Jiuujianaraca hora nuhuaji, necocuaari juhuajaniya tiuquiquiaari Pedroocuajuhuj. <sup>8</sup> Pedroori na nequesotaree:

—Cua sequere, ¿niojuanaate nia cuhuariquia sami quir-iucuaa?

Na riuquareeri:

—Jaa, niojuanaacuaaquinatejaj.

<sup>9</sup> Pedroori na sequere:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquiiijohua. Nojoriiri quiarijia quia panutaniyajuhuj.

<sup>10</sup> Jiyacaritij, maajiiri macu pojoquee Pedro shuriucua-juhuj. Mashiquiori tiuquiiijosacariuhua, nojoriiri Safira niquishuhua pojianojuhuaj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri. <sup>11</sup> Puetunu Pueyaso pueyajanaa, tamasaca pueyano, nojori jaara tojiniuuquiaari puetunu nio miishanojinijianaa, jiyanoehua pueretuquiaariiri.

*Queraatia miijosacari Pueyaso cumaacata pueya niqiara*

<sup>12</sup> Jesu jiyaramiquishano pueyari jiyanoehua cutara casaa miijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquis-hano tariucuaaanu jiyaniijia Salomón canujuucojojua-jinia, Pueyaso Secojoua tiajinia. <sup>13</sup> Tamasaca pueyari

nojori puerequiaari. Majaari nojori rupuesaanu quijia. Na pueretujuacaari nojorijiniiji sequetujua:

—Cuno pojoriiri maninia pueya.

<sup>14</sup> Queraatia pueyari Jiyaniijia Pueyasocua tiuuquiaari, canuu, maajipohuanio. <sup>15</sup> Naajuhuj, cusosuhuari patootasaaquiaari na maquetucujinia nuujiniara. Pueyari naa niishiriojoquiaari, Pedro jaara cusosuhua shuriuquico tajimia, cusosuhuari naataconutaniuhua Pedro naaqui jaara nojori caco netema. <sup>16</sup> Queraatia Jerusalén tiaca shocua quiniaa pueyari na cusosuhua patootaquiaarijuhuaj, Jerusalén tiacajiniara. Samaruhua sesosano pueyari jaatucunuusaaquiaarijuhuaj. Puetunu pueyajanaari naatanijosaaquiaari.

*Pedro, Juan nujuatejosacari nujuatejojuajinia*

<sup>17</sup> Naaratej, pueyacuara secojonaa jiyaniijia, nata quiniaa narta Saduceocuacanio, nojoriiri juaaquioquiaari shocotasano nojori quishacari. <sup>18</sup> Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. <sup>19</sup> Pueyaso seruuri niucua jiyocuacaanuji nojoriicua rosequiaari. Nujuatejojua tohuateya riataseeri. Na tohuatejosacari Pedro, Juannio, nojori sequereeri:

<sup>20</sup> —Juhujaniya nia quiaarohua. Pueyaso Secojojua tiajinia puetunu Jesujinijijianaa nia pohuatare pueya niqiuara. Nia pohuatarejuhuaj taa jatanishano pueya nia quiya quiarijiani.

<sup>21</sup> Nojoriiri Pueyaso seru sequesano tojiqiuiaari. Nojoriiri tariquicuaji quiojoquiaari Pueyaso Secojojua tiajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijiaari nata quiniaata saniniuujia quiojoquiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano

pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoreeso-coriqiano. <sup>22</sup> Na pueya jaara tiuquitiaquiaari nujuatejojuajinia, majaari nujuatejosano na riuriatatanu quishii nujuatejojuajinia. Nojoriiri tacaretacuhua na shaacanu nuhuaji. <sup>23</sup> Naa pohuatanusuhua camarucua niqiaaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaari riatasacari tohuateya, ¡shaacoori quiriquiaa!

<sup>24</sup> Secojoua tia cojuanaa camarnu, mariyata pueyacuara secojonaa jiyaniijianucuaari tama sequetooquiaariijaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiyatej?

<sup>25</sup> Jiyacaritij, tamonu pueyanoori camarucuaacua tiuquishii. Naa nojori sequeeseeri:

—¡Noo pojori, niaa na nujuatejocanu nujuatejojuajinatej, nojoriiri juhuajaniya pueya niishitiojonuya Pueyaso Secojoua tiajinia!

<sup>26</sup> Tari nojori niishishacari tee Jesu jiyaramiquishano pueya quiriquiaani, Secojoua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuuquiaariuhua. Secojoua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuurijia. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuuquiaari. Majaari na caponeesaanu quiquiaari. <sup>27</sup> Jaara tiuquitiasaaquiaariuhua, nojoriiri Israel pueya camarucujanaa tajinia nujuatejosaaquiaari,

Sanedrín cuaca tajiniatuhuj. Pueyacuara secojonaa jiyaniijaari nojori sequequiaari:

<sup>28</sup>—¡Majaquiiri nia niishiniu tojiniu! Canaacuajaari tari nia tenujucanu juucuanu maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequesano? Naa nia niishitiojosacari-tij, ¡puetunu Jerusalén tiacajinia quiniaajanaari canaacua tiuutianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

<sup>29</sup> Pedroori narta Jesu saquiriojosano pueyata nojori riucuaquiaari:

—Seetanujuanaari, pueya cuaara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyaniijanucua sequesano cuaara miishaaria.

<sup>30</sup> Pueyasoori tariucuaaanu pa supuetanaa Jiyaniijia quiquiaarijuhuaj. Cuno Pueyasojuanaacujaari niyacutesanojinia nia cusojuasano samiitiani quianuhua.

<sup>31</sup> Pueyasoori na tacaniquianu jiyocuacaanu. Na miaquetajara na cajitiquianuuri Jiyaniijiajanaa na quiniucua, pocuaji Tacuna na quiniucua juhuaj. Naa miiquianuuri Israel pueya tacatonuhua noojia Pueyasocua, Pueyaso jiyanooniuria pajaniya sesa pa miishanojiniji.

<sup>32</sup> Naaratej, canaari canaa tojishano pohuataani, canaa niquishanonio. Naajuahuaj, Pueyaso Sohuanuuri canaa niishitiojoquiaa maninia canaa pohuatanura pueya niquiara. Pueyasocujaari na tojitianaa niquitioquiaa na Sohuanu.

<sup>33</sup> Naa Judiocuaca camarucua tojishacari nojori sequesanotej, juaaquioreeri. Nojori puecoonu panirii juucuaari. <sup>34</sup> Jiyacaritij, tamonu pueyanoori narta camarucua tajiniji nujuaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuaaanu rootasano niishijia quiquiaari cutara. Naa-



juhuaj, nojuajaari jiyanoehua narta Israel pueya tojishano pueyano quiquiaari. Gamalielri Secojojua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. <sup>35</sup> Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. <sup>36</sup> ¿Majateeri nia niishiniu taa Teudas miiquiaari quiari naatajani? Nojuajaari jiyaniijia quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niaquejoquiaariuhua. Naa puequequiaariiri Teudas miiniu panishano. <sup>37</sup> Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niaquejoquiaariuhua juhuaj. <sup>38</sup> Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaaja quiri, shaajenutaniyari. <sup>39</sup> Saniniuujia, nojori miishano jaara seetanujanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetoojonuruhua, naa nojori nia miishacaritij.

<sup>40</sup> Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaaruhi. Camarucuaari nojori mojuoree nareja. Nojori tenujutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari cartequesaquiaariuhua.

<sup>41</sup> Jesu jiyaramiquishano pueyari camarucua rerejojua-

jiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniuucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji.<sup>42</sup> Majaari nojori pishiniu quiquiaari nojori pohuata-nura Jesujiniji. Socua pueya niishitiojonura jiyacate-quiaariiri. Nojoriiri pueyaracaanu pueya niquiara pohu-atariquiaa Jesucristojiniji, puetunu juucajanaa, Pueyaso Secojojua tiajinia, mariyata puetunu Jerusalén tiacajini-aqueyajanaanio.

## 6

### *Mashiquiopue mianuutenaara saquiriojosacari*

<sup>1</sup> Jiyacaritij, Jesuucua tiuunias pueyari socua canequiaari. Puetunu nio pojorijinijiniojuanaani, noojiaqueyari Judio rupaa pocuanaa quiquiaari. Naajuhuaaj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquioquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioyaquiquiaa miaquesanonijia?

<sup>2</sup> Nocuaji, Jesu jiyaramiquishano doce pueyari puetunu Jesuucua tiuunias pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue.<sup>3</sup> Cunora canaa tapueyocucanaa, tama niajanijinijinio nia saquiriojore siete maninia miijiaca pueya, niishijiaca, Pueyaso Sohuanuraca cutara. Nojori nia seeratare nio poonijosano, maninia nojori mianuutenura pa mashiquiopue.<sup>4</sup> Canaacua saniniuujia saa Pueyaso secojorenijia. Naajuhuaaj, majaari canaa tarinitianu quiniutianiya Jesujiniji niishitiojonu.

<sup>5</sup> Puetunu pueyajanaari na shuquiriniutia naa riu-cuaquiaari:

—Taaquiriirinij, naacuaaquiniateja maniniajaj.

Jiyacaritij, pueyari Esteban saquiriojoquiaari. Nojuajaari jiyanoehua Pueyasooeua tiuujia pueyano quiquiaari. Nojuajaari Pueyaso Sohuanu cumaacaraca quiquiaariji-uhuj. Nio pojoriiri Estebanta saquiriojosaaquiaariji-uhuj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. <sup>6</sup> Puetunu pueyajanaa jaara cuno siete pueya saquiriojoquiaari, nojori jiyataquiaari-iri Jesu jiyaramiquishano doce pueyacia. Jesu saquiriojosano pueyari cuno siete canuu nacaacia niaquiaari na juaashiquiaca. Pueyaso secojoturee nojoriicuaaraari Pueyaso Sohuanu cumaquiniuria nojori, miaquesano niq-uitiojonaa nojori quiniuria.

<sup>7</sup> Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijiuhuj. Queraatia Judiocuacaacuara secojonaa pueyari Jesuucua tiuquiaar-ijiuhuj.

*Jesu ruuretajaca quiasacari Esteban*

<sup>8</sup> Estebanri Pueyaso cumaacaraca quiquiaari jiyanoehua. Pueyasoori maninia na jiitiaquiaari. Naacuaajitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujuanaa Pueyasojiniji quiquiaari, nojori niqishacari jiyajeneta na miishano Pueyaso cumaacata. <sup>9</sup> Jiyacariti, tamasa Judiocuacaari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji carteqesano pueya”. Quiquiaarijiaariuhua Cirene tiacajinijinio pueya, Alejandría tiacajinijinio pueya, Cilicia jiyajinijinio pueyajuhuj, Asia jiyajinijinio pueyano. Puetunu

nojojijianaari Estebancua rerejoquiaari nata juayonuu-tanura. <sup>10</sup> Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuanu niishitio-josanota saa maninia pohuataquiaarijia nojori niquiara. <sup>11</sup> Maja socua nojori rejeretasacari Esteban pohuatasano, nojoriiri tamasaca pueya niqutioquiaari cumaneeca, najuhuaana nojori cuaracashiniuria camarucua niquiara Estebancuara. Cuno pueya, cumaneeca niqutiojosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiririnij, canaacuajaari cuno pueyano tojiquianu Moisés sesacaanoni, Pueyaso sesacaanojuhuaj!

<sup>12</sup> Naa nojori sequesacaritij, puetunu pueyajanaari juaaquioree, Judiocuaca camarucujahuaj, Moisés Rootasano niishitiojonaanio. Puetunu nojojijianaari Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoreesaquiriaari, Israel pueya camarucua nequesoreesocoriquiano tii nojuaja. <sup>13</sup> Socua pajesaaquiaariiri tamasaca, Estebancuara tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoua tia. Moisés Rootasano sesacaariquihuari-uhuj. <sup>14</sup> Canaari socua naa na sequesano tojiquiaajaani-uhuj: “Nazaret tiacajinijinio Jesuni, nojuajaari Pueyaso Secojoua tia niyartanutaniya”. Naajuhuj, tariucuaaanu Moisés niishitiojosano pajaniya pa cartetenutaniyaquini-aari.

<sup>15</sup> Puetunu camarucujanaari na cajitiushaquiji niq-uitiariquiaa Esteban. Nojoriiri na jiquioco niqiquiaari shacantuuca, juhua Pueyaso seru jiquioco.

## 7

*Esteban pohuatasano*

<sup>1</sup> Pueyacuara secojonaa jiyaniijiaari Esteban nequesotaquiaari:

—¿Seetanutejanaa taa nio pojori sequereecuajani?

<sup>2</sup> Nojuajaari na riucuaare:

—Cua panishano pueyanaa, cua camarucuanaa, cua tojitiare. Pueyasoori jiyano-hua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarijia Harán tiacajinia. <sup>3</sup> Pueyasoori jiyacari naa na sequequiaari:

“Quia tiujiaare quia jiya, quia pueyanio. Niiquiji quia quiaare, janiya cuara quia sequerejaatijia, niya quia quishii. Quiocua tii jiyojese cutara”.

<sup>4</sup> Abrahamri Pueyaso sequesano tojiquiaari. Quiaquiaari-iri Caldeo pueya jiyajiniji. Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. <sup>5</sup> Jiyacaritij, Pueyasoori juhuanojuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jiitianu quiquiaari tama na quijarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niqiuohuara quiniutianiya saniniuuriija”.

Pueyaso jaara naa sequequiaari Abrahamtej, Abrahamri jiyacari juhuanojuaja niqiuohuju quiquiaari.

<sup>6</sup> Pueyasoori naa pacutequiaari sequenu Abrahamtej:

“Puetunu quia jinianuucujiniao supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyano-hua. Naa naquiya miishaanutaniyari. Tii nojori quishacari, na shoconujunutaniyari cuatro ciento marijia”.

<sup>7</sup> Pueyasoori Abraham sequereejuhuj:

“Janiyari saniniuuja cuno taucuaca naminiutianiya quiocuajinio supueno pueyacuani. Janiyari nojori saniitionutaniya saniniunjia nojori poonijiotenuucua quiocuajinio supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonujuaca quiniutianiya niya”.

<sup>8</sup> Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano nia-janiya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa mi-iquiaari neyanu Jacobojuhuj. Pueyasoori Jacobo sesojouquiaari “Israel”. Jacoboori naa miiquiaari necohujuhuj. Necohuari quiquiaari doce canuu. Cuno doce canuu, Jacobo niqiuohuani, nojoriiri puetunu pa doce Israel pueyapue supuetanaajanaa.

<sup>9</sup> Pa supuetana Jacobo niqiuohujinijinioni, tamonuri sesojosaaquiaari José. Tapueyocuacaari José juaajica quiquiaari jiyanoehua, puera na que panishano José quishacari. Majaari nojori niqitiuniu paniniu quijia nojuaja. Na queeri socua jiyanoehua José panijia quiquiaari na pueranaajiniji. Tapueyocuacaari cunora casami niq-uitiojonaa pueya niqutioquiaari cumaneecara tarajanu José. Casami niqutiojonaari José jiyataquiaari Egipto jiyajinia, saniniuuja tii na niqitiosocoriquiano serura. Naajaa, Pueyasoori Joseeta quiriqiaa. <sup>10</sup> Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyani-

ijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhuj.

<sup>11</sup> 'Na nuhuaji, miaajenuuri quiquiaari puetunu Egipto jiyajiniajanaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacoquiaari na miajajaara. Seetanujuanaa shaaqui quiquiaariiri nojori miasano. <sup>12</sup> Jiyacaritij, Jacoboori caminiujiushaaquiaari: “Egipto jiyajinia quiyaquinia trigo”. Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja. <sup>13</sup> Coteenu nojori masesano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: “Janiya nia tarajanuni”. Joseeri Faraón niishitiquiaari tapueyocuacajuhuj. Naaratej, Faraónri shusha niishiquiaari tejeno pueyanote José quiquiaarini. <sup>14</sup> Joseeri tapueyocuaca sequequiaari: “Pa que Jacobo nia riquioo niyara, puetunu necohuatajanaa”. Puetunu nojorijianaari quiquiaari setenta y cinco pueya. <sup>15</sup> Jacoboori naa pacuquiaari Egipto jiyajiniaratej. Na nuhuaji, saaquianoori tii shaajeseequiaari. Necohuari tii puequeseequiaarijuhuaj, tariucua saaquiapue. <sup>16</sup> Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaaquiaariiri na supuetana Abraham raaco. Cuno raari cuhuariquiajinia quijia. Abrahamri cuno cuhuariquia masequiaari tariucuaaanu pueyajiniji raa na jiitianura necocua na nijara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

<sup>17</sup> 'Pueyasocujaari tariucuaaanu Abraham sequequiaari nojuajaari nio jiya na niqutionutaniya.

Quera na niqutionu panishacari, Israel pueyari jiyanhua canequiaari Egipto jiyajinia. <sup>18</sup> Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanhua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. <sup>19</sup> Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuaara quejoosaaria moojinia. Pa supuetanaari taraatia miiquioquiaari naacuatej. <sup>20</sup> Moisésri jiyacari rasaquiaari. Pueyasoori na maniniucuaquiaari. Na queyari na jiitiaquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaquiaari. <sup>21</sup> Faraón niyatuuri na paquiaari saniniuujia. Na canashitiquiaari juhua na mueyari. <sup>22</sup> Egipto pueyari Moisés niishitiojoquiaari puetunu nojori niishishanojuanaa. Puetunu Moisés sequesanojuanaari jiyanhua tojishano quiquiaari cutara. Puetunu na miishanojuanaari maninia quiquiaarijuhuaj.

<sup>23</sup> 'Cuarenta marijia jaara shocojoquiaari Moisés, mashaja na quishacarijia, narta Israel pueyacia rucuanenu paniquiaariiri, nojori na niqiniuria. Judiocuacacujaari cuno pojori, naa sesojoshiya Israel pueyatani, maja tamonu. <sup>24</sup> Naacuajitij, Moisés jaara quiaquiaari narta Israel pueya niqiniuucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuujia cuno Egipcio pueyanoori. <sup>25</sup> Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. <sup>26</sup> Moisésri socua tariqui quiaquiaari narta Israel pueya niqiniuuquiuhuj. Nojuajaari saaja riuriatasee tama nojori piyotaanojuaja. Juucua nojori



ruparetanu panishiiri. Nojori sequereeri: “¿Niaateeri tamonu, niaa jaara naa miitoyaniquitij? ¿Casaara naa nia nootujutoyani?” <sup>27</sup> Cuno narta pueyano piquiriquiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canatej? ¿Cante quia jiyatecanu canaa nequesoreenarani? <sup>28</sup> ¿Quiaateeri cua monu panijahuaj, naatej taa quia morucuaa cuno Egipto pueyanocuaani?” <sup>29</sup> Moisés tojishacari naa cuno pueyano sequesantej, ritia mashiquiaari Egipto jiyajiniijiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

<sup>30</sup> Cuniqi na quishacari, na shocojoquiaariiri cuarenta marijia socua. Tamonu juuca, Moisésri rucuanajoriquiaa cariiquia jiyajinia, pueya sesojosano Sinaí tuhananu shuriucua. Pueyaso seruuri tii nocua muetaquiaari nequeru casaja noshiyanojiniji. <sup>31</sup> Moisés niquishacari mani noshiyano, nojuajaari shiriiquiaari. Jaara nocua catecanoquiaari na niqiniuria maninia, saaja Jiyaniijia Pueyaso tojirii manijiniji pocuaanoori. <sup>32</sup> Pueyasoori naa na sequequiaaritij:

“Janiyacujaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuaj, Jacobo Jiyaniijiano”.

Moisés jaara naa tojiquiaaritij, tetecareeri. Majaari mani noshiyano na niqiniu paniniu quiquiaari na puerenuta.

<sup>33</sup> Pueyasoori na sequequiaari:

“Cuniquijia quia jocojore quia sapatu. Niya, quiaa tii nujuaani, nioori cua quishaqui. <sup>34</sup> Janiyacujaari cua pueya niqiquiaa Egipto jiyajinia quianoni. Egipto pueyari nojori miitaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua

mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaaritij.

<sup>35</sup> 'Israel pueyari tarijia Moisés juaaquiaaricuaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhua?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiyaroquiaariiri puetunu nojori tohuatanijioriquianojuanaa Egipto jiyajiniji. <sup>36</sup> Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miiijioquiaari Pueyaso cumaacata cuno jiyajinia, mariyata nojori niuutiasacari Naatunacu jiyaniishano caminiajuhuaj. Naa miiquiaari pueyaracaanu cariiquia jiyajiniajaariuhuj. Cuarenta marijiaari nojori shocojoquiaari pueyaracaanu nojori rucuanesacari tii. <sup>37</sup> Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquiara, taa na jiyaroquiaari janiyacuaani. Tama nia niquiohuacujiniojuaja supenutaniyari. Niocua saa nojuaja tojiri cutara”.

<sup>38</sup> Nio Moisésri narta Israel pueyata quiquiaari cariiquia jiyajinia. Nojuajaari Pueyaso seruta pocoojoquiaari Siná tuhuananuucua pa supuetanaa jateesacari tuhuananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

<sup>39</sup> 'Pa supuetanaari saa na ruuretaquiaarijia. Majaari nojori tojiniu paniniu quiquiaari Moisés. Egipto jiyajinia tacatenu paniquiaariuhua saajaari.

<sup>40</sup> Naacuajitij, Moisés tarishishacari tuhuananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua pa mashiquiquianu Egipto jiyajiniji”.

<sup>41</sup> Naacuajitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiata na shipinitiushano pueyasooacara. Nojoriiri jiyacari sacuaraatia timiquioriquiaa.

<sup>42</sup> Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuacaanu Pueyaso sequesano caminiujiuniaa naajioneejinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariiquia jiyajinia nia camarucuneetasacari cuarenta marijia cuara nia shocojoquiaarijiaatijia? ¿Cucuaratee?

¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohuarajaaja.

<sup>43</sup> Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocujaari nia sequesano, ‘canaa pueyaso’. Niaari Refam pataquiaarijiuhuj, juhua rijia niquishano shipinishano. Niaari puetunu

nio shipinijioquiaarijianaa nia pueyasohuara, nojori cariquimiaji nia mojuquetaconura, nia shuquiritasacari nojori. Nocujaj, janiyari nia jiyaronutaniya tucuacaanuni, Babilonia jiya

tamajiria”.

Pueyasocuaajaari naa sequequiaari pa supuetanaatej nojori miiniuucua sesa.

<sup>44</sup> Estebanri socua pohuataquiaari naatej:

—Pa supuetanaari Pueyaso secojojua suhuorotu jitiaciaarijiuhuj, cariquia jiyajinia nojori quishacari. Nojoriiri tii racataquiaari Pueyaso niquitiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacua. Cuno suhuorotuuri shipinishaaquiaari taa Moisés niquitishaaquiaaricujani Sinaí tuhananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niquitiquianu quiajanियacuajani”. <sup>45</sup> Na nuhuaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucuacata, nojoriiri Pueyaso secojojua suhuorotu patariquiaa. Pueyasoori cuno taucuaca jataquiaari nio jiyajiniji, saniniujia pa supuetanaa jiya na quiniuria. Cuno suhuorotuuri pa supuetanaata quiquiaarijia, David jaara jiyaniijia quiquiaari. <sup>46</sup> Jacoboori pa supuetanaa jiyaniijia David supuetana quiquiaarijiuhuj. Davidri Pueyaso tojijia quiquiaarijiuhuj. Pueyasoori na shuquiritiaciaari. Naaratej, Davidri Pueyaso Secojojua tiara tianu paniquiaari juucua. <sup>47</sup> David niyanu Salomón cutaraari Pueyasora tiaquiaari. <sup>48</sup> Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaja:

<sup>49</sup> “Jiyocuacaanuuri cua quiquio. Jiyari saniniujia cua niohuaca cua niaja. ¿Taamueca tia nia tianutaniya quiriajarani?’ Jiyaniijiaari naa sequeyaquij. ‘¿Taa

nia sequeyani: na mueecujuara pa miiri, shuquiri-  
aatia na quijiara? Maja. <sup>50</sup> ¿Majateeri puetunu nio  
jiyajinia niquishanojuanaa cua juaashiquiata cua  
miishanocujaja, jiyocuacaanujuhua? ”

<sup>51</sup> Estebanri socua nojori sequequiaari:

—¡Niaari tojitiaashijianucua! ¡Niaari Pueyaso seque-  
sano ruuretaquiaa juhua nia supuetanaa! Nioojaari  
maja juhua Pueyaso pueya jiuujia. Nia numaacaari maja  
Pueyaso rupaa na tojiniu paniniu. Niaari pueyaracaanu  
tojijaquiya Pueyaso Sohuanu niishitiojosano. Niaari  
Pueyaso tojiyashijianucua juhua nia supuetanaajuhua.  
<sup>52</sup> Nia niishiritioj, ¿nia supuetanaate quena niquiriyatu-  
jua Pueyaso sequesano caminiujiunaa miitiaaquiiaari?  
Nia supuetanaari puetunu Pueyaso sequesano caminiuji-  
unaajanaa miiquioquiaari naquiya. ¿Quenaaja niquiriy-  
atu nojorijininiote miitiasoo cureequiaari? Maja. No-  
joriiri tari puecoquiaari noo pueya, canapete maninia  
mijia mijiria niriqianojiniji pohuatanuuquiaaricujani.  
Cuno maninia mijia jaara tiuquiiaari, niaari sesa mijia  
pueya na niquitiocanu nojori mosocoriquiano. ¡Niaari  
naa mocanu Pueyaso Jiyarosanotej! ¡Niaari pueyara-  
caanu Pueyaso ruuretaquiaa! <sup>53</sup> Naacuajitij jiyocuacaanuj  
Pueyaso seya pohuatasano Pueyaso rootasano niaarani,  
majaari cuno nia tojiniu quiquiaajuhua.

### *Jesu ruuretajaca mosacari Esteban*

<sup>54</sup> Pueya jaara naa tojitiuquiaari Esteban sequesantej,  
nojoriiri jiyanojua juaaquioree. Na juaaniutia miaque-  
nuuree na quiacaari. <sup>55</sup> Jiyanojua Pueyaso Sohuanu  
cumaquishacari Esteban jiuujia, nojuajaari jiyocuacaanu  
mauquiaari. Saaja Pueyaso shacantuuca niquiriiri. Jesu  
niquiriijaariuhua na Que Pueyaso miaquetajara nu-  
juaano. <sup>56</sup> Naa na niquishacaritij, nojori sequere juu-  
cuuari:

—¡Nia niquishuriniaja! Jiyocuacaanu niquiya riatenonijia. ¡Pueyaso Niyanu niquiyanijia na Que miaquetajara nujuaano!

<sup>57</sup> Pueyari na numaaca mishiquiojonuuquiaari saaja, maja na tojitiuniuria Esteban sequesano. Jiyanohua sariyocuatuuquiaari na juaaniutiaari. Na nuhuaji, Estebancua cocuatequiaariiri. <sup>58</sup> Na caponeetuuquiaari Jerusalén tiacajiniiri. Tiacajiniji tohuatesaaree tamaaari. Na tohuatesaanu nuhuaji, tii na jacutuquiaari saitiaari. Na jacuturiquianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. <sup>59</sup> Nojori jacutusacari saitia Esteban, Estebanri Pueyaso secojoriquiaa naatej:

—Jiyaniijianaa, cua sohuanu quia riri quia shuriucuaa.

<sup>60</sup> Na nuhuaji, mojuquetareeri. Jiyanohua nacaquiaari na nuhuajiriaari:

—¡Jiyaniijianaa, majaari nio pojori saniitionu naa nojori miiniucua janiyatej!

Naa na sequenu nuhuajitij, cusoqueeri.

## 8

### *Saulo miishacari naquiya Jesuucua tiuuniaa*

<sup>1-2</sup> Pueyaso panijaca pueyari Esteban quete patuuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuacaari juhuacatecara miitianu coteequiaari puetunu Jesuucua tiuuniaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niaquejoquiaari puetunu Judea jiyajiniajanaa, Samaria jiyajinariano. <sup>3</sup> Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriasacari, na jayoquiaari tiacojiiri, na

nujuatejosocoriquiano nujuatejojuajinia, maajipohua, canuunio.

*Jesujiniji pohuatasacari Samaria jiyajinia*

<sup>4</sup> Mashiyocuatuno pueyari puetunu na quiasacojuanaa Jesujiniji pohuatanuuquiaari pueya niqiuara. <sup>5</sup> Nojorijinijinio quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijiaarihuaj. <sup>6</sup> Puetunu pueyajanaari Felipe pohuatasano tojiniuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. <sup>7</sup> Samaruhua tohuatanijioriquiaa pueyajinijiiri. Samaruhua tohuareetasacari pueyajiniji, sariyocua-maquiaari. Queraatia cumatacuruhuana cusosuhuari naatanijosaaquiaarijuhuaj, sesacujuanucuanio. <sup>8</sup> Naaratej, puetunu cuno tiacajinia quiniaa pueyajanaari jiyanohua shuquiriquiaari.

<sup>9</sup> Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojoujaari jiyajeneta na miiijosanota. Naa sequeja tama na cuaqueyajaarijia: “Janiya cutaraari tojishano pueyanoni”. <sup>10</sup> Puetunu pueyajanaari na tojijia quiquiaari, camarucua, muerasunio. Nojoriiri sequetuquiaari: “Nio pueyanoqui jiyanohua Pueyaso cumaaca jititia”.

<sup>11</sup> Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuuquiaari. <sup>12</sup> Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijijuahuaj, cuno Samaria pueyari Jesuucua tiuuquiaari cutara. Canuu, maajipohuajuahuaj, nojoriiri tiuquinijosaaquiaari moojinia. <sup>13</sup> Simónri Jesuucua tiuuquiaar-

ijiuhuaj. Tiuquinishaaquiaarijiaariuhuaj. Na tiuquin-  
ishaanu nuhuaji Felipeecua sacuaquiaariiri. Felipe shooti-  
aquiaari tacuriitiaari Felipe miijosacari jiyajeneta casaa  
Pueyaso cumaacata.

<sup>14</sup> Jerusalén tiacajinia Jesu saquiriojosano pueya jaara  
tojiquiaari taa Samaria pueya tiurii Pueyasoo cuani,  
nojoriiri cuniquiji jiyarotuquiaari Pedro, Juannio.

<sup>15</sup> Nojori tiuquishacari Samaria jiyajinia, cuniqui  
quiniaa Pueyaso pueyacuara secojotureeri nojori  
jiuujiajinia Pueyaso tiuquitiniuria na Sohuanujuhuaj.

<sup>16</sup> Majaari Pueyaso Sohuanu tiuquiniu quiquiaari  
juhuanujuaja nojori jiuujiajinia. Nojoriiri nareja moojinia  
tiuquinijosano quiquiaari Jesuucua nojori tiuushacari.

<sup>17</sup> Pedro, Juan, cunora na juaashiquia niojoquiaari  
pueyacuara, nojoriicuara na secojotusacari Pueyaso. Naa  
nojori miishacaritij, Pueyaso Sohuanuuri cuno pueya  
jiuujiajinia tiuquiquiaari cutara.

<sup>18</sup> Simónri niquiriquiaa taa Pueyaso Sohuanu  
tiuquiquiaari pueya jiuujiajinia Jesu saquiriojosano pueya  
niasacari na juaashiquia nojoriicuani. Naaratej nojuajaari  
Jesu saquiriojosano pueya niqitionu paniquiaari  
cumaneece juucua, cuno cumaaca na jiitianurajuhuaj.

<sup>19</sup> Simónri naa sequequiaari nojori:

—Cua niqitiotureja cuno cumaaca. Janiyacua Pueyaso  
Sohuanu panijiacuacua niare cua juaashiquianijia,  
Pueyaso Sohuanu nojori masenurajuhuaj, taa nia  
miyacuaani.

<sup>20</sup> Pedroori na sequequiaari saaja:

—¡Quia cumaneeca cuara shaajeera quiatajuhuaj!  
Quiaa naasucuaari jiyaniya Pueyaso Sohuanu cuma-  
neecata masesano. Quia niishiri, Pueyasoori na Sohuanu  
niqitioquiaa nareja na tojtiajaca pueya. <sup>21</sup>¡Pueyaso So-  
huanu cumaacaari maja quiarano! Quioojiaari jiyanohua  
sesa quiya Pueyaso niqiara, nocuaji maja na cumaaca



niquitiosaanu quiniutianiya quiajaniya. <sup>22</sup> Jiyano hua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojajiniatej. <sup>23</sup> Niishiyacuajanijia, quiaari juhua cartesoo quiyajaa, sesa miiniuucua jii tinio quia quishacarijia. Quioojiaari puera najiquitishano quiyajaa jiyano yashijia quia quiniuucujuhuj.

<sup>24</sup> Simónri na riucaquiaari:

—¡Pueyaso nia secojorequi cucuara, mariqui cua sanitioreeri taa nia sequeyacuajani!

<sup>25</sup> Na nuhuaji, Pedroori Juanta socua pohuataquiaari Jiyaniijia Pueyaso rupaa cuno pueya niquiara. Pueya niquiara pohuataureeri socua Samaria jiya tiacajinia, cuniqui quiniaa tiuuniuria Jesuucujuhuj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajinihua.

*Jesujiniji Felipe pohuatasacari Etiópe pueyano*

<sup>26</sup> Cuno nuhuaji, Pueyaso seruuri Felipeecua rosequiaari. Na sequeseeri:

—Quia sanere Felipenaa. Pananu shuucujiria nuicama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariiquia jiyacuma neteya.

<sup>27</sup> Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopía jiyajinijinio pueyanotaari. Cuno pueyanoori riyacajajaaju quiquiaari Etiopía jiya jiyaniijia naacutana na quiniuucua, maaji na jiyaniijia quiniuucua. Na jiyaniijia sesa quiquiaari Candace. Cuno maajiiri cuno pueyano jiyatequiaari Etiopía jiya casami jii tinanara, na cumaneeca cojuariquiano nera. Nio Etiópe pueyanoori Jerusalén tiacajinia quiaquiaari Pueyaso secojonuucua.

Cuniquiji tacateyanoori Filipeta naacuneetooquiaari nuujinia. <sup>28</sup> Nucuacoji na tacatesacariuhua na jiyajiniohuara, caballoori na jaatiariquiohua, rucuanegotajarujinia cajiyano. Pueyaso rupaa serojoriquiohuari, tariucuaaanu Pueyaso sequesano caminiujiunia Isaías naajioneejiniji. <sup>29</sup> Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

<sup>30</sup> Jaara nocua catecanoquiaari, Felipeeri Etíope pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

<sup>31</sup> Etíope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequereeri:

—Miji quia tacama. Cua shuriucua quia cajishii.

<sup>32</sup> Etíope pueyanoori nio serojoriquiaa tariucuaaanu Pueyaso Rupaajinia:

“Juhua borrego jaatucusaaquiaariiri mosocoriquiano. Naatej, taa borregocuaani sanaa niqiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. <sup>33</sup> Naquiya miishaaquiaari cararaatiaari. Nocua namiyaquishaaquiaariiri. Mashaja na quishacarijia, nojuajaari shaajasaaquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Etíope pueyanoori nio serojoriquiaa Pueyaso rupaajiniji.

<sup>34</sup> Na nuhuaji, Etíope pueyanoori Felipe nequesotaree:

—Cua sequere pueyanonaa, ¿canajiniji Isafás pahuataa niya na naajiosanojiniani? ¿Tama nojuajiniji pahuataa-tee? ¿Tamonujiniji soj?

<sup>35</sup> Felipeeri Etíope pueyano niishitiojonu coteequiaari Jesujiniji shusha na serojosano Isafás naajiosanojiniji. Felipeeri naa na sequeree:

—Isafás naajiosacari nio, nojuajaari juhuacaríjia Jesujiniji pahuataquiaari, taa quiaríjia Jesu miishaacanu taraatiacuajani.

Felipeeri socua na pahuataquiaari Jesu miishanojiniji. <sup>36</sup> Nojori quiasacari nucuaco, caminiaco shuriuquioco tajitariquiaari. Etíope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

<sup>37</sup> Felipeeri na sequeree:

—Quiaa jaara seetanujuanaa tiuuri Jesuucua, quia naata tiuquinishaanu.

Cuno pueyanoori na riuquaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishiyanjia.

<sup>38</sup> Etíope pueyanoori jiyamítia na seru sequeree:

—Quia nujuaretare rucanejotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiuushacari. <sup>39</sup> Nojori tacatasacarihua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaji. Nojuajaari juucua tacareecuquiaari na tiuquininiaacua. Majaari socua na niquiniu quiquiaari Felipe. Tariucua tiuquinishanoori shuquiriaatia quiaquiaaríhua na jiyajiniohua. <sup>40</sup> Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaarihuajanaa Pueyaso rupaa Jesujiniji. Naa tiuquishuhua Cesareya tiacajiniaari.

## 9

*Saulo jatasacari Jesu tojiniara na quiniuria*

<sup>1</sup> Sauloori jiyacari pueyaracaanu Jesuucua tiuuniaa mi-ananajoriquiase. Nojori puecoonu paniquiaari puetunu-juanaari. Naaratej, Sauloori pueyacuara secojonaa jiyani-ijiaacua quiaquiaari. <sup>2</sup> Naa na sequeeseeri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquiiijionura nojori rerejojuacajinia. Jesu tojiniaa pueya morojonu paniya cuniquiijinjia. Janiyari cua quioosano jaatucunutaniya niyara Jerusalén tiajiniarani, canuu, maajipohuanio.

<sup>3</sup> Naacuajitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, ¡shacantuucaari canashiyaquiji nunuquiaari jiyocuacaanuji!

<sup>4</sup> Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

<sup>5</sup> Sauloori na riucuaaree:

—¿Cantequia Jiyaniiijanaa?

Jiyocuacaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cu-cua tiuuniaa quia miitiasacari puera. Naa quia miishacari puera quia juaaniutiatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

<sup>6</sup> Sauloori na puerenuta na tetecasacari na sequequiaari:

—Jiyaniiijanaa, ¿casaa quia paniya cua miiniuriani?

Jiyaniiijaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

<sup>7</sup> Saulota quiोजनाari shiriiquitiuquiaari nojori jaara tojitiuquiaari jiyocuaaanuji pocuanu. Nojoriiri juucua na niqiniu paniquiaari. Saaja shaaquiiri quiriquiaa. <sup>8</sup> Na nuhuaji, Sauloori na pojosaquiiji sanerohua juucua. Majaari na naata niqiniu quiquiaari saaja. Nata quiniaari na jaatucutaquiaari Damasco tiacajiniara. <sup>9</sup> Nojuajaari tii camueenujuquiaari jiuujianaraca juuca, cariyojuaru na quishacari. Majaari na miaquenu quiquiaari pueyaraanu cariyojuaru na quishacari. Ratuyaquiiaarijiaari-  
ihuj.

<sup>10</sup> Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujinia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

<sup>11</sup> Jiyaniijiaari na sequeree:

—Quiarijia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajina quiya. Judas tiaari jati tamonu nuujinia quiya. Cuno nuu sesa, Nuu Maniniu. Sauloori cuno tiajina secojiya Pueyaso. <sup>12</sup> Nojuajaari juhua na maquenujinia tari niquirii quiajaniya nócua tiuquiyano. Tari quia sesa niishiyajaariuhuj. Sauloori tari quia niquirii na maquenujinia. Quiaari quia juaashiquia niariquiaa nocua, na namijia jeequenuhuara, maninia na niqiniuhuara.

<sup>13</sup> Ananías jaara naa tojiquiaari Jiyaniijia sequeyanotej, nojuajaari sequeree:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya mitiaquiaa taraatia Jerusalén tiacajiniaari! <sup>14</sup> Pueyacuara secojonaa jiyaniijia jiyarosanonaari cunohuj, quiarjia niya tiuquiriini. ¡Nojuajanaari quia secojonaa

pueya quioonutaniya, morojonucuaca canaa na jiyataso-  
coriquiano Jerusalén tiacajiniara!

<sup>15</sup> Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaca niquiara. Taucuaca jiyaniijianucua poojotanutaniya janiyajinijijiaariuhuj, Israel pueyano. <sup>16</sup> Janiyacuajaari Saulo niishitiojonutaniyani taa jiyanohua naquiya pueya miitianutaniya nojuajani, janiyajiniji na pohuatasacari.

<sup>17</sup> Naaratej, Ananíasri quiaquiaari. Judas tiajinia tiuquishiiri, tee Saulo quiriquiaacuajani. Na tiuquishacari, Sauloocua niasee na juaashiquiaari. Na sequereeri:

—Cua tarajanunaa, pa Jiyaniijia Jesu, quiocua muetaru-  
cuaa nio tiaca nucuamaji niyara quia nishacarini, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuj.

<sup>18</sup> Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinishaaquiaari moojinia Jesuucua na tiuushacari. <sup>19</sup> Na nuhuaji, miaquereeri, raturohuajaariuhuj. Noojia jatarohuari. Pasaja camueenujuquiaari Damasco tiacajiniaari Jesuucua tiuunaa pueyata.

*Jesujiniji Saulo pohuatasacari Damasco tiacajinia*

<sup>20</sup> Sauloori juhuacatecara coteequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—¡Jesuuri seetanujuanaa Pueyaso Niyanu!

<sup>21</sup> Naa nojori tojishacari Saulo pocuaanotej, pueyari shiriquiquiaari. Na shiriquitiuniutia sequetureeri:

—Nio pueyano pocuaani, ¿majate nootej, naquiya mi-iquiaa Jesuucua tiuuniaa pueya Jerusalén tiacajinatej? Niyara niyareejaariuhaj, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niqutio-josocoriquiano, nojori nujuatejosaanura.

<sup>22</sup> Sauloori socua noojia cumaquiquiaari Pueyaso So-huanuta, jyanohua maninia na pahuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pahuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

*Saulo mashishacari narta Judiocuacaacuaji*

<sup>23</sup> Quiniqui Saulo camueenujusacarijia pueyaracaanu, narta Judiocuacaari nocuara rojotooquiaari na motunura juucua. <sup>24</sup> Tamonuuri Sauloocua jiyanooquiaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. <sup>25</sup> Damasco tiacaari puereetuuca sohuacaraca quiquiaari puetunu na shocujanaa. Jesuucua tiuuniaa pueyari saaja Saulo mashiquiquiaari niucua. Sohuacajiniji roshinitiasaaquiaari jiyocuacaanuji puereetuuca canaasatujiniaari. Sauloori naa mashiquiaaritij.

*Saulo quishacariuhua Jerusalén tiacajinia*

<sup>26</sup> Na tiuquishacariuhua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenuta seque-tuquiaariiri:

—Pueyasooocua tiuujiaquinio naasucua jiyanotej.

<sup>27</sup> Bernabé cutaraari maja na puerenu quiquiaari Saulo. Nojuajaari Jesu saquiriojosano pueyacua na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tia-caacua neteja nucuamaji. Jiyaniijiaari nata pocojocanu. Sauloori cunora juhuajaniya pohuatariquiaa Jesujiniji Damasco tiacajinia.

<sup>28</sup> Sauloori narta Jesuucua tiuunaa pueyata jijojequiaari cuniquijia Jerusalén tiacajinia. Nojoritia rucuanefojuaari, mariyata Jesujiniji pohuataja juhuajaniyari. <sup>29</sup> Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocojoquiaariiri. Noji-aqueyari Saulota juayonuutaquiaari saaja. Nojoriiri socua na motunu paniquiaari. <sup>30</sup> Jesuucua tiuunaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquiji jiyarosaaquiaari na raja Tarso tiacajiniaari.

<sup>31</sup> Na nuhuaji, puetunu Judea jiyajinia Jesuucua tiuunaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojitiajacara quiquiaari nojori pueretusacari nojori mariqui na tojiyashijiara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

### *Pedro naatanishacari Eneas*

<sup>32</sup> Pedroori pueyaracaanu rucuanefojua Jesuucua tiuunaa pueyacua, nojori na niishitiojonura socua Jesujiniji. Tamonu juuca nojuajaari Pueyaso pueya niquiniucua quiaquiaari Lida tiacajiniajuhuaj. <sup>33</sup> Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quijia. Tari na



shocojoquiaari ocho marijia pootia na matasacari na matujinia. <sup>34</sup> Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jecare.

Eneasri ritia sanequiaari. <sup>35</sup> Puetunu pueyajanaa Lida tiacajinia quiniaa, mariyata Sarón tiacajinijinio pueyajuahaj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuuquiaari.

*Dorcas samitianishaanujiniji pohuatasano*

<sup>36</sup> Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupajinia sequesano “Dorcas”. Dorcasri saniniuujia pueyano rupaajinia sequeshiyacujua “nequeru”. Cuno maajiiri Jesuucua tiuuja quiquiaari. Nojuajaari maninia miihia maaji quiquiaari. Casamiiuniucua pueya niqutiojojua nareja na jiitiasanojinijiiri. <sup>37</sup> Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. <sup>38</sup> Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

<sup>39</sup> Pedroori nojoritia tacatequiaariuhua Jope tiacajinihua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopeeri Pedro shocua rerejoquiaari na nujuquetunuta.

Nojoriiri Pedro niquitijioquiaari Dorcas cusupenuusano toqueya, cacojoquiyanio. Cunoori quiquiaari na cusupenuusano saminio na quishacarijia. <sup>40</sup> Pedroori jiyacari puetunujuanaa pueya tohuatanijioquiaari sohuacamaji. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. <sup>41</sup> Pedroori na juaashiquiajiniji na quiaquiaari. Na nujuatereeri. Na nuhuaji sequiquiaari Jesuucua tiuunaa pueyari, mashiquiopenio:

—Miji pueyanaa, ñia nimia!

Nojori tiuquitasacari, saaja maaji niquitiushii nujuanoori, tariucua saminio. <sup>42</sup> Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuquiaari. <sup>43</sup> Pedroori na nuhuaji janiya camueenujuquiaarijiaara Jope tiacajinia. Nojuajaari Simón tiajinia quiriqiaa cuniqui na camueenujusacari. Nio Simónri piiquia casaata shoqueya majeetejua quiquiaari, casaara shipinishocoriquiano shoquejiniji.

## 10

### *Pedro quiasacari Cornelio niquiniuucua*

<sup>1</sup> Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaaquiaari “Italiano”.

<sup>2</sup> Cornelioori Pueyaso secojojua pueyano quiquiaari, mariyata puetunu na tiajinia quiniaatajanaanio. Nojuajaari seetanjuanaa Pueyaso shuquiritiniu panijia quiquiaari. Cornelioori queraatia na cumanecajiniji

niquitiojojua quiquiaari nareyajuhuj, casamiijiuniucua Judiocuaca niquitiojosocoriquiano. Pueyaso secojojua pueyaracaanuuri. <sup>3</sup> Tamonu juuca, tariucua pananu piriuushacari, Cornelioori Pueyaso seru niquiquiaari juhua na maquenujina nocua niyano na tiajina. Na sequeseeri:

—Cornelionaa.

<sup>4</sup> Cornelioori saaja Pueyaso seru shootiaquiaari na shiriiqiniutia. Na nuhuaji na riucuaereeri:

—¿Casaate jiyaniijanaa?

Pueyaso seruuri na sequeree:

—Pueyasoori quia secojosano tojiquiaa. Quia timitiaari capora quia quiniuucua, quia jiitiasanojiniji quia niquitiojosacari nareja casamiijiuniucua pueyara. <sup>5</sup> Naaratej, quia seya quia jiyaramiquiri Jope tiacajinia. Nojori cuaara Simón masuunuucua quiaara. Na sesaari Pedrojuhuj. <sup>6</sup> Nojuajaari na sesaanucua pueyano tiajina quia. Tia camaruuri shoque majeetejojua piiquiajina. Cunoori na poonijosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniuria quiajaniya.

<sup>7</sup> Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaari-jiuhuj. Maninia na jiyaniijia naacujua quiquiaarijiaari-uhuj. <sup>8</sup> Cornelio jiyarosaacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajini-aari.

<sup>9</sup> Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. <sup>10</sup> Nojuajaari jiyacari miaajeriquiaa. Neraari juucua sumatasaariquiaacuaja. Nera sumatusacarijia,

Pueyasoori casaa na niquitiquiaari juhua na maquenujini, na quishacari tia cacojiria. <sup>11</sup> Pedro niquishacari jiyocuacaanu, saaja jiya cajiniocua niquirii riatelyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. <sup>12</sup> Sonaque jiniacuma quiriquiaari puetunu casaajanaa: sacocua, jiyacua rucoojuacanio, jiyocuacaanu jaacuatujuacajuhuj. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. <sup>13</sup> Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriquiano.

<sup>14</sup> Pedroori na riucuaaree:

—¡Maja cua Jiyaniijianaa! ¿Janiyatucua taa miaquere sacuaraatia cua miaquesooni? ¡Cunocujaari tarijia quia sequesano canaa pueresocoriquiano!

<sup>15</sup> Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

<sup>16</sup> Pueyasoori naa pacutejoquiaari sequenu Pedrotej. Na nuhuaji, sonaqueeri tacanitiasaaquiaariuhua jiyocuacaanu. <sup>17</sup> Pedro tacaashacari naa na niqiniucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquijioquiaari, Simón tia na pajetunura. Cornelio pueyari nequesoretariquiaa nucacoji nojori tiuquiniuria Simón tiajinia. <sup>18</sup> Nojoriiri tohuateyaji nacaquiaari:

—¿Niya quiyate Simón jiyanishano pueyano? Na sesaari Pedrojuhuaj.

<sup>19</sup> Pedroori juhuanojuaja niishiriojoriquiaa na niqishanojiniji juhua na maquenujini tia cacojiria. Pueyaso Sohuanuuri jiyacari na sequeree:

—Pedronaa, jiuujianaraca pueya quia pajeya.  
<sup>20</sup> Tariucuaaja. Quia sanerohua. Nojoriicua quia roseyarohua. Quiocua nojoritia quiaarohuajuhuj. Majaari taacanuunu. Janiyacuajaari nojori jiyaramiquiriucuaa quiocuani.

<sup>21</sup> Pedroori Cornelio jiyarosano pueyacua rosequiaari. Nojori sequeseeri:

—Janiyacuaaja nia pajesano pueyanoni. ¿Casaacua nia niyareecuarani?

<sup>22</sup> Nojoriiri na riucuaaree:

—Canaa jiyaniijiaari Romano soldadohua jiyaniijia. Na sesa Cornelio. Nojuajaari canaa jiyarorucuaa quiocuani. Maninia miijia pueyanoori. Jiyaniijia Pueyaso tojjiajaari-uhuj. Puetunu Judioacuajanaari maninia na miiniuucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojini-uria puetunu quia sequesanojuanaa.

<sup>23</sup> Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maqueseajaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaarijaariuhua Jope tiacajinijinio Jesuucua tiuuniaa pueya.

<sup>24</sup> Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupuenaatanio. Cornelioori puetunu nio pueyajanaa masuuquiaari, nojori rerejonura juhuacarijia na tiajinia Pedro tiuquiyaquishacarijia. <sup>25</sup> Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuara mojuquetaquiaariiri juhua Pueyasocuara.

<sup>26</sup> Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

<sup>27</sup> Tiaco na tiuquitasacari, pocoojoriquiaa Pedrotaari. Pedro tiuquishacari, saaja queraatia pueya niquishiiri.  
<sup>28</sup> Pedroori nojori sequereee:

—Taucuacanaa, niaacuajaari niishiya canaari Judiocuacani. Judiocuacaari rootasaaquiaari maja canaa rupuenura taucuaca, maja quenaaja tahue tiajinia canaa tiuquiniuriajuhuaj. Saniniuujia, Pueyasoori quiarijia cua niishitiorucuaa cutara maja cua soonura tamasaca. Taucuacaari maja sacuaraatia quiarijia quiria. <sup>29</sup> Naaratej, cua niishishacari niaari cua masuurucuaa niyara, janiyari ritia canujiyarucuaani cua taacanuyaquiniutia. Cua totureja, ¿casaara nia masuurucuaa janiyani?

<sup>30</sup> Cornelioori na riucuaaree:

—Cuatro juucaari tari shoconujiya. Janiyari jiyacari Pueyaso secojoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricuajaari quiriquiaa, tee pananu tiuyanijia. Cuno pueyano toqueeri shacantuque quiriquiaa. <sup>31</sup> Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niqutiojoquia quia casami casamijiuniucuaani. <sup>32</sup> Naaratej, quia seya quia jiyaramiquiri Jope tiacajinia, cuaara Simón masuunucua quiatuura. Na sesaari Pedrojuhuaj. Nojuajaari na sesaanucua tiajinia quiya, shoniniacu caminia casaqueyaji. Tia camaruuri piiquiajinia shoqueya majeetejonu poonijiojua. Simón Pedro jaara nimia quia tiajinia, quiata pocoojonutaniyari”. Pueyaso seruuri naa cua sequerucuaaqui Simónnaa. <sup>33</sup> Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarijiani, puetunu pajaniyajanaari niya Pueyaso niquiara quiyani. Naa quia pohuatara canaa tojishocoriquiano quiarijia, taa Pueyaso niishitiojorucuaa quiajaniya canaa quia pohuatanuracuajani.

*Pedro pohuatasacari Cornelio tiajinia*

<sup>34</sup> Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rimiájata na niquiniu pajaniya. Majaari nia jiyaniniu Pueyasoori saaja Judiocuacaacua jiaatiaa, Israel pueya nojori quiniuucua. Maja. Nojuajaari tamasaacua jiaatiaajuhuj. <sup>35</sup> Tiquiyocua jiyacajinia Pueyaso secojojua pueya quishacari, nojoriiri Pueyaso jiyanooshano pueya quiyajuhuj, maninia miiijia nojori quishacari. <sup>36</sup> Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quiniuria Jesucristoocua canaa tiuushacari. Nio Jesucristoori puetunu mijiria quiniaa Camarnujuanaa. <sup>37</sup> Tiuquinijiona Juanri Pueyaso rupaa pohuataquiaari pueya tiuquinijiosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajiniajanaano. <sup>38</sup> Niaari niishiyajuhuj, Pueyasoori na Sohuanu niquitioquiaari Jesu, na cumaaca na jitianura. Nojuajaari maninia miiquiaari pueya, tiquiyocua na rucuanesacari. Cusosuhua naatanijiojuaari. Samaruhua camarnu sesosano jeecaquiaarijiaariuhuj. Puetunu naa miiijia maniniajanaari na Que Pueyaso quiniuucua nata. <sup>39</sup> Canaari puetunu na miishanojuanaa niquiquiaarini, puetunu canaa Judiocuaca jiyajiniajanaa, Jerusalén tiacajiniajuhuj. Janiyari seetanujuanaa canaa niquishano pohuataani. Na nuhuaji, pueyari na teetequiaari niyacutesanojinia. Tii na cusojuatquiaariiri. <sup>40</sup> Jiuujianaraca juucajinia, Pueyasoori na samiitianiquiaariuhua. Jiyacaritij, na saquiriojosano pueyacua na mueratereeri. <sup>41</sup> Majaari na muetanu quiquiaari puetunu pueyacuajanaa.

Saaja canaacua muetaquiaariiri, teyano Pueyaso saquiriojoquiaari coteenu tariucuacaanucujani, Jesujiniji pohuatanuuriquiano. Na samiitiasacariuhua, canaari nata miaquenuuquiaari mariyatani. Canaari nata raruuquiaarijiuhuj. <sup>42</sup> Jesu jaara canaa jiyaramiquiquiaari, nojuajaari canaa sequequiaari: “Naa nia pohuatate pueya niquiara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuaj’ ”. <sup>43</sup> Tariucuacaanu pueyara Pueyaso sequesano caminiujiuniaari naa juhuacarijia sequetuquiaari Jesujinijijuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

*Pueyaso Sohuanu tiuquishacari taucuaca jiuujiajinia-juhuaj*

<sup>44</sup> Pedro pohuatasacarijia taucuaca niquiara, Pueyaso Sohuanuuri Pedro tojitianaa taucuacaacua niquiaari, nojori jiuujiajinia na tiuquiniuria. <sup>45</sup> Pueyasooocua tiuuniaa Judiocuacani, Pedrota nijioquiaari Jope tiacajinijini, nojoriiri shiriiquiquiaari Pueyaso niquitiosacari cuno taucuaca na Sohuanu. <sup>46</sup> Cuno taucuacaari nojori niquiara pocooriquiaa tamaatia rupaacajinia. Pueyaso manihuaqueetaturiquiaari. <sup>47</sup> Naaratej, Pedroori sequequiaari:

—Nio pueyari tari jiitiaa Pueyaso Sohuanu noojiajinia, taa pa jiitiaacuaani. Naaratej, nojori cu meta tiuquini-jiosaaria quiarijia. ¿Cantucua nojori tenujure maja na tiuquinijiosaanurani?

<sup>48</sup> Pedroori na nuhuaji sequequiaari cuno taucuaca tiuquinijiosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujurejaara canaata. Maja senota quianuhua.



## 11

*Taucuacajiniji Pedro pohuatasacari Jerusalén tiacajinia*

<sup>1</sup> Jesu jiyaramiquishano pueya, mariyata puetunu Jesuucua tiuuniaa pueyajanaa Judea jiyajinia, nojoriiri naa pohuatasaaquiaariti: “Taucuacanaari Pueyaso rupaacua tiuuriucuaajuhuj”. <sup>2</sup> Nocuaji, Pedro jaara tacatequiaar-  
 iuhua Jerusalén tiacajiniohua, narta Pueyaso pueyari na juaaquiaariuhua. Na juaaniaari taucuaca cararaatiuuquia co miatejonu panijiaa quiquiaari, taucuaca quiniuria seetanujanaa Pueyaso pueya nojoriria. <sup>3</sup> Nojoriiri naa juaaquiaari Pedro:

—¿Casaara quia quiaarucuaa cuno taucuacaacuanii? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhuj! Quia miishanoori maja maninia taa Pueyaso rootaquiaari tariucuaaanucujani.

<sup>4</sup> Pedroori suraatiaja nojori pohuataquiaari puetunu-  
 juanaa tahuajiniji. Coteenu pohuataree na niquishano juhua na maquenujiniaari. Naa sequereeri:

<sup>5</sup> —Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujiniji morojotasano niqiriini. Jiyareta cucujanaa roshinitiasaareeri. <sup>6</sup> Cua niquishacari sonaquejinia cua niishiniuria casaate mii quiriquiaani, janiyari saa puereeta casami niqiriijiaani. Janiyari niqiriini jiyacua rucoajuaca, sacocujuhuj, jiyocua-  
 caanu jaacuatujucanio. Puetunujanaari pa miaquesocoriquiano pa pueresano casaa quiriquiaa. <sup>7</sup> Janiyari jiyacari jiyocuaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. <sup>8</sup> Janiyari saaja na riucaareeni: “¡Maja cua Jiyaniijianaa! ¿Janiyatucua taa miaquere sacuaraatia cua miaquesooni?” <sup>9</sup> Jiyocuaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. <sup>10</sup> Pueyasoori

naa pacutejocanu sequenu juucua janiyatej. Na nuhuaji, sonaque tacanitiarohua jiyocuacaanuuri. <sup>11</sup> Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiqianu, na pajenuunura janiya. <sup>12</sup> Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuunu. Majaari tahua soonu nojori quia rupuesacari”. Naa cua tojiniuucuatej, janiyari cunora juhuajaniya nojoritia quiaarucuaani. Nio seis parta Jesuucua tiuuniaa pueyari cuata quiojyarucuaa-juhuaj. Canaari mariyata cuno tahua tiajinia tiuquishiini. <sup>13</sup> Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuaj. <sup>14</sup> Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuj”. <sup>15</sup> Saaja cua coteesacari Pueyaso rupaa pohuatanu nojori niquiara, Pueyaso Sohuanuuri nojoriicua niquianu, taa pocua coteenujuanaa na niquianucujani. <sup>16</sup> Janiyari jiyacari niishiquii pa Jiyaniijia sequesanonni. Naa na sequesanotej: “Juanri moojinia tiuquinijia pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria”. <sup>17</sup> Naacuajitij, taucuaa tiuushacari pa Jiyaniijiaacua, Pueyasoori na Sohuanu niquitiorucuaa nojorijihuj, taa na niquitioanu pajaniyacuaani. Cante Jesucristoocua tiuyani, Pueyasoori na Sohuanu na niquitioya. ¿Janiyatucua taa Pueyaso sequereruhuarini: “Maja cuno pojori niquitionu quia Sohuanu”?

<sup>18</sup> Jerusalén tiacajinia quiniaa Pueyaso pueya jaara tojiquiaari na Pedro sequesanotej, nojoriiri sanaajetaquiaari. Tama nojorijiaarijia Pueyaso maniniuhuaque-

etaquiaari. Naa sequetuquiaariiri:

—¡Pueyasojuhuanaja jiyanohua maninia! Nojuajaari taucuaca panijajuhuj nojori tacatonura noojia sesa nojori miishanojiniji, jiyanooshano nojori quiniurijuhuj, pueyaracaanu nojori rishiniuria Pueyasota.

*Antioquiya tiacajinia Jesu pueyajiniji pohuatasano*

<sup>19</sup> Esteban jaara mosaaquiaaricuaa, Judiocuacaari juhuacatecara Jesuucua tiuuniaa miiquiaari naquiyajuhuj. Queraatia Jesuucua tiuuniaa pueyari nocuaji mashiyocuatquiaari. Nojoriiri tiquiyocua niaquejoquiaari. Noojiaqueyari na mashiyocuatuseri tiuquijioquiaari Fenicia jiyajinia. Tamasacaari tiuquijioquiaari Chipre jiyajinia. Noojiaqueyari Antioquiya tiacajinia tiuquijioquiaarijuhuj. Nojoriiri tii pohuatanuuquiaari Pueyaso rupaa Jesujiniji saa Judiocuacaraja, maja taucuacura. <sup>20</sup> Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquijioquiaari Antioquiya tiacajinia, nojoriiri Jesujiniji pohuataquiaari Griegohua niqiarajuhuj. <sup>21</sup> Jiyaniijia Jesu cumaacaari nojoritia quiquiaarijuhuj. Naacuajitij, queraatia Griegohuari tariucuacaanu tama nojori niishishanojuaaja cartequiaari, Jiyaniijia Jesu tojijiaca nojori quiniuria.

<sup>22</sup> Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuchiaari Antioquiya tiacajinia. <sup>23</sup> Bernabé jaara tiuquiquiaari nojoriicua, nojuajaari jiyanohua shuquiriquiaari na niquishacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijia nia quiri.

<sup>24</sup> Bernabeeri jiyano hua maninia pueyano quiquiaari. Pueyaso Sohuanuuri noojia cumaquiquiaari jiyano hua. Naacuajitij, na pahuatasacari Jesujiniji, queraatia pueyari Jiyaniijaacua tiuuquiaari.

<sup>25</sup> Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiy-  
ataquiaari Antioquiya tiacajiniaari. <sup>26</sup> Nojori quishacari  
Pueyaso pueyata cuno tiacajinia, nojoriiri tii shocote-  
quiaari niquiriyatu marijia. Nojoriiri queraatia Pueyaso  
pueya niishitiojonuuquiaari. Tii Antioquiya tiacajini-  
ani, Jesuucua tiuunaa pueyari coteenu sesojosaaquiaari  
“Cristiano”. Niiori pueyano rupajinia sequeshiya  
“Cristo tojiniaa pueya”.

<sup>27</sup> Cuno quishacari, Jerusalén tiacajiniji Pueyaso  
sequenu panishano caminiujiunaa pueyari  
tiuquijioquiaari Antioquiya tiacajinia. <sup>28</sup> Tamonu  
nojorijinijinioni, na sesa quiquiaari Ágabo. Nojuajaari  
Jesuucua tiuunaa pueya rerejonaa tajiniji nujuaquiaari  
pocuanura. Naa caminiujiuquiaari Pueyaso Sohuanu  
niishitiosano nojuajaari:

—¡Pueyanaa, puetunu pa jiyacajiniajanaani, miaajenu-  
uri quiniutianiya!

Seetanujuanaa sequequiaariiri Ágabo. Cuno miaajenu-  
uri quiquiaari Claudio quishacari jiyaniijajanaa, César-  
tuhaj. Nojuajaari Roma tiacajiniji jiitiaquiaari puetunu  
jiyacajanaa. <sup>29</sup> Antioquiya tiacajinia quiniaa Pueyaso  
pueya tojishacari naa Ágabo sequesantej, nojoriiri se-  
quequiaari:

—¡Judea jiyajinia quiniaa parta Pueyaso pueya pa  
naacure!

Nojoriiri naa miiquiaari. Naaratej, cante queraatia  
cumaneeca jiitiaquiaarini, nojoriiri queraatia niqutio-  
quiaari. Saniniuujia, cante maja puera cumaneecaraca

quiquiaarini, nojoriiri secaja niqutioquiaari na jiitiasano-jiniji. <sup>30</sup> Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiitianaa niqutioquiaari saniniuuja Judea jiyajinia.

## 12

*Jacobo nacatasaanujiniji pohuatasano, Pedro nujuate-saanujinijinio*

<sup>1</sup> Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiuunaa miiquiaari naquiya. Noojiaqueya quiotequiaari na saniitiosocoriquiano nujuatejojuajiniaari. <sup>2</sup> Naa Juan tarajanu Santiago motequiaaricuaajaari nijiniaquetucuja mueruuta. <sup>3</sup> Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. <sup>4</sup> Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoreesocoriquiano puetunu quiniqi quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootooquiaariiri; coteenu cuatro, na nuhuaji socua cuatro. Nojoriiri naa sanitijiootooquiaaritij. <sup>5</sup> Pedroori maninia cojuasaaquiaari nujuatejojuajinia. Jiyacaritij, Jesuucua tiuunaa pueyari saniniuuja nocuara secojonuuriquiaa jiyanoehua, Pueyaso naacunura Pedro.

*Pueyaso mashiquishacari Pedro nujuatejojuajiniji*

<sup>6</sup> Cuno niucujani, na juhuaqueyaquishacarijia, quera Herodes tohuatesee tariquiicujaji Pedroni, na nequesoresocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojua tohuateyaji cojuariquiaacujua. <sup>7</sup> Jiyacaritij, Pueyaso seruuri canashiyaquiji coretaquiaari jiyareta Pedro shuriucujajanaa nujuatejojua jiniacuma. Na shacantuucaari jiyanoehua cuhuataquiaari nujuatejojua. Pueyaso seruuri Pedro jiuuquirii na shuucujaji. Na niucujareeri. Na niucuasacari, na sequereeri:

—¡Ritia quia sanere!

Cumayocuaari tamajaaja saacarejetaquiaari Pedro numatucuaacujaji. <sup>8</sup> Pueyaso seruuri na sequereejuhujaj:

—¡Quia cajiniocua camarucujua quia saatiri socua!  
¡Quia sapatu quia cushirijihuhujaj!

Pedro jaara naa miiquiaari puetunu na sequesanojua-naa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu.  
¡Quiocua cua nuhuajaji rupaashijia!

<sup>9</sup> Pedroori ritia Pueyaso seruuri nuhuajaji sacuariquiaa-jaa. Jiyanoehua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jiyaniriquiaa na maquenujiniia niquiya naasucua. <sup>10</sup> Nojoriiri coteenu shocomaa na tacoji cojuanaa soldadohua. Socua na tacoji cojuanaa tajitiumiaajaariuhujaj. Naa quenaacoturee nujuatejojua tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa

sapuenjuuara tiaca jiuujiaaco. Na nuhuaji, na shuriucujaji shaajequeeri. <sup>11</sup> Pedroori jiyacari shusha niishiquii. Naa sequereeri:

—¡Seetanujuanaaqui quiriquiaa! ¡Cua Jiyaniijiaquiiri na seru jiyaroree cucua, na mashiquiniuria janiya Herodescujaji, cuarta Judiocuacaacuajjiuhuj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

<sup>12</sup> Nojuajaari naa na niishiriojonuta María tiajinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuj. Cuno tiajinia, queraatia Pueyaso pueyari Pedrocuara tii secojonuuriquiaa jiyacari. <sup>13</sup> Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante quiriquiaani. <sup>14</sup> Nojuajaari saaja Pedro tojishii tia camaru jiyaniquiyano, na tiootiu na riatanura nocujaji. Niyacoo tojishacari seetanujuanaa Pedro rupaa, majaari tiootiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajaqui nooj, tohuateyaji nujuaatej!

<sup>15</sup> Pueyari saa niyacoo riucuaquiaarijia:

—¿Quiaate paateya? Teyano Pedrote njuatesaarucuaacuajani.

Niyacoori nojori sequenu pacutequiaariuhua:

—¡Taaquiriirinij! ¡Pedrocuaaquiniatejaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaajaja.

<sup>16</sup> Nojori nacojosacari tiaco, Pedroori tohuateyaji piquijioriquiaajaa. Tiootiu jaara socua riatasaaquiaari,

nojuacuajaari quiriquiaa. Pueyari na niquishacari shiri-  
iquitiuquiaari. <sup>17</sup> Pedroori nojori sanaajaree jiyacari na  
juaashiquiata. Cuniqi quiniaa pohuatareeri taa Pueyaso  
tohuaterohua nojuaja nujuatejojuajinjini. Pedroori naa  
sequequiaari nojoritij:

—Niocua naa pohuatare Santiagojuhuaj, parta Jesuu-  
cua tiuuniaanio.

Na nuhuaji, Pedroori tiji tohuatacuhua. Tamaqui  
quiaareeri.

<sup>18</sup> Jaara juhuaquequiaari, nujuatejojuajinia cojuanaa  
soldadohuari jiyanoehua shiriiquitiuquiaari. Majaari no-  
jori niishiniu quiquiaari taa Pedro miirii nujuatejojuajiniji  
nojori tajinjini. Tama nojorijaarijia naa sequetuquiaari  
na puerenuta:

—¡Pa jiyaniijia Herodesri quiarijia pa puecoonutaniya,  
maninia pa cojuaaquiniuucua Pedro!

<sup>19</sup> Herodes niishishacari, na shuriucua nujuatunaa  
soldadohua jiyaroquiaariiri nujuatejojuajinia nojori pa-  
jenura Pedro. Nojori jaara na riuriataaquiquiaari,  
Herodesri nujuatejojuajinia Pedro cojuanaa soldadohua  
nequesoreequiaari na juaaniutia, na niishiniuria juucua  
taa Pedro juurequeree nojori shuriucujini. Na nuhuaji,  
Herodesri jiyanoehua na juaaniutia na shuriucua nujuatu-  
naa soldadohua sequequiaari, nojori puecoonura narta  
soldadohua, nojori cojuaaquiniuucua maninia Pedro nu-  
juatejojuajinia. Naa na miiniu nuhuajitij, Herodesri Judea  
jiyajiniji pacuquiaari. Cesareya tiacajinia quishiiri.

### *Herodes shaajenujiniji pohuatasano*

<sup>20</sup> Jiyacaritij, Herodesri jiyanoehua juaariquiaa Tiro tia-  
cajinia quiniaa pueyata, Sidón tiacajinia quiniaatanio. Nio  
caapiqui tiacajinjinio pueyari jiyaniijia Herodes tiajinia  
quiojoquiaari nata nojori pocoojonura juucua. Majaari



cuno juuca nojori pocoojonu quirii jiyaniijia Herodesta. Nocuaji, nojoriiri Herodes seru sequere:

—Quiocua quia jiyaniijia sequere, canaa nata jiyanootoonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijaariuhuj. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na miaquesocoriquiano jiyaniijia Herodes jiiitasano pueyajiniji. Nojoriiri jiyamitia jecatoonu paniriquiaa cuno jiyaniijiata, maninia nojori quiniuhuara nata, Herodes niqutiojotenuhuara na jiiitasano pueya na miajajaura Sidón tiacajinijinio pueya, Tiro tiacajinijinio pueyano. <sup>21</sup> Herodes seruuri nojori sequequiaariuhua:

—Niocuana tamonu juuca nimia, jiyaniijiata nia pocoojonura.

Na nuhuaji, cuno pueyari na sequesano juucajinia niqiaariuhua. Jiyaniijia Herodesri nojoriicuaji maniniushiquiaari. Na maniniuqui toque cushiquiaariiri. Jiyaniijaacuajinio shipinishano cajitiujinia cajiriohuari. Tiji pocuaquiaari cuno pueyacuaari. <sup>22</sup> Puetunu cuniqui quiniaa pueya tojishacari naa maninia Herodes pocuaano nojori niqiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

<sup>23</sup> Pueya sequesacari naa Herodestej, nojuajaari juhua shuquiuriosaaquiaari sajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

<sup>24</sup> Pueyaso rupaari saniniuujia socua niyacasaaquiaari, tiqiyocua pohuatasacari puetunu pueya niqiarajanaa. Naacuajitij, Pueyasocua tiuunias pueyari socua quer-aatiara canequiaarjiuhuj. <sup>25</sup> Bernabé, Saulonio, nojori jaara niqitioquiaari cumaneeca Jerusalén tiacajinia Pueyaso pueya jiitanaa, nojoriiri ritia quiojoquiaariuhua Antioquiya tiacajiniohua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarjiuhuj Marco.

## 13

*Saulo Bernabeeta rucuanefonu coteesacari Jesujiniji pohu-  
atanura tiqiyocua*

<sup>1</sup> Antioquiya tiacajinia Jesuucua tiuunias pueyajinijini, noojiaqueyari quiquiaari Pueyaso sequenu panishano Pueyaso pueyara caminiuujunias. Quiquiaarijiaariuhua Pueyaso Rupaa niishitiojonaa. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiaariuhua Manaén. Nojuajaari mariyata Galilea jiyajinia jiyaniijiarano Herodesta canashitijosaaquiaari. Quiquiaarijiaariuhua Saulo. <sup>2</sup> Tamonu juuca, puetunu nojorijianaari Pueyaso secojonuuriquiaa. Cuno juucajuhuj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanucujani.

<sup>3</sup> Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanohuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori

jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanoehua Pueyaso Sohuanu cumaacata.

*Jesujiniji pohuatasacari Chipre jiyajinia*

<sup>4</sup> Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiaara nucuaco Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuuca buquejini Chipre jiyanihano jiyajiniara. Chipre jiyari jiya tucuaatiaja, shoniniacu caminia jiuujiajini. <sup>5</sup> Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajiniaqueyajanaari. Juanri nojoritia quiriquiaajuhuj, nojori naacuriquiano. <sup>6</sup> Naa nojori rucoojosacari Pueyaso rupaa pohuatanura Chipre jiya tucuaatiajaacuatej, socua tiuquijioseequiaari Pafos tiacajiniara Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacujaja Pueyaso sequenu panishano caminiujiunia pajaniyarani”.

<sup>7</sup> Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanoehua niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja. <sup>8</sup> Cuno shimiacu sesaari Griego rupaajinia sequesaaquiaari Elimas. Nojuajaari saaja cuno jiyaniijia niquiara cuaracashitiquiaari Pueyaso rupaa. Naa sequeree cuno jiyaniijiaari:

—Maja cuno pojori tojiniu. Jiyanoehua sesaari nojori pohuatasano. Quia sapojotiuyano.

<sup>9</sup> Saulo sesaari Pablo quiquiaarijiuhuj. Jiyacari, Pueyaso Sohuanu cumaquishacari nojuaja, Pabloori jiyanoehua shitimia shimiacu jiquioco shootiaree naa na sequesacari nojuaja:

<sup>10</sup> —¡Sesaaca niyanu sequenaa! ¡Maninia miijiaca paracaajianaa! ¿Casaara pueya quia tenujiya Pueya-soocuajini? <sup>11</sup> ¡Cua Jiyaniijaari quiarijia quia saniitionutaniya! ¡Quiaari cariojuarura quiniutianiya seetanujua-naa! ¡Quiaari pasaja tarishiniutianiya cariojuaru quia quishacari!

Jiyacaritij, juhua niniquiaari na namijajinia cajimaa. Cariojuarura quiqiiri. Juhua ninishiqui quiaquejoquiaari puetunu cunocojuanaari, na juaashiquiajiniji na jaatucusaanura juucua. <sup>12</sup> Cuno jiyaniija jaara naa niqiquiaaritij, Pueyasocua tiuuriiri na niqiuara nojori pohuatasacari shanohua Jiyaniija Jesujiniji.

*Pablo, Bernabé quishacari Antioquiya tiacajinia, Pisidia jiyajinia*

<sup>13</sup> Pabloori na cojiniaata Pafos tiacajiniji quiaquiaari buquejinia Perge tiacajiniara, Panfilia jiyajinia. Juanri Perge tiacajinia cateseequiaari nojoriicujaji. Tiji riujiu-uquiaariuhua Jerusalén tiacajiniohuari. <sup>14</sup> Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujua tiajinia. Na tiuquishacari, cajitiushiiri. <sup>15</sup> Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujiuniaa naajiotasanoori serojosaaquiaarijiuhuj. Na nuhuaji, rerejovia tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiarijia niya quiniaa niquiara.

<sup>16</sup> Pabloori sanequiaari. Na juaashiquiata sanaajaree pueyari. Naa nojori sequereeri:

—Nia tojitiare cuarta Israel pueyanaa, nijaniyajuhuj, canapute Pueyaso tojitiajacacuajani tamasaca pueya-puejinijinio. <sup>17</sup> Paari sequequiaani: “Pueyasoori pa Jiyaniijia, Israel pueya pa quiniuucua”. Seetanujuaanaa, paacujaari Pueyaso saquiriojosano pueyacuajinioni. Tariucuacaanu, Pueyasoori maniniushiquiari pa supuetanaa saquiriojoquiaari na pueyara quiriqiano. Na nuhuaji, jyanohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiaria cuno jiyajiniji na cumaacata. <sup>18</sup> Cuarenta marijiaari pa supuetanaa shoconujuquiaari pueyaracaanu nojori rucoojosacari najuhuaa cariiquia jiyajinia. Pueyasoori jiyacari nojori rejeretaquiaari na tojitiaaquishacari nojuaja. <sup>19</sup> Na nuhuaji, Pueyaso cumaacata, siete tamaatiuucua rupaa pocuajaca taucuacaari puecoosaaquiaari Canaán jiyajiniji, saniniuujia cuno jiya na niqitiosocoriquiano pa supuetanaa. <sup>20</sup> Pa supuetanaa jaara Canaán jiya camaruhua quiquiaari tari, socua cutrociento cincuenta marijiaari nojori shoconujuquiaari saaja nequesoreenaa jiitiasacari nojori. Na nuhuaji Samuelri nojori nequesoreenara jiyatesaaquiaarijiuhuj. Nojuajaari Pueyaso sequesano caminiuujunia quiquiaarijiuhuj. <sup>21</sup> Samuel quishacarijia, pa supuetanaari Pueyaso secojonuuquiaari na panitiushacari jiyaniijia, nojori jiitariquiano nequesoreenaa niti. Naacuajitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niquiohuacuajinio supueno pueyano. Saúlri nareja cuarenta marijia shocotejoquiaari pa supuetanaa jiyaniijia na quishacari. <sup>22</sup> Na nuhuaji,

Pueyasoori Saúl soojotaquiaariuhua Saúl tojiyaquiniuu-cua nojuaja. Saúl niti David jiyatequiaariuhua Israel pueya jiyaniijjara saniniuurijia. Pueyasoori naa sequequiaari Davidjiniji, na timitiasacari nojuaja:

“Isaí niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

<sup>23</sup> Quiari naataja, Pueyasoori na sequesano tohuatequiaari na mueratesacari pocuaji Tacuna. Nojuajaari Jesu, David niquiohuacuajinio supuenoni. Pueyasoori na seerataquiaari Israel pueyacuaji Tacuna quiriquiano, taa na sequequiaari tariucuacaanucujani.

<sup>24</sup> Jesu coteyaquishacarijia rucuanenu na Quejiniji pahuatanura, Tiuquinijiona Juanri coteenu nocuaji pahuataquiaari Pueyasojiniji puetunu Israel pueya niquiarajanaa. Tiuquinijiona Juanri nojori sequequiaari noojia nojori tacatonuhua Pueyasooocua, naajuhuj, moojinia nojori tiuquinijiosaanura, Pueyaso tojjijara nojori quiniuria. <sup>25</sup> Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosanoni taa nia jiyaniquiaa najuhuaana janiyacujani. Na Jiyarosano cutaraari cua nuhuaji niniutianiya. Nojuajaari seetanujanaa Jiyaniijajanaa cutara. Janiya maara jiyanohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

<sup>26</sup> ‘Cuarta pueyanaa, nijaniya cante Abraham niquiohuacuajinio pueyacuajani, cua tojitiare, nijaniyajuhuj taucuacanaa, canapueete Pueyaso tojjiacacuajani. Niaara-noori nio maninia rupaa Pueyasojiniji, nia jiyanooshaanura sesa nia miishanojiniji. <sup>27</sup> Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaarijihuaj Pueyaso sequesano camini-

ujiunaa naajiotasano tariucuacaanu. Cunoori najuhuana nojori serojonuusano puetunu samaatenu juucajanaa. Naacuajitij, nojori jaara moquiaari Jesu, maninia tohu-atequiaariiri Pueyaso sequesano caminiujiunaa naajiotasano, taa Jesujiniji sequesaaquiaari tariucuacaanucua-jani. <sup>28</sup> Jesuuri seetanujuanaa maja na miiniu quiquiaari sesa. Tama nojorijiaaritia juhua sesa miijiara na jiy-atequiaari cutara. Naacuajitij, Pilato sequetuquiaariiri cuara na moteeranoj. <sup>29</sup> Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupaajiniacuajani, na roshinitiuquiaari niyacutesano-jinijiiri. Raaco na niatureeri. <sup>30</sup> Naajaa, macu na quishacari, Pueyasoori saaja na samiitianiquiaariuhua. <sup>31</sup> Na samiitanu nuhuaji, Jesuuri sequeyarucua na puey-acua mueranacujuquiaari, noo pojoriicua canapue te na tarajaquiaari na quiasacari Galilea jiyajiniji Jerusalén tia-cajiniaracuajani. Nojoricuajaari quiaritia nojuajiniji poo-jotaniuhua puetunu pueya niqiarajanaa.

<sup>32</sup> 'Canaari timiyani canaa pohuatasacari nijaniya, ¡Pueyaso pohuatasano pa supuetanaari tari tohuateecanu! ¡Pocuaji Tacunacuajaari tari miiquianu puetunu pa jiyanooshaanurajanaa! <sup>33</sup> Seetanujuanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacuajinio pa quiniuucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia:

“Quiaari cua Niyanucuaja. Janiyari quiaritia quia sami-itaniriini”.

<sup>34</sup> Pueyasocuajaari sequequiaari, nojuacuajaari na sami-itaniniutianiuhua na moqueyaquiniuucuaaji na raaco. Nioori naajiotasano quiyajuhuj tariucuacaanu Pueyaso

Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcuajani”.

<sup>35</sup> Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

<sup>36</sup> Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijianaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujuanaa moquequiaari cutara. <sup>37</sup> Noo Jesu saniniuujia, Pueyaso cutaraari na samiitiani quiaariuhua. Majaari na moquenu quiquiaari cutara. <sup>38</sup> Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. <sup>39</sup> Moisés Rootasanojinia, paari tariucuacaanu niishitiojosaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapuate Jesuucua tiuya saniniunijia, nojoriiri puetunu sesa na miishanojinijijianaa jiyanooshiya. <sup>40</sup> Niaa cutaraari cocuaatia miiniutianiya pueyanaa, nia jaara cua pohuatasano ruretare. Pueyasoori na tojiyashijiaca saniitionutaniya taa tariucuacaanu Pueyaso sequesano caminiujiunიაa sequequiaaricujani. Naa sequetuquiaariiri:

<sup>41</sup> “Nia tojitiare, rerequetejacanaa. Niaari jiuujiatentaniya najuhuanaj. Na nuhuaji, niaari shaaajaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyani. Tamasaca jaara nia pohuatare, niaari saaja na cuaracashitiniutianiya”.



<sup>42</sup> Na nuhuaji, Pabloori narta Judiocuaca rerejua tiajiniji tohuaretaquiaariuhua na cojiniaata. Taucuacaari tii quiriquiaajuhuj. Nio taucuacaari Judiocuacaacia pacunaa quiquiaari, Judiocuaca nojori quiniuriajuhuaj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábadu canaa pohuatareeruhuj, socua canaa tojiniuria Jesujiniji.

<sup>43</sup> Nojori quiojosacariuhua Judiocuaca rerejua tiajiniji, queraatia narta Judiocuacaari nojori nuhuajiquiaari, queraatia taucujajinijinio Judiocuacaacia pacunaanio. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta na rootaquiaari nojori:

—Saaja Pueyasoocua tiuujiaa nia quiri. Majaari nocuaji taacanuunu. Nojuacuajaari pa cumaquijia.

<sup>44</sup> Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniucua rerejoquiaari. <sup>45</sup> Judiocuaca secojojua tia camarucua jaara niquiquiaari queraatia pueya na rerejojuajinia mishiyano, Pablo pohuatasano na tojitianura, nojoriiri juaaquiocuaari. Nojoriiri tama sequetooquiaari-ijiaaja:

—Puetunu pueyajanaari cuno pojori tojitiaacara quiniutianiya. Pa tojiyaquiniutianiya saniniuurijia.

Naa sequeturiquiaa pueya niquiara Pablojinijiaari-uhuj:

—¡Pabloori maja maninia na niishiniu Pueyaso rupaa! ¡Najuhuaana sesa pohuataano! ¡Nojuajaari niishiyashijia!

<sup>46</sup> Pabloori saaja Bernabeeta sequequiaari na puereyaquiniutia:

—Maniniacuajaqui, cuarta Judiocuacanaa. Canaacua-jaari naa panitiaja nijaniyatej, Pueyaso rupaa canaa co-teetanura pohuatanu nijaniya, Pueyaso saquiriojosano

Judiocuaca nia quiniuucua. Niaacuajaari saa na ruuretareejaa. ¡Majaquiiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuuja taucuacaacua quianutaniyani, Pueyaso rupaa canaa pohuatanura nojori niqiara. <sup>47</sup> Canaa Jiyaniijia jaara canaa jiyaramiquiiaari, nojuajaari naa canaa sequequiaariti: “Quia jiyatequiaari mijiria cuhuatariquianonijia. Quia pohuatasano janiyajiniijiri caminiujiushaanutaniya taucuaca niqiara puetunu jiya puequeetujiniajanaa, Pueyaso jiyanooniuria nojoriujiuhaj”.

<sup>48</sup> Cuniqi quiniaa taucuaca jaara naa tojqiaari sequeshiyanotej, nojoriiri shuquiriquiaari. Pueyaso rupaa maniniuhaqueetareeri. Sequetteeri:

—¡Jiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuaaanu na pueyara quiriquianocuajani, pueyaracaanu nata rishiniuriacuajani, jiyacariti, nojoriiri Jesuucua tiuquiaari. <sup>49</sup> Jiyaniijia rupaari pohuatasaaquiaari puetunu cuno jiyajiniajanaa. <sup>50</sup> Judiocuacaari na juaaniutia Pueyaso panijia maajipohua shiniujuquiaari na cojitiuniuria nojori, nojori miiniuria naqiya Pablo, Bernabeenio. Naa rootatuquiaari cuno tiacajiniji camarucujaaariuhaj, mariyata cuno jiyajiniji nojori taanunura Pablo, Bernabeenio. <sup>51</sup> Naaratej, na nuhuajiria, Pablo, Bernabeenio, nojoriiri na niohuacajiniji seseera pijionuutaquiaari. Naacuajiti, Antioquiya tiacajinia quiniaa pueyari niishiquiaari, Pueyaso saniitiosacari nojori, majaari nojori Pabloocua, Bernabeecua na tiutianu quiniutianiya Pueyaso jiyanoaquisacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. <sup>52</sup> Jesuucua tiunuaa pueyari saniniuuja shuquiriaatia jatequiaari Antioquiya tiacajinia, nojori jiiitiasacari Pueyaso Sohanu.

## 14

*Pablo, Bernabé quishacari Iconio tiacajinia*

<sup>1</sup> Pablo, Bernabeeta naa miiquiaarijuhua Iconio tiacajinia. Nojoriiri narta Judiocuaca rerejojua tiajinia tiuquitiaquiaari. Nojoriiri tii pohuataquiaari Jesujiniji puetunu nojori niqiarajanaa. Queraatia pueyari Jesuucua tiuquiaari, Judiocuaca, taucucanio.

<sup>2</sup> Noojiaqueya Judiocuacajinijinoori maja na tojiniu paniniu quiquiaari Jesujiniji pohuatasano. Cuno pojoriiri taucucaca shiniujuquiaari nojori juaniuria Jesuucua tiuunaa pueya.

<sup>3</sup> Pabloori, Bernabeeta cunora socua jiyojequiaari pueyaracaanu cuniqui, Jesuucua tiuunaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujuanaa, Jiyaniijaaari nojori naacuquiaari jiyanoehua cutara maninia miishano nojori miiniuria, pueya naatanijionurajuhuj. Jiyaniijaaari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano.

<sup>4</sup> Cuno tiacajinia quiniaa pueyari raqitiiquiaari. Noojiaqueyari tama narta Judiocuaca tojiquiaarijiaaja. Saniniuujia, tamasaari Jesu jiyaramiquishano pueya tojijara quiquiaari. Nojoriiri naa quiquiaari cuno tiacajinia.

<sup>5</sup> Naa nojori quishacaritij, Judiocuacaari taucucata roojotooquiaari cuno tiacajinia jiyaniijianucuata. Naa roojotooquiaariiri nojori sesacanura Pablo, Bernabeenio, na jacutunura saitiajuhuaj.

<sup>6</sup> Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatuuquiaariiri Licaonia jiyajiniara. Nojoriiri Litra tiacajinia quiojoquiaari, Derbe tiacajiniaranio, cuno caapiqui tiaca shocua quijiaca tiacajiniajuhuaj.

<sup>7</sup> Nojoriiri tii poojotaquiaari Jesujiniji nojori niishishano.

*Litra tiacajinia pueya jacutusacari Pablo saitia*

<sup>8</sup> Litra tiacajinia quiquiaariiri sesarunocua pueyano. Majaari na rucuanenu quijia. Nojuajaari na rasaaquiaar-ijuhuanajaj. Majaari na pooniniu quijia na cajitiujiniji.

<sup>9</sup> Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri no-juajaari seetanujuanaa tiuriquiaa na pohuatasanoocua. Naa Jesuucua na tiuuniuucatej, Pabloori niishirii cuno pueyano na naata na cashacu jeequenuhua. <sup>10</sup> Pabloori jiyamitia jiyanohua na sequere:

—¡Maninia quia nujuare! ¡Maja porequetanu!

Cuno pueyanoori ritia sanequee. Rucuanenu saniri-iri. <sup>11</sup> Cuno Licaonia pueya jaara niquitiuquiaari naa Pablo miishanotej, nojoriiri tama na rupaajiniajaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niquishano!

<sup>12</sup> Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajiniajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanohua pocuanu niishijia na quiniu-ucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiiitasano juhua na pueyasohuara cuno jiyajinia.

<sup>13</sup> Júpiter secojojua tiaari Litra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuquiaari, Pabloocuara nojori puecoosocoriquiano Bernabeecuaranio, juhua nojori pueyaso-huacuara. Maniniushitiajara naana shuucua shiyosano patootaquiaarijiaariuhuj. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriicuara juhua Pueya-soocuara. <sup>14</sup> Pablo, Bernabé jaara niquiquiaari naa cuno

pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaariiri nojori miiniu panishano nojori tarinitia-nura. Pabloori naa nacaquiaari puetunu cuno pueya tojishocoriquianojuanaa:

<sup>15</sup> —¡Pueyanaa! ¿Casaara naa nia miya canaani? ¡Canaari nareja pueyani taa nijaniyacuaani! ¡Canaari naacua niyarucuaa niaacuatej canaa sequenura nia-janiya, puetunu nio najuhuana nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. <sup>16</sup> Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. <sup>17</sup> Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniuriajuhuaj.

<sup>18</sup> Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuara na puecoonu panishano juyaca.

<sup>19</sup> Jiyacaritij, Antioquiya tiacajinijinio Judiocuacaari tii tiuquiiijoseequiaari, Iconio tiacajinijinionio. Nojoriiri cuniqui quiniaa nasojoosee Pabloocuara, Bernabeecuaranio. Cuniqui jacuturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiquiaari tiacajiniji tama-maari. <sup>20</sup> Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

<sup>21</sup> Jaara Jesujiniji pohuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujiuutiaquiaariuhua. Tiuquiiioquiaariuhuari Lистра tiacajinia, Iconio tiacajinia, Antioquiya tiacajinianio.

<sup>22</sup> Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuate Pueyaso shuriucua quiriquianoni, nojoriiri naquiya miiniutianiya mijiria.

<sup>23</sup> Nojoriiri maninia Pueyaso tojjiaaca pueya saquiriojotuquiaari, nojori jiyatesocoriquiano Pueyaso pueya jiitariquiano. Naa miituuquiaari puetunu cuno tiacajiniajanaanari, Pueyaso pueya jiitianura tama nojori nacasunaa-jaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocua:

—Canaa Jiyaniijianaa, nio pueya quiocua tiuujiacani, nojori quia naacure quiocua tiuunaa narta pueya nojori jiitianura maninia.

*Pablo tacatesacariuhua Bernabeeta Siria jiyajinia Antioquiya tiacajiniara*

<sup>24</sup> Nojori riujiuuniuhuara Antioquiya tiacajiniohuara, Pisidia jiya shocotumohuari. Na nuhuaji, tiuquiiioquiaariuhua Panfilia jiyajiniaari. <sup>25</sup> Tii Pueyaso rupaa pohuatuquiaari Perge tiacajiniaari cuno pueya niquiara. Nojori pohuatanu nuhuaji, Atalia tiacajinia quiojoquiaarijiaariuhua. <sup>26</sup> Cuniqiji, buquejina jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacujani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuacaanu nojori quiojonura Pueyaso rupaa nojori pohuatanura taucuaca. Cunoori quiquiaari shushajanaa nojori coteenu panishacari rucuanefonu tamaquiicua.

Naacujitij, nojori tohuateenu nuhuaji puetunu Pueyaso panishanojuanaa, jiyacari shusha tiuquijiori quiohuari. <sup>27</sup> Antioquiya tiacajinia nojori quishacari tari, nojori-iri puetunu Jesuucua tiuunia pueya masuunujuquiaari-jiana. Cuniqiu pohuataturee puetunu nojori niquiara-janaari, taa Pueyaso naacucanu maninia nojori pohu-atasacari Jesujinijini. Pohuatanuuquiaarijiaariuhuj taa Pueyaso taraajetequiaari taucuaca jiuujiani, Jesuucua nojori tiuuniuriajuhuj. <sup>28</sup> Pabloori, Bernabeeta cuniqiu tarishiquiaarijiaara narta Jesuucua tiuuniaata.

## 15

### *Jesuucua tiuuniaa jiiitanaa nacoosacari Jerusalén tiacajinia*

<sup>1</sup> Jiyacaritij, Judea jiyajinijinio pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqiu quiniaa Jesuucua tiuuniaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—¡Pueyanaa, Jesuucua tiuuniaa pueya cuara na cararaatiuuquia co miatejoteera, taa Moisés niishitiojoquiaaricujani! ¡Jaara miatesoo quiri, majaari Pueyaso jiyanooni quiniutianiya jiyanotej, na pueya nojori quiniuria!

<sup>2</sup> Pablo, Bernabeenio, nojori jaara tojiquiaari naa cuno pojori niishitiojosanotej, nojoriiri cuno pojoritia nacojoquiaari jiyanohua. Naacujitij, Antioquiya tiacajinia quiniaa Pueyaso pueyari Pablo, Bernabé sequeriquiaari nojori quianura noojiaqueya cuniqijinio pueyata Jerusalén tiacajinia. Nojori jiyaroreeri na nequesotamura Jesu jiyaramiquishano pueya Jerusalén tiacajinia, mariyata Jesuucua tiuuniaa pueya jiiitanaanio. Nojoriiri

jiyaramiquishaaree cuno pojori nequesotasaanura, ¿see-tanutejanaa naa miishiyatena, taa cuno Judea jiyajinijinio nijiono pueya niishitiojiya canaacuajani?

<sup>3</sup> Naacuajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiyacumano. Nojoriiri cuno jiyacajinia Pueyaso pueya pohuatanuumaquiaari taa taucuaca cartequiaari tama sesa nojori miishanojuajani, Pueyaso tojjiara nojori quiniuria. Jesuucua tiuuniaa pueya jaara naa tojiquiaaritij, nojoriiri jiyanohua shuquiriquiaari.

<sup>4</sup> Nojori tiuquiiiosacari Jerusalén tiacajinia, puetunu Jesuucua tiuuniaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohuataquiaari puetunujuanaa, naajuhuj, taa Pueyaso naacuquiaari maninia nojorini, nojori pohuatasacari taucuaca Jesujiniji. <sup>5</sup> Cuniqi quiriquiaajaariuhua Fariseocuaca, tariucua Jesuucua tiuujiaa. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuuniaani, na cararaatiuuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojjiara quiiria, taa Moisés rootaquiaari tariucuacaanucujani.

<sup>6</sup> Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniaa narta pueya jiitianaata. Nojoriiri maninia niishiriojonuuquiaari taa na miiniutianiyani.

<sup>7</sup> Naa pueyaracaanu nojori pocoojosacaritij, Pedroori socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijaari cua saquiriojoquiaari na rupaa pohuatariquiano taucuaca tojishocoriquiano, nojori tiuuniuria Pueyasocuajuhuj. <sup>8</sup> Pueyasocuajaari poojia



niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohuanu na niqitiosacari nojori, taa na niqutioquiaari pajaniyacuaani. <sup>9</sup> Majaari nia jiyaniniu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijajanaa. Cuno taucuaca jaara nocua tiuuquiaari, nojuajaari nojori jiuujia jeequereehuj saaja Jesuucua nojori tiuushacari. <sup>10</sup> Naa nia tamacasacari taucuacajininio parta Pueyaso pueyatej, niaari Pueyaso miishano soojotaaruhua. ¿Casaara nia tamacaa Pueyaso miishanoni? Niaari quiarijia Moisés niishitiojosano tojitiniu paniya Jesuucua tiuunaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujanaa, taa Moisés niishitiojoquiaaricujani. <sup>11</sup> Paari niishiyani pa Jiyaniiija Jesuuri pa jyanoojia. Naaratej, pa jyanooquiaari, na pueya pa quiniuria. Mariyata naa miiquianu cuno taucuacajaariuhuj. Majaari seetanujanaa maninia pa miiniu quiquiaari pa jyanooshaanura.

<sup>12</sup> Naa Pedro sequesacarij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumaacata miitiquiaari maninia taucuaca niquiarani, naajuhuj, taa nojori naatanijioquiaari cusosuhujaniuhuj. <sup>13</sup> Naa nojori pohuatanu nuhujitij, Santiagoori sequesacarijuihuj:

—Cuarta Pueyaso muerasunaa, cua tojitiare. <sup>14</sup> Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocujaari nojorijinininio jiyateya seetanujanaa na pueyara, nojori maniniuuaqueetanura nojuaja. <sup>15</sup> Seetanujanaari nio. Naajuhuj, tariucuacaanu Pueyaso sequenu panishano caminiujiuniaacuajaari naa naajionuutaquiaari Pueyaso sequesantej:

<sup>16</sup> “Janiyari David niqiuohuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijijajanaa quiriquiano puetunu pueyapuerajanaa, taa David quiquiaari Israel pueya jiyaniijiacuaani.  
<sup>17</sup> Naacuajitij, puetunu taucuacajanaari cua pajenuunutaniya, noo pojori teyano cua saquiriojoquiaari tariucuacaanucuajani, nojori jiyatesocoriquiano na Jiyaniijiaara janiya’.  
<sup>18</sup> Jiyaniijiaari naa sequeyaquij. Nojuajaari tariucuacaanu pueya toquiaari nio”.

<sup>19</sup> Naaratej pueyanaa, janiyari nia sequeyani, nareja nia niqiri cuno taucuaca, Jiyaniijia Jesuucua tiuuniaani. Majaari nojori najiquitiniu Pueyasooquaji, nia tojitiniu panishacari nojori tariucuacaanu Moisés niishitiojosano.

<sup>20</sup> Nareja nojoriicuara pa naajiore. Pocua pa naajioneejinia sequere nojorini, maja tari nojori miaquenuunura shipinishano pueyasooquara na puecootusano casaa, juunu, borregonio. Cuaara quituuuria saa necocuataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijiasanojuanaa, naajuhuj, maja na miaquenuunura casami nanaca. <sup>21</sup> Puetunu nio cua sequesanojuanaari parta Judiocuaca tojishano. Cuno niishitiojosanoori pueyacaanu parta Judiocuaca rerejojuaca tiajiniaqueya naa serojosaaquiaa Moisés naajioneejiniji puetunu samaatenu juucajanaa, puetunu tiqiyocua tiacajinijajanaa.

<sup>22</sup> Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajaanio, nojori jiitianaajuhuj, puetunu nojorijianaari mariyata niishiriojonuuquiaari. Naacuajitij, nojoriiri narta Pueyaso pueya saquiriojotuquiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijiuhuj. Cuno pojoriiri Jesuucua tiu-

uniaa pueya tojishano quijia cutara, cuniqui Jerusalén tiacajiniani. <sup>23</sup> Nojoritia jiyarotasaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuuniaa jiiitanaanio, Jerusalén tiacajinia niarta Jesuucua tiuuniaa pueyajuhuj. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocucajuhuj, tiquiyocua Antioquiya tiacajinia quijiaa, Siria jiyajinia quiniaanio, Cilicia jiyajinia quiniaajuhuj. <sup>24</sup> Canaari nijaniyajiniji pahuatasaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniaari nia taajetecanu tamaatia nojori niishitiojosacari nijaniya. Naajuhuj, nia cushitioconuuri nojori sequesacari nia cararaatiuuquia co nia miatejonura taa Moisés niishitiojoquiaaricujani. Nojoriniaari nia shiniujuquianu nia tojitianura socua Moisés Rootasanojuhuj. Quiarjia maja naate pueyanaa. <sup>25</sup> Naaratej, saa jiyareta canajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. <sup>26</sup> Canaa panishano pueya Pablo, Bernabeenio, nojoriiri tama na cuaqueya panitiaquiaarijiaaja Jesujiniji nojori pahuatasacari tiquiyocua. <sup>27</sup> Quiarjiani, canaari niaacua jiyaroya canaajininio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa pocoojoree canaa rerejosacaricujani. <sup>28</sup> Canaa niishiriojosanoori maninia quiya Pueyaso Sohuanura. Canaari na shuquiritiaajuhuj. Majaari canaa cushitionu paniniu nijaniya puera canaa supuetanaa niishitiojosanota

najuhuanaj. <sup>29</sup> Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijiosano pueyasohuacuara puecoosano casaa. Majaari nanaca miaquenu. Naajuhuj, niaa jaara shu miaquenu paniri, nia miaquere maninia na nanaca caatinijiasano. Naajuhuj, saaja nia niquiocohuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucuaja pueyanaa”.

<sup>30</sup> Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquiijoquiaari Antioquiya tiacajinia, nojoriiri puetunu Jesuucua tiuuniaa pueyajanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niquitiosaaquiaariiri cuno naajionee puetunu nojori niquiarajanaa serjosocoriquiano.

<sup>31</sup> Naajionee jaara serjosaaquiaari, puetunu Jesuucua tiuuniaa taucuacajanaari shuquiriquiaari jiyanoahua. Naacuajitij, nojoriiri noojia cajitiquiaariuhua tacaquioyano juucua.

<sup>32</sup> Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiitiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuuniaa pueya cumanijiaquiaari jiyanoahua. Na rootatuquiaariiri maja nojori tarinitianura Jesuucua tiuuniu. <sup>33</sup> Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniuhua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhujaniya nia quiaarohuaqui.

<sup>34</sup> Silasri saaja na cojiniaacuaji jatequiaari cuniquijia Antioquiya tiacajinia. Naacuajitij, Judasri tamaaja tacatequiaariuhua Jerusalén tiacajiniuhua. <sup>35</sup> Pablo, Bernabeeri Antioquiya tiacajinia camueenujuquiaarijihuaj. Nojoriiri cuniqui Jesuucua tiuuniaa pueya ni-

ishitiojoquiaari. Queraatia cuniquijinio pueyari nojori rupuequiaari niishitiojonurajuhuj. Puetunu nojorijianaari Jiyaniijia Jesujiniji pahuataquiaari tamasaca niqiarajuhuj.

*Pablo pacutenu panishacariuhua quianu Pueyaso pueya na niqiniuhua*

<sup>36</sup> Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niqiniuhua, paa tii pahuatacanu Jiyaniijia rupaatej. Naa pa miiri pa niishiniuria taa parta Jesuucua tiunnaa pueya quiyani.

<sup>37</sup> Bernabeeri na riucuaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. <sup>38</sup> Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saajaaraniuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pahuatasacari pa tarajacanu maniniatucuaa? Naacuajaa.

<sup>39</sup> Saa nojorijiaari socua juayonuutaquiaari Juan Marcocua. Nocuaji Bernabeeri jiyacari Pabloocuaji rupatequiaari. Na rupatesacari na rupuena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara. <sup>40</sup> Pabloori saniniuujia Silas saquiriojoquiaari na tarajariquiano. Nojori quiaaquishacarijia, Jesuucua tiunnaa pueyari nocuara Pueyaso secojotuchiaari. Naa na miituniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pahuatanura. <sup>41</sup> Nojori quiasacari Jesuucua tiunnaa pueya shiniujiuniucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiaari Jesuucua tiunnaa pueyari.

## 16

*Timoteo cojishacari Pablo, Silasno*

<sup>1</sup> Pabloori Silasta tiuquijioquiaari Derbe tiacajinia, Lистра tiacajinianio. Tii riuriatatuquiaari Timoteo jiyani-shano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuunijuhuj. Timoteo queeri tahue quiquiaari cutara. <sup>2</sup> Lистра tiacajinia Jesuucua tiuuniaa pueyari Timoteo maniniucuatujua. Naa sequetujuaari nojori: “Timoteori jiyano-hua maninia pueyano”. Iconio tiacajinijinio Jesuucua tiuuniaa pueyari naa sequetujua-juhuj. <sup>3</sup> Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiu-quia co miate-tequiaariiri, cuno jiyajinia quiniaa Judiocuaca sojotanuucujaji nojuaja. Puetunu pueyajanaari na niishijia, na queeri seetanujuanaa tahue quijia. Nocuaji naa miishaareeri. Na nuhuaji, Timoteo cutaraari Pablo cojiquiaari. <sup>4</sup> Pabloori Jesuucua tiuuniaa taucuaca niquiquiaari puetunu tiacajinijanaa. Nojori niquiara caminiujuquiaari Jerusalén tiacajiniji Jesu jiyaramiquishano pueya sequesano nojoririaari, mariyata Jesuucua tiuuniaa pueya jii-tianaa sequesanojuhuaj. <sup>5</sup> Naa Pablo caminiujiushacaritij, puetunu Jesuucua tiuuniaa pueyajanaari socua noojia cumaquiquiaari jiyano-hua. Tamasacaari socua Jesuucua tiuquiaarijuhuaj. Jesuucua tiuuniaa pueyari naa canequiaari socua. Naa caneriquiaa puetunu juucajanaari.

*Pueyaso Sohuanu tosacari Pablo, Macedonia jiyajiniara na quianura*

<sup>6</sup> Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacua-jitij, nojoriiri Frigia jiyacuma quiojoquiaari, Galacia jiyacumanio. <sup>7</sup> Naa tiuquijioseequiaari Misia jiya shuriucuaari. Nojoriiri cuniquiji quianu paniquiaari Bi-

tinia jiyajinia juucua. Naajuhuj, majaari Pueyaso So-huanu paniniu quiquiaari tii nojori quianura. <sup>8</sup> Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shonini-acu caminia casaqueyaji quiya. Tiiri buque tiutiaco-jua. <sup>9</sup> Pabloori cuno niucua juhua na maquenujinia niquiquiaari Macedonia jiyajinijinio pueyano nocua nu-juaano. Cuno pueyanoori Pablo sequequiaari: “¡Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taqui-jiria. <sup>10</sup> Naa Pablo niqiniu nuhuaji juhua na maque-nujinatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—¡Pa quiaarequij! Pueyasocujaari pa panitiaa Jesu-jiniji pa pahuatanura cuno pueya niquiarajuhuj.

*Pablo quishacari Filipino tiacajinia Silasta*

<sup>11</sup> Canaari Troas tiacajiniji quiaquiaari buquejiniani. Canaari Samotracia jiya tucuaatiajaacua tiuquishiini. Canaari cuniquiji sanequiaari tariquiniuhuj, tiuquishiiri Neápolis tiacajinia. <sup>12</sup> Canaari cuniquiji quiamaa Filipo tiacajiniani. Filipino tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipino tiaca jiyatequiaari nojori quiquiora. Canaari tii camueenujuquiaari rupaquijiani. <sup>13</sup> Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiitiquiaari Pueyaso secojonura. Canaari tii narejashiquijia cajitiuquiaari mariyatani. Jiyacar-itij, maajipohuari cuniqui rerejoquiaari na secojonu-unura juucua. Canaari saaja nojori niqiara pahuata-ree Jesujinijini. <sup>14</sup> Cuniqui maajipohua rerejosaquini, nojori tajinia quiquiaarijiaariuhua tamonu maaji. Na

sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqitiojojua quiquiaari na cumanecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pohuatasano na tojiniuria maninia. Jesuucua tiuuriiri.<sup>15</sup> Na nuhuaji, Lidiaari puetunu na tiajinia quiniaata-janaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojijiajuhuaj.

Nojuajaari seetanujuanaa canaa panitiaquiaari na tiajinia canaa quiniuria. Naacuajitij, canaari na tiajinia camueenujuaiarini.

<sup>16</sup> Tamonu juuca, socua canaa pacutesacari quianu pueya secojonuujuajiniara, canaari samaruraca niyacoo niqiquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhuara maseja queraatia cumaneecaari.<sup>17</sup> Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuacaanuji Jiyaniijiajiniji pohuatanaa! Nia niishitiojijiyari Pueyaso jiyanooshano nia quiniuria, pueyaracaanu nia rishiniuria nata.

<sup>18</sup> Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaati-aquiaari. Nocua tacatequiaariiri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajijiniiji quia tohuatare!



Naa Pablo sequesaciritij, samaruuri na tojiqquiaari. Ritia tohuataqquiaari cuno niyacoojinijiri.

<sup>19</sup> Cuno niyacoo camaruhuari niishiqquiaari maja tari nojori masenu qiniutianiya socua cumaneeca juhua co-teenu, niyacoo pohuatasanojiniji. Naaratej, nojoriiri Pablo, Silas quiooqquiaari na juaaniutia. Nojori jaatucunuuqquiaari tiaca jiuujiajinia curotasano pueya caji-tiucujianiraari. Tiaca jiyaniijianucuaari tii quijiaca pueyaracaanu, nojori jiitianura pueya. <sup>20</sup> Niyacoo camaruhuari Pablo, Silas nujuatejoqquiaari tiaca jiyaniijianucua tacoji, cuniqui na nequesoreesaanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijiosee. <sup>21</sup> Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

<sup>22</sup> Naacuajitij, puetunu cuno pueyajanaari na juaaniutia, Pablo, Silas coseqiaari ritia. Jiyaniijianucuaari nojori toqueya jaamitiquiaari jyanohua, na jocojosacari nojorijiniji. Na nuhuaji, tamasacaari seeratasaree nojori na mojoonura macata. <sup>23</sup> Jyanohua na mojoosaanu nuhuaji, nojoriiri socua na tiuquinijioqquiaari nujuatejojuajinia. Na nuhuaji, nujuatejojua tia camarnu seeratasareeri maninia na cojuatenura nojori nujuatejojua-jinia. <sup>24</sup> Naacuajitij, cuno nujuatejojua tia camarnuuri Pablo, Silas nujuatejoqquiaari socua mij, nujuatejojua cariquimiatej. Cuniqui nujuatejosaaqquiaariiri tii na cojuasaanura maninia, na mashiyocuatunuucujaji. Nojori cashacucuaari suruhuatuneeca quejasano tajiniocoma saatijosaaqquiaarijuhuaj.

<sup>25</sup> Cuno niucua shiyaqueya, Pabloori Silasta Pueyaso secojonuuriqiaajaa. Pueyaso maniniuhuaqueeta-turiqiaari na jaaquequejosanota. Cuniqui nujuatejosano pueyari nojori tojitariquiaa. <sup>26</sup> Jiyacaritij, rijiaari

canashiyaquiji jiuuquiutiaquiaari jiyanohua cuno nujuatejojua tia. Puetunu na tiotiuhuajanaari riatequequiaari. Puetunu pueya numatucuaacua morojotasano casaajanaari tamajaaja saacarejetaquiaari. <sup>27</sup> Nujuatejojua camarnuuri ritia niucuaquiaari. Saaja niquirii puetunu tohuateya riatequenojuanaari. Cunora, na nijiniaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jyanishacari puetunu nujuatejosano pueyajanaa naasucuaari tari mashiyocuauree. <sup>28</sup> Pablo jaara na niqiquiaari, nocua nacareeri:

—¡Maja najuhuaana naa miiniutij! ¡Canaacuaajaari puetunujanaa niya quiyani!

<sup>29</sup> Nujuatejojua camarnuuri na shiriqiniutia teteriquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimiaji mojuquetaseeri. <sup>30</sup> Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinijia, Pueyaso jiyanooshano cua quiniurajuhuj?

<sup>31</sup> Nojoriiri na riucuaaree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

<sup>32</sup> Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. <sup>33</sup> Jiyacaritij, nujuatejojua camarnuuri cuno niucuaaja Pabloocua jiyanooquiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijosaaquiaari moojinia Jesuucua nojori tiushacari. <sup>34</sup> Jiyacari na tiajinia nojori jiyataquiaariiri. Tii

Pablo, Silas mianuutereeri. Cuno nujuatejojua camarnuuri jiyanohua shuquiriaatia quiriquiaa puetunu na tiajinia quiniaatajanaa, Pueyasocua tiuunaa nojori quishacari.

<sup>35</sup> Cuno tariqui, Filipino tiaca jiyaniijianucuaari na seya jiyaroquiaari nujuatejojua tia camarnuucua, na sequenura nojuaja cuaara Pablo, Silas tohuatanijioora tari.

<sup>36</sup> Nujuatejojua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarijia nijaniya. ¡Juhuaianiya nia quiaarohuaqui!

<sup>37</sup> Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhua? Canaa mojuoturiquiaacuaa puetunu pueya niquiarajanaari. Majaari coteenu canaa nequesoreesaa quiriucuaa. Canaari jiyanojuua nujuatejosaarucuaani. ¿Taa na miitiuniu paniya quiarijia canaarini, jiyasohuaja tohuatejonu paniniu? ¿Jiyasohuaja mojuoturiquiaacuaa canaatucuaa? ¡Nojorijianaa cuaara niiria quiarijia, niiquiji nojori tohuatejonura canaa!

<sup>38</sup> Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipino tiaca jiyaniijianucua niquiaraari. Nocuaji jiyaniijianucuaari pueretuquiaari nojori niishishacari Pablo, Silas Romano pueya quiquiaarijiuhua. <sup>39</sup> Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootoonura. Jiyaniijianucuaari nojori tohuatejosee. Nojori sequereeri cuaara quiojoora quenaaja nojori tiacajiniji. <sup>40</sup> Naacuajitij, Pablo, Silas jaara tohuareetaquiaari nujuatejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuunaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

## 17

*Tesalónica pueya juaashacari Pueyaso pueya*

<sup>1</sup> Pablo rucuanajosacari Silasta Jesujiniji nojori pohanatasacari, nojoriiri jiyacari shoconujutuquiaari Anfípolis tiaca, Apolonia tiacanio. Naa tiuquiiijoseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. <sup>2</sup> Taate Pablo quijiacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijanaa, samaatenu juuca, cuno pueya niqiuara pohanataquiaari Pueyaso rupaari. <sup>3</sup> Pabloori nojori niishitiojoquiaari taa tariucuaaanu Pueyaso sequesano caminiujuninaa naajiotaquiaari Pueyaso Jiyarosocoriquianojinijicuaajani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhuj, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucuaajani, janiya nia pahuataani, nojuajaari Pueyaso Jiyarosano pocua.

<sup>4</sup> Jiyacaritij, noojiaqueya Judiocuacaari Jesuucua tiuquiaari. Queraatia taucuacaari Jesuucua tiuquiaarijiuhuj, canapuate tari Moisés niishitiojosano tojijiaca quiquiaaricuaajani. Queraatia cuno tiacajinia quiniaa pueya tojishano maajipohuari Jesuucua tiuquiaarijiuhuj. <sup>5</sup> Pueyasocua tiuyashijiaca Judiocuacatej, nojoriiri juaaquoquiaari juhua shocotasano nojori quiniucua. Nocuaji, nojoriiri sesa miijiaca taajecori masuunujuquiaari. Nooj, nareja rucoojuaca tiacaacacotej. Cuno pojoriiri masuusaaquiaari nojori na cojiniuria, tamasaca nojori nasojonura. Na nuhuaji, puetunu cuno pojorijianaa jaara tonujutooquiaari taa na miitiuniutianiyani, nojoriiri puetunu cuno tiacajinia quiniaajanaa juaatiquiaari

Pueyaso pueyacuara. Nocuaji, puetunu cuno pojori-jianaari Jasón tiaco tiuquitiaquiaari, Pablo, Silas nojori quioonura juucua, juaaquiyoano pueya nojori niq-uitiosocoriquiano. <sup>6</sup> Nojori jaara na riuriataaquiquiaari, noojiaqueya Jesuucua tiuuniaa pueyari Jasón ta cojiriti-asaaquiaari quioonu. Cuno tiacajinia jiyaniijiacacua na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojiyajanana! ¡Niya tiuquiijioreejaariuhua naa na miiniurijuhua! <sup>7</sup> ¡Jasónri nojori masecanu maninia na tiajinia! ¡Puetunu nojorijianaari pa jiyaniijia César sequesano tojitiaashijaca! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa seque-tuquiaaqui nio pojori.

<sup>8</sup> Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyanotej, nojoriiri juaaquiokiaari. <sup>9</sup> Jiyacaritij, tiaca jiyaniijianucuaari queraatia cumaneeca masequiaari Jasón-jiniji, narta Jesuucua tiuuniaa pueyajinijinio. Naa seque-turee nojoriiri:

—¡Pablo jaara niiquiji quiaaquiri, majaari canaa niquitionu quiniutianiuhua nia cumaneeca!

Naa na miishaanu nuhuajitij, Jasónri nata quioosano pueyata cartequesaaquiariauhua.

### *Berea tiacajinia Pablo quishacari Silasta*

<sup>10</sup> Cuno niucuaja, cuno tiacajinia quiniaa Jesuucua tiuuniaa pueyari Berea tiacajiniara mashiquiquiaari Pablo, Silasnio. Berea tiacajinia na tiuquiiijosacari, cuniqui quiniaa Judiocuaca rerejojua tiajinia quiojoquiaariiri.

<sup>11</sup> Cuniqui quijiaca Judiocuaca cutaraari maninia pueya quiquiaari, maja juhua Tesalónica tiacajinia quiniaa.

Naacujitij, Pablo jaara Jesujiniji pohuataquiaari nojori niquiara, nojoriiri maninia tojtiaquiaari na pohuatasano. Na nuhuaji, puetunu juucajanaa, tama nojorijaarijia tariucuacaanu Pueyaso Rupaajinia naajio-tasano pajenuquiaari, nojori niishiniuria seetanujua-naa quiriquiaate Pablo niishitiojosano. <sup>12</sup> Naacujitij, queraatia Judiocuacaari Jesuucua tiuquiaari, queraatia taucuacanio, canuu, mariyata queraatia tojishano maa-jipohuanio. <sup>13</sup> Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pohuataseecuahuaj, nojoriiri nocua quiojoquiaari nojori taanuunura nojuaja cuniquijjiuahuaj. Na tiuquijiosacari Berea tiacajinia, cuniqui pueya nasojoseeri, Pablo na juaatiuniuria. <sup>14</sup> Nocuaji, Jesuucua tiuunia pueyari cuniquiji ritia mashiquiquiaari Pablo shoniacu caminiajiniara. Silasri Timoteota Berea tiacajinia jateequiaari saaja. <sup>15</sup> Berea tiacajinijinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniohuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coquesee.

*Pablo quishacari Atenas tiacajinia*

<sup>16</sup> Pabloori Silas, Timoteo sashiquiaari Atenas tiacajinia. Cuno tiacajinia na rucuanijosacari pueya na sashishacari, Pabloori niquiquiaari tama cuno pueya shipinijosanojuaaja na pueyasohuara. Nojori shipinijosanoori puetunu cuno tiacajiniajanaa quiriquiaa. Pabloori cunora jiyano-hua tacaquiaari. <sup>17</sup> Pabloori Jesujiniji Judiocuaca poojotaquiaari nojori rerejonuujua tiajinia, noo pojori taucuacajuhuj, canapuate Pueyaso

tojitiajaca quiquiaaricuajani. Naajuhuj, Pabloori cuno tiaca jiuujiajania pueya cajitiucua curaotasanojinia pohuataquiaari Jesujiniji cuniqui quiniaa niquiaara. <sup>18</sup> Tamasaca niishijiaaari Pablo pohuatasacari Jesujiniji tojtitariquiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jiyanihano niishijia niishitiojosano tojtiajaca nojori quiniuucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaariiri Zenón jiyanihano niishijia niishitiojosano nojori tojiniuucua. Pablo pohuatasacari nojori niquiaara, nojoriiri maja na niishitiuniu quiquiaari casaa na pohuatariquiaani. Nocuaji tama nojorijaarijia sequetooquiaari:

—¿Casaariquitijia cuno paateca pohuataa pajaniyatejaj? Najuhuaana pocuaa pueyaracaanuuri.

Tamasacaari saniniuujia sequetuquiaari:

—Tamasaca pueyasohuajiniji poojotana juhuanaruhua.

Nojoriiri naa sequeriquiaa Pablo pohuatanuucua Pueyaso rupaa Jesujiniji, mariyata taa cusonuuno samiitiaconutaniuhua. <sup>19</sup> Na nuhuaji, nojoriiri Pablo jiyataquiaari tuhuananujiniji, tee nojori jiiitiquiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj. Canaari quia pohuatasanojiniji socua maninia niishiniu paniani. <sup>20</sup> Quiaari jiyajeneta sequeriquiaa canaa niquiaara quia pohuatasacari. Quiarijia canaa quia tore maninia.

<sup>21</sup> Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhuj, nojoriiri maja socua tamonu casaa na miitiuniu quijia. Saaja quiarinio sequesanojiniji niishitiuniu panijiaaari.

<sup>22</sup> Jiyacaritij, Pabloori Areópagojiniji nujuaquiaari na pohuatanura na tojitianu panijiaca niquiara. Naa co-teereeri:

—Atenas tiacajinia quiniaa pueyanaa, janiyari quiarijia niishiyani, niaaqui pueyasohuacua jiaatiajaca jiyanohua. <sup>23</sup> Janiyari naa nia sequeyani pueyanaa, cua niquiniuucua queraatia nia shipinijosano pueyasohua, cua rucuanes-josacari nia tiacajinia. Naajuhuj, janiyari saajiajiniji nia shipinishano juhua juhuacutura niquiriucuaajuhuj. Nocua naajoori sequeya, “Niishishoo Pueyasora”. Cuno Pueyaso niaa na tojitiaquiaa na niishiyaquiniutiani, nojuajaari nio Pueyasocuaja janiya nia pohuataani.

<sup>24</sup> 'Cuno Pueyasoori nio jiya shipiniquiaaricuaja, puetunu pa niquishanojuanaano. Nojuajaari jiyocuacaanu camarnujuhuj. Nojuajaari puetunu tiqiyocuajanaa Quijia. Majaari pueya tiajosano secojojua tiajinia na quiniu. <sup>25</sup> ¿Taa nia jiyaniyani pueyanaa, cutara Pueyasajuanaate pa jiitiasano casamijiniji paniyajuhuj? Maja. Nojuacuajaari puetunu pa jiitiasanojuanaa shipiniquiaari puera. Pa rishiniuria, na Sohuanujiniji pa niquitioquiaarijiaariuhuj, pa rijiosocoriquiano paratunio.

<sup>26</sup> 'Pueyasoori niquiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajiniajanaa pa quiniuria. Pueyasoori tarijia sequequiaari tee pueya quiniutianiyani. Sequequiaarijiaariuhuj taacari tii pa quiniutianiyani. <sup>27</sup> Pueyasoori naa panitiaquiaaricuaja puetunu jiyacajinia quiniaa pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutaniyani pa riuritanura nojuaja? Pueyasocuajaari maja na quiniu tucuacaanu pajaniyajiniji. <sup>28</sup> Pueyasoori pa samiitianiya. Pa cumaquiquiaajaariuhua pa poonijionura. Pa rishitiquiaajaariuhuj. Naatej, taa nia pohuatajaca



sequequiaaricujani: “Paari Pueyaso muerasuni”. <sup>29</sup> Paa jaara seetanujuanaa Pueyaso muerasu quirini, majaari socua pa jiyaniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajajiniji shipinishanonio. Pueyaso cutaraari maja na niquishaanu juhua tama pa niishirijosanojuaja. Majaari na niquishaanu taa pueya shipinijioquiaacujani, nojori jyanishacari Pueyaso naasucuaari naa niquishanotej. <sup>30</sup> Pueyasocuaajaari pueya miiniu sesa rejeretariquiaa pueyaracaanu. Saniniuujia, nojuajaari quiarijia puetunu tiqiyocua quijiaa pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojtianura. <sup>31</sup> Pueyasocuaajaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoori tari na saquiriojosano pueyano jiitiaa pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocuaajaari na saquiriojosano pueyano.

<sup>32</sup> Nojori jaara tojiquiaari Pablo pohuatasacari taa macunucua samiitiaconutaniuhuani, cuno niishijiacaari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhuaj.

<sup>33</sup> Na nuhuaji, Pabloori cuno pueya tajiniji quiacuhua. <sup>34</sup> Noojiaqueya cuno pueyajinijinioori Jesuucua tiuquaaari, Pablo pohuatasano nojori tojtiasacari. Nojorijinijinioori quiquiaari Dionisio jyanishano pueyano. Nojuajaari Areópago niishijiaca pueya maanujinijinio quiquiaari. Jesuucua tiuquaaarijaariuhua tamonu maaji. Dámaris na sesa. Socua tamasaca pueyari Jesuucua tiuquaaarijuhuaj.

## 18

*Pablo quishacari Corinto tiacajinia*

<sup>1</sup> Na nuhuaji, Pabloori Atenas tiacajiniji quiaquiaari Corinto tiacajinia. <sup>2</sup> Cuniqui riuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaaquiaari. Aquilaari necocua Priscilata shusha Italia jiyajiniji tiuquiiijiono quiriquiaa Corinto tiacajinia, tii Pablo tiuquishacari. Jiyacari-tij, Claudioori jiyaniijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jiiti-aquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocua-ta quiaquiaari Roma tiacajiniji. Corinto tiacajinia quishi-iri. Pabloori nojoriicua quiaquiaari nojoritia na pocoojonura. <sup>3</sup> Aquilaari necocuata suhuoronuutaja toqueya cusupenuujua quiquiaari juhua Pablojuhuaj. Naaratej, Pabloori nojoritia quishii, mariyata na poonijionuunura tii. <sup>4</sup> Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucuaner-jojua. Tii nojori pohuataquiaari Jesujinijiiri, taucuaa niquliaranio, noo pojori canapuate Judiocuacara jiyate-saaquiaaricuajani, tariucuacaanu Moisés niishitiojosano nojori tojjishacari.

<sup>5</sup> Silas jaara Timoteota Pabloocua tiuquiiioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pohuatanura Judiocuaca niqiara. Nojori sequequiaariiri:

—Jesucujaari nia sashishano, Pueyaso Jiyarosano see-tanujuanaa pocua!

<sup>6</sup> Judiocuaca jaara tojjiquiaari naa Pablo sequesantej, na tojtiaaquirii saajaari nojori cuaracashitiniutia Pablo

sequesano. Saaja juaaquioreeri. Sesa pocooreejaariuhuj. Naaratej, Pabloori nojori niquiara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiuutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiarijia taucuacaacua quiaa cutaranijia, nojori cua pohuatanura Pueyaso rupaa Jesucristojiniji.

<sup>7</sup> Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriquiase. <sup>8</sup> Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiaari. Naajuhuj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquinijosaaquiaari. <sup>9</sup> Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojishocoriquiano. Majaari sanaajenu. <sup>10</sup> Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiiitia cucua tiuuriqianoni.

<sup>11</sup> Naaratej, Pabloori Corinto tiacajinia jijojequiaari. Tii na quishacari, quera shocojotequiaari caapiqui marijiaari. Cuniqi na quishacari, Pueyaso rupaa niishitiojoriquiaa cuno pueyari.

<sup>12</sup> Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuaj. Jiyacari, Judiocuacaari tii Pabloocuaa rojotooquiaari. Na nuhuaji, na quiatuquiaariiri. Naa na jaatucutuquiaari cuno jiya

camarnuucuaari, Pablo nequesoreesaanura. <sup>13</sup> Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

<sup>14</sup> Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa miijiaca sequenio, janiya maara jiyano pueyanooacara nia tonujusacari tojiri cutarani.

<sup>15</sup> Niaari saaja tama nia niishishanojiniji juayonuutaa-jaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijijiaajanio. ¡Tama nia jeecatoorejaaja!

<sup>16</sup> Na nuhuaji, cuno camarnuuri nojori juaarii. Na shuriucuaji na jiyaramiquiriohuari. <sup>17</sup> Naa Galión miishacari nojoritij, narta taucuacaari cuniquijia quiatuquiaari Sóstenes, Judiocuaca rerejojua tia cojuana. Na piquitiurii camarnu Galión niquiara cuniquijiaari. Majaari Galión tenujunu quirii nojori. Nareja na niquiriquiaari.

*Pablo riujiuushacariuhua Antioquiya tiacajiniohua. Na nuhuaji jiuujianaraca pacutequiaariuhua quianuuri*

<sup>18</sup> Pabloori cuniqui queraatia camueenujuquiaarijiaara Corinto tiacajinia. Tari na riujiuushacariuhua cuniquiji, na nuhuajiria saruhuataarohua narta Jesuucua tiuuníaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilanio. Nojori tacataaquishacarijia buquejiniacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja

na naca na riuujiutiniu quiniutianiya nojuaja jaara na sequesano Pueyaso tucuataaquiri.

Cunora, naa quiarijia riuujiutirii na nacaari. <sup>19</sup> Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimaa Judiocuaca rerejojua tiajinia. Cuniqi rerejono Judiocuaca pohuatasee Jesujiniijiiri. <sup>20</sup> Nojoriiri Pablo nenecojoquiaari juucua cuniqi na camueenunurajaara nojoritia. Majaari Pablo paniniu quiquiaari. <sup>21</sup> Cuniqi quiniaa sequereeri:

—Quiohuanijia pueyanaa. Jerusalén tiacajiniara sec-  
ohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquiniuria tacatemohuaraniuhuaj.

Cuniquiji tacaquiaariuhua buquejiniaari. Éfeso tiacajiniji quiaarohuari. <sup>22</sup> Pablo tiuquishacariuhua Cesareya tiacajiniohua, cuniquiji quiaamaa Jerusalén tiacajiniaari, puetunu Jesuucua tiuuniaa na saruhuatanurajanaa. Na nuhuaji, quiaarohua Antioquia tiacajiniaari. <sup>23</sup> Cuniqi tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajinarajanaa. Quiariquiaari na niquiniuhua Jesuucua tiuuniaa pueya Galacia jiyajinia, Frigia jiyajinianio. Pabloori nojori niquiara pohuataquiaari socua Pueyaso rupajiniji. Jesuucua tiuuniaa nacasuquiaariiri maja nojori tarinitianura Jesuucua tiuuniu.

*Éfeso tiacajinia Apolo pohuatasacari Pueyaso rupaa*

<sup>24</sup> Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriquire. Tariucuacaanu Pueyaso Rupaa naajiosano niishijia quiquiaariijaariuhuj. <sup>25</sup> Nojuajaari maninia niishitiojosaaquiaari Jiyaniijia Jesu niishitiojosanojiniji. Shitimia pohuataja pueya niquiaraari.

Maninia niishitiojua Jesujiniji na pohuatasacarijiaari-uhuj. Seetanujuanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujajinia tiuquijia. Saaja moojina tiuquinijionu niishiquiaariiri, taa Tiuquinijiona Juan niishitiojoquiaaricuaani. <sup>26</sup> Apoori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuj. Apolo pohuatasano tojitiariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. <sup>27</sup> Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoori Jesuucua tiuujiaa cumaquiquiaari jiyanojua, nojori na niishitiojosacari. <sup>28</sup> Apoori nojori niquiara niishitiojoquiaari tariucuacaanu Pueyaso Rupaajiniji naajiotasano. Jiyanojua maninia na niishitiojosacari Jesuuri seetanujuanaa nojori sashishano quiquiaari, naacujitij Judiocuaca niishishano pataquiaariiri.

## 19

### *Pablo quishacari Éfeso tiacajinia*

<sup>1</sup> Apolo quishacari Corinto tiacajinia, Pabloori sanini-uuja Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniaari. Tii riuriataquiaari Pueyaso pueya maanuuri. <sup>2</sup> Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojia-jinia, Pueyaso rupaacua nia tiuushacari?

Pablo riucuatereeri:

—Majaari quenaaja canaa niishiniu quijia Pueyaso So-huanute quiyajuhuj.

<sup>3</sup> Pabloori nojori sequequiaari:

—¿Casaara nia tiuquinijosaacanucuaararini?

Nojoriiri na riucuaquiaari:

—Canaari tiuquinijosaaquiaarini taa Tiuquinijiona Juan niishitiojoquiaaricujani.

<sup>4</sup> Pabloori nojori riucuaaree:

—Taaquiriirinij. Tiuquinijiona Juancuaaquiniateja pueya tiuquinijioquiaarijiaj, nojori jaara noojia tacato-quiaari sesa na miitiushanojiniji. Nojori sequequiaariji-aariuhuj: “Cua nuhuaji Niriqianoocua nia tiuuri”. Naa Tiuquinijiona Juan sequesacaritij, nojuajaari Jesucristo-jiniji sequeriquiaa.

<sup>5</sup> Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijosaaquiaariuhua Jesuucua nojori tiuushacari seetanujuanaa. <sup>6</sup> Naacujitij, Pablo niasacari na juaashiquia nojori nacaacua Pueyaso na secojosacari, Pueyaso Sohuanuuri cuno pojori jiuujiajinia tiuquiquiaari. Naacujitij, nojoriiri niishishoo rupaacajinia pocooree. Naajuhuj, Pueyaso Sohuanu niishitiojosano Pueyasojiniji pohuatanuuquiaariiri. <sup>7</sup> Cuno pojoriiri doce canuu quiquiaari.

<sup>8</sup> Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pohuataja Pueyaso rupaa pueya niqiaraari. Naajuhuj, nojori niishitiojuaari taa Pueyaso jitianutaniya pueyaracaanu Jesuucua tiuunaa pueyani. Pueyari na tojitiaquiaari maninia, na puereyaquiniutia na niishitiojosacari. <sup>9</sup> Noojiaqueya cuno

pueyajinijinioori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaajiniji pueya niquiaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuunias pueya jiyataquiaari cuniquiji, tamaquiria serojonuujua tiajiniara. Tirano jiyanishano pueyanoori cuno serojonuujua tia camaru quiquiaari. Pabloori cuniqui puetunu juucajanaa niishitiojojua Pueyaso rupaa Jesuucua tiuunias pueya. <sup>10</sup> Caapiqui marijiaari socua Pablo shocojoquiaari tii na poojotasacari Pueyaso rupaa Tirano serojonuujua tiajinia. Naacujitij, puetunu Asia jiyajinia quiniaa pueyajanaari Pueyaso rupaajiniji caminiujiushaaquiaari, Judiocuaca, taucuacajuhuj. <sup>11</sup> Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. <sup>12</sup> Naacujitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhucua niojoquiaariuhua cuno toqueraacua, jcusosuhuari naatacoquiaariuhua! Naajuhuj, samaruhuari tohuareetaquiaarijuhuaj, samaruhua jiitiaja pueyacuaji.

<sup>13</sup> Tamasaca Judiocuacajinijinioori quiriquiaajuhuj, pueyajiniji samaruhua tohuatanijiojua. Nojoriiri puetunu tiacajiniajanaa rucoojuuaca quiquiaari. Jiyacaritij, nojoriiri juhua Pablo miiniu paniquiaarijuhuaj. Juucua naa sequetuquiaari samaruhuari:

—Pablo pahuatasano Jesu sesajinia nia sequeyanijia: “¡Nio pueyanojiniji nia tohuareetare!”

<sup>14</sup> Naa miijiacaari siete canuu quijia. Nojoriiri Esceva jiyanishano pueyano niquiohua quiriquiaa. Escevaari pueyacuara secojonaa camarnu quiriquiasejuhuaj, Judio pueyanotuhuj. <sup>15</sup> Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:



—Jesu niishiyacuajanijia. Janiyari Pablo niishiyajaa-niuhuj. ¿Canteerini nijaniyanijia, naa nia sequenura janiyatej?

<sup>16</sup> Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj. <sup>17</sup> Puetunu Éfeso tiacajinia quiniaa Judiocuacajanaa, mariyata tii quiniaa taucuacanio, nojori jaara niishiquiaari naa miishanojinijitij, jiyanohua pueretuquiaariiri. Naacuajitij, puetunu Éfeso tiacajinia quiniaa pueyajanaari sequequiaari:

—¡Jesuqui seetanujuanaa Jiyaniijajanaa cutara!

<sup>18</sup> Naajuhuj, queraatia Jesuucua tiuuniaa pueyari nijioquiaari, tarijia sesa na miitiushano pohuatanura puetunu pueya niquiarajanaa. <sup>19</sup> Naajuhuj, queraatia pueyari juhua shimiacuri miijiojuaca quiquiaari. Nojoriiri na nequesoretuneeca mueratejotaquiaari. Cuno nequesoretuneecajiniaari serojosano quijia taate pueyano cumueeca shimiadura quiniuni. Na camaruhuari jiyacari puetunu cuno nequesoretuneecajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoretuneecajanaa catijiasaaquiaarini, cunoori cincuenta mil platajiniji shipinijosano cumaneecata masesano quiquiaari. <sup>20</sup> Naacuajitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujiajinia.

<sup>21</sup> Na nuhuaji, Pabloori cuniquiji naquerejoquiaari Macedonia jiyajiniarajuhuj, Acaya jiyajinarianio. Cuniquiji riujiuuniu paniriquiohua Jerusalén tiacajiniohuaraari. Sequequiaariijaariuhuj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

<sup>22</sup> Jiyacaritij, Pabloori na naacunaa jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyojequiaariijaara.

*Éfeso pueya cushitiishacari na juaaquionuta najuhanaj*

<sup>23</sup> Pablo quishacari Éfeso tiacajiniaja, Éfeso tiacajinia quiniaa pueyari jiyanojua juaaquoiquiaari Pablo niishitiojonuucua Jesucristojiniji. <sup>24</sup> Naa quiquiaari-iri. Demetrio jyanishano pueyanocujaari juhuacatecara narta pueya nasojoquiaari. Cuno pueyano, Demetrioni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jyanishano pueyaso secojojua tia niquishano quiquiaari. Nojori pueya-soori maaji sesaanucua quijia, “Artemisa”. Na shipinijosano niqutiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. <sup>25</sup> Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasa pueya, casaa shipinijionaa platajiniji juhua nojorijihuaj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacujaari niishiya, paari puetunu pa panishanojuanaa jiitiaani pa niqutiojosacari pa cumaneecara pa shipinijosano. <sup>26</sup> Quiarjiaa cuno Pablo jyanishano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja setanu pueyasohujanaa. Niaari na niquiriquiaacuajanaa na niishitiojosacari. Niaari na tojiriquiaajuhuaj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojitiaajuhuaj. <sup>27</sup> Taa cua sequeyacuajani, pa shipinijosano jaara

shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaari-  
 iuhuj. Nocuaji, majaari pueya nijionu quiniutianiya  
 tari pa pueyaso Artemisa secojojua tiajiniaara, tii nojori  
 secojonura, naa cuno Pablo niishitiojonuucua pueyara-  
 caanu pueyatej. ¡Naacuajitij, puetunu pa Asia jiya-  
 jinijinio pueya, mariyata puetunu jiyacajinijinio pueya-  
 puejanaari pa pueyaso Artemisa rerequetejacara jatanu-  
 taniya! ¡Puetunu pueyapuejanaari naa niyajetanutaniya  
 socua pa pueyaso Artemisatej!

<sup>28</sup> Cuniqei quiniaa pueya jaara tojiqiaari naa Demetrio  
 sequesantej, nojoriiri jiyanojua juaaquiocuaari. Naa  
 nacoocuaariiri:

—¡Pa timitiasano Artemisa cuara pueyaracaanu qui-  
 iria Éfeso tiacajinia quiniaa pueyaso!

<sup>29</sup> Naa nojori juaaquiocuaari, puetunu cuno tiacajini-  
 ajanaa pueyari cushitiiqiaari. Nojoriiri jiyacari quioo-  
 turee caapiqui Pablo cojiniaa pueya, Macedonia jiyajini-  
 jinio pueya. Nojoriiri quiquiaari Gayo, Aristarconio. Na  
 jayoturee Éfeso tiacajinijinio pueya rerejojua tiajiniaaraari.

<sup>30</sup> Pabloori cuno pueya nacoosacuaari tiajinia tiuquiniu  
 paniquiaari juucuaajuhuj. Quera na pocuasee cuno pueya  
 tajiniani. Jesuucua tiuuniaa pueyari saa na cosequiaarijia  
 na tiuquiyaquiniuucuaari. <sup>31</sup> Asia jiya camarucuaari na seya  
 jiyaroquiaari Pabloocuaajuhuj. Camarucuaari coteenu  
 naa sequequiaari na seya:

—Niocua Pablo sequesee, maja cumaati jaarajaaja na  
 tiuquiniu pueya nacoocuaari, mariqui mosaareeri.

Cuno camarucua na seya jiyaroquiaari nocuani, no-  
 joriiri Pablo rupuenaa quijia. <sup>32</sup> Cuno nasojosano  
 rerejono pueyari saaja cushitiiqiaari na juaaquiocuaari.  
 Jiyanojua nacooreeri. Tamasacaari saniniuujia tamaa-  
 tia nacoocuaari juucuaajuhuj. Jiyacarijia, tama cuno nojori-  
 jinijinio pueyari maja na niishiniu quiquiaari casaa-

jiniji na nacooriquiaani. Secaja nojorijinijinioori na niishiquiaari cutara. <sup>33</sup> Jiyacaritij, Judiocuacaari Alejandro jiyaniishano pueyano caponeequiaari pueya nacoyano tacoji na nujuafesocoriquiano. Cuniqijinio pueyajaari tii toquiaari Alejandro casaara pueya nacoyani. Alejandroori Judio pueyano quiquiaarijuhuaj. Naaratej, Judiocuacaacuaji tacunu paniriquiaa juucuaari. Alejandro jaara nujuaquiaari pocuajajiniji, na juaashiquia shiitioquiaariiri pueya sanaajetanura. <sup>34</sup> Saniniuujia, cuno pueya jaara niishiquiaari Alejandroori Judio pueyano, puetunu pueyajanaari socua jiyacatequiaari nacoonura. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuara pueyaracaanu quiriia Efesio tiacajinia quiniaa pueyaso!

Naa pueyaracaanu nacooriquiaari. <sup>35</sup> Cuno tiaca camarucuara naajiona pueyano jaara na naata quiriquiaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quini-aajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishi-tiuyajaariuhuj paacuaajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni. <sup>36</sup> ¡Canteeri nio niishiyaquiyaniija! Shaaqui. Cunora tariucuaaja. ¡Nia sanaajetarohua! Majaari najuhuaana sesa nia miitiuniu, maninia nia niishiri-ojiyaquishacari. <sup>37</sup> Nio canuu niaa niyara na jayoreeni, nojoriiri maja na nohuasenu quirii casaa pa pueyaso secojojua tiajiniji. Majaari na sesacatunu quiquiaa pa pueyasojuhuj. <sup>38</sup> Demetrio jaara nata poonijionaata cuno pueyacuara tonujunu paniri, ¿casaara na quiaaquiya pa nequesoreenaa niquiara tonujunuraarini? ¿Casaara pa jiitiaa nequesoreenaa pa tiacajiniaarini? ¿Najuhuanaj?

Pa nequesoreenaari pa paraa tacujua pocuaji. <sup>39</sup> Niaa jaara tamonu casaacua juaaquioreja, pocua tamonu juuca na rerejotariquiani pa jiyaniijianucuata pa jeeanura puetunu nia sequesanojuanaa. <sup>40</sup> Pueyanaa, ¿majate nia puerenu, Roma tiacajinia quijia pa jiyaniijajanaa jaara pocuara tosaare pa nacojonujiniji? Paa jaara sequesaaare nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

<sup>41</sup> Tiaca camarucua naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajanaari cuniquiji niyaquejoquiaariuhua.

## 20

*Pablo rucuanesacariuhua Macedonia jiyajinia, Grecia jiyajinianio*

<sup>1</sup> Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiuunaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. <sup>2</sup> Nojuajaari puetunu cuno jiyajinia rucuanequiaarijianaa. Jesuucua tiuunaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari. <sup>3</sup> Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuaaari na niishiquiaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji

Macedonia jiyajiniara neteja nucuacohua tacatequiaar-  
 iuhua saaja. <sup>4</sup> Nucuaco na quiasacariuhua, na tara-  
 jaquiaariiri Sópater jiyaniashano pueyano Berea tiacajini-  
 jinio, Pirro niyanu. Na tarajaquiaarijiaariuhua Aristarco,  
 Segundonio. Nojoriiri Tesalónica tiacajinijinio pueya  
 quiquiaari. Nata quiaquiaarijiaariuhua Gayo, Derbe  
 tiacajinijinio. Timoteori nojoritia quiriquiaajaacuhuj,  
 Tíquiconio, Trófimojuhuaj. Nojoriiri Asia jiyajinijinio  
 quiquiaari. <sup>5</sup> Puetunu nio canaa tapueyocuacajanaari  
 canaa puetaquiaari. Canaacuaji tiuquiiijioseequiaari co-  
 teenu Troas tiacajiniaari. Cuniqui sashitiuquiaari canaari.  
<sup>6</sup> Jiyacariiri queranacunuusacari quiquiaari, poreeta-  
 jaaju shipinijiosano pan miaquesacari. Queranacunuunu  
 nuhuaji, canaari Filipo tiacajiniji jaaretaquiaari buque-  
 jiniani. Canaari cinco juuca camueenujuquiaari canaa  
 tiuquiniuria Troas tiacajiniani. Canaari tii nojori co-  
 queseeni. Canaari mariyata tii camueenujuquiaari siete  
 juucani.

*Pablo niishitiojosacari Troas tiacajinia*

<sup>7</sup> Shusha semaana coteejajinia domingo juuca, canaari  
 rerejoquiaarini pan neecasenura pa Jiyaniijia cusosacari  
 niishiriojonura. Pabloori jiyacari Jesuucua tiuunaa  
 pueya rootariquiaa niucua. Nojuajaari cuno tariqui  
 quiariquiano quiriquiaa cuniquiji. Naaratej, na nuhua-  
 jiria pocoojoriquiaa pueyataari. Pueyaracaanu na po-  
 huatasacari, shiyaqueyari tari quiquiaari. <sup>8</sup> Cuno tia-  
 jinia canaa tii quiriquiaani, canaari jiyocuaaanu ter-  
 cero na natacojinia rerejoriquiaani. Queraatia samari-  
 iri canaa caaniuji noshiquioriquiaa. Pabloori shitimia  
 pohuatariquiaa pueya niquiara. <sup>9</sup> Jiyacaritij, tamonu  
 mashajaari tia shuucuaji tacuhuajiniji cajiriquiaa. Na  
 sesaari Eutico quijia. Pablo pohuatasacari pueyara-  
 caanu, socua maquequiaari na cajishaquiiri. Jiyanohua  
 na maquesacari, jiyocua tiquii socuaari. Cusosejanaari.

<sup>10</sup> Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuuniaa pueya sequereeri:

—Maja najuhuana shiriiquitiuniu. Saminiocuaja.

<sup>11</sup> Na nuhuaji, puetunu nojorijianaari tiniota shuquiri-aatia tacataquiaariuhua. Pabloori neecaruu neecase-quiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaque-maajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara.

<sup>12</sup> Cuno mashajaari saminio jaatucusaquiaariuhua na tia-jiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

*Pablo quiasacari Mileto tiacajiniara*

<sup>13</sup> Pabloori na quiaaquishacarijia tari canaa sequer-quiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

<sup>14</sup> Naacuajitij, canaari coquetoquiaari Asón tiacajini-ani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. <sup>15</sup> Canaari tariqui shocoma Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari ru-paquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tia-cajinia tiuquishiini. <sup>16</sup> Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tia-cajiniajuhuaj. Ritia tiuquiniu paniquiaariuhua Jerusalén tiacajiniara. Pentecostés juucara quiniu paniriquiaa tiiri.

*Pablo cumashitishacari Éfeso tiacajinijinio Jesuucua tiu-  
niaa jiitianaa pueya*

<sup>17</sup> Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiu-uniaa pueya jitianaa. <sup>18</sup> Nojori jaara canaacua tiuquiiijio-quiaari, Pabloori nojori sequeree:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. <sup>19</sup> Niaata cua quishacari, janiyari pueyaracaanu nia niishitiojojuani, pueyaracaanu pa Jiyaniijjara cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. <sup>20</sup> Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojojuani puetunujuanaa maninia nia quiniuria, maninia miijia nia quiniurijuhuj. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojojuani, tama nia tiacajiniaqueyajaajanio. <sup>21</sup> Janiyari Judiocuaca sequejani taucucanio, nojori tacatonuhuara noojia Pueyasooocua, sesa nojori miishanojiniji, pa Jiyaniijiaacua nojori tiuuniuria cutara. <sup>22</sup> Quiarijjiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. <sup>23</sup> Janiyari saaja niishiya cutarani, puetunu tiacajinijanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. <sup>24</sup> Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panituri. Janiyari saaja pa Jiyaniijia sequesano tucatanu paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooni paniya pueyani.



<sup>25</sup> 'Janiyari seetanujuanaa nia sequeyani pueyanaa. Puetunu niajanijajanaa, cana niqiuara cua pohuataquiaari Pueyaso rupaacuajani, majaari socua nia niqiniu quiniutianiya mijiria janiya. <sup>26</sup> Naaratej, janiyari nia sequeyani, majaari na nuhuaji nia sequenu: "Maja canaa pohuataasaanu quiquiaari Pueyaso rupaani".

<sup>27</sup> Janiyacuajaari tari nia pohuataquiaari puetunu Pueyaso sequesanojuanaa pajaniyarani. <sup>28</sup> Quiarijiani, tama nia cuaqueyajaaja nia cojuare. Maninia nia cojuare Jesuucua tiuunaa pueyajuhaaj. Pueyaso Sohuanucuajaari nia jiyatequiaari Jesuucua tiuunaa pueya jiitianaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. <sup>29</sup> Janiyari seetanujuanaa niishiyani, janiya jaara niiquiji quiaqueeni, tamasaacari cua nuhuaji nijionutaniya. Jesuucua tiuunaa pueya sesonutaniyari, sacuaratia nojori niishitiojosanota.

Nojoriiri juhua marucuatouque sareya tiuquitianutaniya Jesuucua tiuunaa pueya tajinia. Taa marucuatouque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. <sup>30</sup> Naajuhuaaj, tama niajanijajiniujuaarijia najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuunaa pueyari, pueya tojiniuria nojori saniniujia. <sup>31</sup> Janiyacuajaari nia sequeyani, jiyanohua nia cojuare tama nia cuaqueyajaaja. Nia niishirijiuhuaaj, jiuujianaraca marijaari tari cua shocojoree pueyaracaanu cua niishitiojosacari niajaniya. Majaari cua tarinitianu quijia rootanu niajaniya, juuca, niucuanio. Janiyari naajaa cua namijaacatenuta niishitiojua puetunu niajanijajanaani. Majaari naa cua miishano nia niyajetanu pueyanaa.

<sup>32</sup> 'Nia tiujianutaniya tarinijia. Janiyacuajaari pa Jiyani-ijia juaashiquiajinia nia jataani. Na rupaa nia tojiriquia

pueyaracaanu, juhua rishimiaca pueyano nia quiniuria, cumueecara. Nia jaara naa miiritij, Pueyasoori nia rijionutaniya na shuriucuara, na saquiriojosano puey-ata nia quiniuria. <sup>33</sup> Niaata cua quishacari, majaari tama quiriajaaja cua paniniu quijia cumaneeca, toquenio. <sup>34</sup> Niaari naa quiyano cua niquijiajuhuaj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhuj. <sup>35</sup> Janiyari nia niishitiojuani, naa poonijosanotej casamijiuniucua pa naacunura pa jiitiasanota. Majaari pa Jiyaniijia Jesu sequesano nia niyajetanujuhuj. Naa sequequiaariiri: “Maninia pueyano jaara na jiitiasanojiniji niquitiore nareja tamonu pueyano, na niquitiosacari tamonu, nojuajaari socua shuquiriaatia quiya, niquitiosano masejajiniji”.

<sup>36</sup> Naa nojori na sequenu nuhuajitij, Pabloori mojuquetaree. Puetunu nojoritijanaa secojoreeri. <sup>37</sup> Puetunu pueyajanaari nujuquettee. Pablo cacanuutureeri. Na nujuunetteejaariuhuj. <sup>38</sup> Pueyari jiyanohua taraajeriquiaa Pablo sequenuucua nojori, maja tari socua na niquitiuniu quiniutianiya nojuaja. Nojoriiri caminijiniara rosetaquiaarijuhuaj, Pablo na niquitiuniuria buquejinia na tacasacari.

## 21

### *Pablo quiasacari Jerusalén tiacajiniara*

<sup>1</sup> Éfeso tiacajiniji canaa ruparetasacari, canaari shoniacu caminia jiuujiaaco quiaareeni. Canaari Cos tiacajinia tiuquishiini. Cuniquiji canaa quiasacari tariqui, canaari Rodas tiacajinia tiuquishiiniuhuj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. <sup>2</sup> Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. <sup>3</sup> Canaa

jaaretasacari, canaari canaa muenecara niquimiohua Chipre jiya tucuaatiajani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiuutiaseeni, casami jatanura tii. <sup>4</sup> Jesuucua tiuuniaa pueyari tii quijiajuhuaj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniquijinio Jesuucua tiuuniaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. <sup>5</sup> Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacari-tij, puetunu Jesuucua tiuuniaa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa secojonura jaaquiajania. Puetunu canaajanaari mojuquetacoquiaarini shoniniacu caminia casaqueyaji. <sup>6</sup> Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

<sup>7</sup> Canaari Tiro tiacajiniji jaaretaareeni. Canaari Tolemaida tiacajinia tiuutiaseeni. Canaari cuniqui tacatasee puetunujuanaani. Canaari tii quijiaca Jesuucua tiuuniaa pueya saruhuataseeni. Canaari nojoritia quishii niquiriyatu juucani. <sup>8</sup> Tariqui saniniuujia, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajina quishiini. Felipeeri Jesujiniji puhuatana quijia. Nojuacuajaari Jerusalén tiacajinia co-teenujuanaa tamasacata jiyatesaaquiaari mashiquiopue mianuuteriquiano. <sup>9</sup> Felipeeri necojori jiiitaja, saa caque-etacaneeja, niyacoojori. Cuno niyacoojoriiri Pueyaso

Sohuanu jiitiajaca. Naacuajitij, Pueyaso Sohuanu ni-  
ishitiojosano nojori jiuujiajinia Pueyasojiniji pohuatanu-  
ujuaari. <sup>10</sup> Canaa camueenujusacari cuniqui, jiyacari  
tiuquishiiquiaariiri Judea jiyajinijinio pueyano. Nojua-  
jaari Pueyaso sequenu panishano caminiujunia qui-  
ajuhuj. Ágabo jiyanishano pueyano. <sup>11</sup> Nojuajaari  
canaacua niqiaari Felipe tiajinia. Jiyacaritij, Pablo cajin-  
iocua camarucujua samaacataseeri. Nata morojoree tama  
na cashacucuajaarijia, na numatucuanio. Na nuhuaji  
sequerohuari:

—Jerusalén tiacajinia parta Judiocuacaari naa moro-  
jonutaniya nio cajiniocuaque camarutej. Na nuhuaji,  
taucuaca niqitiosaanutaniyari. Pueyaso Sohuanuuri naa  
cua sequereeqij.

<sup>12</sup> Naa Cesareya tiacajinia quiniaa Jesuucua tiu-  
niaa pueya tojishacaritij, canaajuhuj, puetunu canaa-  
janaari juucua Pablo nenecojoquiaarini maja na quianura  
Jerusalén tiacajinia. <sup>13</sup> Saa canaa sequerejaari:

—¿Casaara nia nujuquetiuyajaarani? ¿Niaateeri cua  
taraajonu paniyaruhua? Majaari saaja cua paniniu pueya  
morojonura janiya Jerusalén tiacajinia; janiyari tama cua  
cuaqueyajaaja panitiaacujua. Cuaara cua motuuraqui, cua  
pohuatanuucua cua Jiyaniijia Jesujiniji.

<sup>14</sup> Maja canaa naata na tarinitiniu quishacari, canaari  
socua na tarinitiareeni.

—Cuajaquij. Pueyaso cuaara miiria taa na miiniu paniy-  
acuajani.

<sup>15</sup> Naa canaa sequenu nuhuaji nojuaja juucuatej,  
canaari canaa jiitiasano casaa jeenucuareeni. Canaari  
Jerusalén tiacajinia quiaarejaaniuhuj. <sup>16</sup> Canaata quio-  
joquiaariiri Cesareya tiacajiniji Jesuucua tiuuniaa pueya-  
juhuaj. Canaata quiariquiaajaariuhua Mnasón jiyanis-  
hano pueyano. Nojuajaari Chipre jiya tucuaatiajajinijinio

pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

*Pablo pocoojosacari Santiagota*

<sup>17</sup> Canaa tiuquijiosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquijiosacari. <sup>18</sup> Pabloori tariqui canaata quiaquiaari Santiago niquniuucua. Tii quiriquiaajaariuhua puetunujuanaa Jesuucua tiuuniaa jiitianaa pueya. <sup>19</sup> Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucuanijosacari tucuacaanu taucuaca quijia jiyacajinia. <sup>20</sup> Pueya jaara naa tojiquiaari Pablo pohuatasantej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niquiquiaacuajani, jiyanoehua queraatia parta Judiocuacaari Jesuucua tiuya. Puetunu nojorijianaari tariucuacaanu Moisés niishitiojosano tojitiajacajuhuj, nocua nojori jiaatianuta jiyanoehua. <sup>21</sup> Nio Jerusalén tiacajinia quiniaa Jesuucua tiuuniaa pueyari quiocuaji tojiquianujuhuj. Quiaanaari tamonu jiyacajinia quijiaca parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhuj maja nojori necohua cararaatiuuquia co nojori miatejonura, taa pa supuetanaa niishitiojosaaquiaaricuaani. <sup>22</sup> Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? <sup>23</sup> Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarijia na

sequetusano Pueyaso na tohuateenura. <sup>24</sup> Nojori quia jiyataare Pueyaso Secojjua tiajinia. Niocua nia cuaqueya jeequejosee taa pa supuetanaa sequequiaaricuajani. Naajuhuj, quiocua nojoriria cumaneeca niqutiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanjujanaa quiqiuianu pueya sequesano quiajanijajiniji. Niishitiuniutianiyajaariuhuj, quiaaqui tariucuacaanu Moisés niishitiojosano miyajaa. <sup>25</sup> Majaari Jesuucua tiuunio taucuacaacia quia tacaaniu. Canacuajaari tari nojori nacasuquiaari canaa naajioneejiniani, nojoriicuaara canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijiuhuj, maja na miaquenuunura shipinishano pueyasohuacuara puecoosano casaa, naajuhuj, maja na miaquenuunura nanaca. Canaari nojori sequequiaarijiuhuj maja na miaquenuunura shu na nanacataja, naajuhuj, maja na numuetucunura na camishoo maaji. Puetunu pa supuetanaa rootasanojinijianaani, saa niojuaari taucuaca tojishocoriquiano rootasano.

*Na cojiniaata Pablo quioosacari Pueyaso Secojjua tiajinia*

<sup>26</sup> Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricuajani. Naa na miiniu nuhujitij, Pueyaso Secojjua tiajinia tiuquitiaquiaariiri pueyacuara secojonaacia. Na sequetuquiaariiri casaa juuca na tucuatatunutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niqutiosocoriquianoni.

<sup>27</sup> Quera nojori tucuatascari puetunu cuno semaana juucajanaa, Asia jiyajinijinio narta Judiocuacaari Pablo niqiquiaari Pueyaso Secojjua tiajinia. Nojoriiri puetunu

pueyajanaa nasajoquiaari ritia. Jiyacari Pablo quia-  
tureeri. <sup>28</sup> Na quiatusacari Pablo, pueya na jiiquioonuuta-  
reeri:

—¡Israel pueyanaa, miji! ¡Canaa nia naacuseeja! Nioori  
noo pueyanocuaja tiquiyocua na rucuanesaqui pueya ni-  
ishitiojoquiaa sacuaraatia pocuaratej, nio Pueyaso Seco-  
jojua tiaacuarajuhuj. Naajuhuj, tariucuaaanu Moisés  
Rootasano sesacatequiaa pueyajaariuhuj. ¡Quiarijiani,  
pa Secojoua tiajinia sacuaraatia tiuquinitiaree taucua-  
caari!

<sup>29</sup> Cuno Judiocuacaari naa sequetuquiaari Pablotej,  
Trófimo jyanishano pueyanota nojori niqiniuucua no-  
juaja tarijia na rucuanesacari cuno tiacajiniaja. Tró-  
fimoori Jesuucua tiuunia tahue quijia, Éfeso tiacajini-  
jino pueyano. Naaratej, cuno Judiocuacaari jyaniquiaari  
Pablo naasucuaari cuno tahue tiuquinirii Pueyaso Secojo-  
jua tiajinia.

<sup>30</sup> Puetunu Jerusalén tiacajinia quiniaa pueyajanaari  
juaaquoquiaari. Pabloocua netecuatuquiaariiri. Na  
quiatuereeri. Pueyaso Secojoua tiacoji na jaatiuquiaari  
carijiniacumaari. Pueyaso Secojoua tia tohuateyari  
ritia tionujusaaquiaari na nuhuaji. <sup>31</sup> Pueyari tari  
monu paniriquiaa Pablo. Jiyacaritij, tii Jerusalén tia-  
cajinia quijia Romano soldadohua comandanteeri nu-  
mootesaaquiaari: “¡Judiocuaca na juaniutia nacoya!”  
Cuno comandanteni, nojuajaari soldadohua capitáncuaca  
jyaniiija. <sup>32</sup> Jiyacaritij, comandanteeri na soldadohua  
rerejotequiaari ritia, na capitáncuacanio. Tee pueya  
nacooriquiaani, nocua netecuatuquiaariiri. Judiocuaca  
jaara niqiquiaari comandante na soldadohua neretaano  
nojoriicua, jiyacari shusha cartetuquiaari Pablo piquitiu-  
niuuri. <sup>33</sup> Comandante tiuquishacari nojoriicua, Pablo  
quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

<sup>34</sup> Pueyari saaja jiyajeneta nacooriguiaa. Nioori tamaatia nacooriguiaacujua. Tamasacaari socua tamaatia nacooriguiaajanaajataj. Comandanteeri cunora maja na niishiniu quiquiaari casaa Pablo miiriijaarani, puera nojori cojuatunenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

<sup>35</sup> Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicujaji Pablo shiitioquiaari jiyocuacaanu. <sup>36</sup> Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

### *Tama nocuaji Pablo tacusacarijiaaja*

<sup>37</sup> Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucuaaree:

—¿Quiaaquiiri Griego rupaa pocuaja? Janiya juucua quia jiyaniriquiaa Egipto jiyajinijinio pueyanoni.

<sup>38</sup> ¿Majateeri noo quiajaniya quiquianucuaja, cariiquia jiyajinia jiyatacanu cuatro mil puecoojuaca pueyatej?

<sup>39</sup> Pabloori saaja na sequereeri:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajinijinio pueyanoni, teyano tiacatucuaja socua panishano tiaca Cilicia jiyajiniani. Quenaaja rupaquijia cua



tarishitiricuarajaj. Cuno pueya sequenu paniya niquiriyatu rupaa quenaajanijia.

<sup>40</sup> Comandanteeri socua na sequeree:

—Quia pocuare.

Pabloori jiyacari tacatujiniji nujaquiaari. Na juaashiquia shiitioquiaari pueya na sanaajanuraari. Puetunjuanaa jaara sanaajetaquiaari, nojoriicuara pocuaree tama nojori Hebreo rupaajiniaari. Naa nojori sequereeri:

## 22

<sup>1</sup> —Cua tapueyocucanaa, cua jiyaniijianucanaa, nia tojitiare cua sequesano niajaniya tama cua tacusacarijiaaja cucuaji.

<sup>2</sup> Cuno pueya jaara tojiquiaari Pablo pocuasacari nojoriicuara Hebreo rupaajinia, pueyari maninia sanaajetaquiaarijianaa. Pabloori nojori sequeree:

<sup>3</sup> —Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jyanohua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniuucua jiaatiaquiaani, taa quiarjia nia miiniu panianijia. <sup>4</sup> Janiyari tarijia Jesuucua tiuunaa pajejani naquiya cua miitiasocoriquiano. Janiyari na mooquiaarijiuhuj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia.

<sup>5</sup> Pueyacuara secojonaa camarnuuri cua miijosano niishiyajuhuj, puetunu pa jiyaniijianucujanaanio. Nojoricuajaari cua niqutioquiaari nojori naajionee Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuunaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

*Pablo pohuatasacari Jesuucua na tiuuniujiniji*

<sup>6</sup> 'Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyaquiji jiyanohua shacantuuca juhua miacanaari cua nunuquiaari. <sup>7</sup> Janiyari juhua jatasaareeni. Jiyacaritij, janiyari rupaa tojirii cua sequeyanoni: "Saulo, Saulonaa, ¿casaara quia miitiaa puera janiyani?" <sup>8</sup> Janiyari na nequesotareeni: "¿Cantequia Jiyaniijianaa?" Cua sequeereeri: "Janiyacuajaari Jesuni, Nazaret tiacajinijinio pueyano. Cunocuajaari quiaa na miitiaani". <sup>9</sup> Cua cojiniaa pueyari cuno shacantuuca na niquishacari shiri-iquitiquiaari. Majaari na tojitiuniu quiquiaari cutara jiyocuacaanuji rupaa cucua pocuaano. <sup>10</sup> Janiyari socua na sequereeni: "¿Casaa cua miyarini Jiyaniijianaa?" Jiyaniijiaari cua sequereeni: "Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria". <sup>11</sup> Cuno shacantuuca cua nunuquiaari jiyocuacaanujini, cua namijia sesoquiaariiri. Janiyari cariyujuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

<sup>12</sup> 'Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari see-tanujuanaa tariucuacaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: "Ananías cutaraari maninia pueyano". <sup>13</sup> Ananíasri jiyacari cua niquiniuucua niquiaari. Jaara tiuquiquiaari cucua, cua sequeeseeri: "Cua tarajanu Saulonaa, maninia niquijia quia quiriohua". Jiyacaritij, cua namijiaari ritia jeequequee. Janiyari maninia niquiqui Ananíasni. <sup>14</sup> Cua sequereajaariuhuj: "Pa supuetanaa Jiyaniijia Pueyasocuajaari quia saquiriojoquiaari tariucuacaanujiniji, na niishitionura quiajaniya na panishano quia miiniuria. Quia saquiriojoquiaarijaar-

iuhuaj quia niquniuria taquiya pocuajinio sesa miyashijia cutara, tama na camaru rupaajiniji quia tojiniuria na sequesanojuhuaj. Nojuacuajaari pa Jiyaniijia Jesucristo. <sup>15</sup> Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio”.

<sup>16</sup> 'Ananíasri socua cua sequequiaari: “¿Casaara quia tarishiyarini? Quiarijiani, quiaa cuaara tiuquinishaaria. Jiyaniijia Jesu quia sequere: ‘Cua jiyanoori sesa cua miishanojiniji’. Nocua quia tiuushacari, quia sesa miishanoori jeequesaanutaniya”.

*Pablo pohuatasano taa Jesu jiyaroquiaari nojuaja taucacaacuani*

<sup>17</sup> Janiya jaara riujiuuquiaariuhua Jerusalén tiacajiniohuani, janiyari Pueyaso Secojonuujuua tiajinia secoriquiaani. <sup>18</sup> Cua secijosacari, janiyari Jesu niqiquiaari juhua cua maquenujiniani. Cua sequereeri: “Ritia quia quiaare niiquiji. Nio pueyari maja na tojtianu quiniutianiya quiajaniya, nojori quia pohuatasacari janiyajiniji”. <sup>19</sup> Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiuniaa pueya quiuojani puetunu rerejovia tiajinijijianaa cua nujuatejosocoriquiano nojori. Janiyari nojori mojuuajuahuaj. <sup>20</sup> Naajuahuaj, quia rupaa pohuatana Esteban jaara mosaaquiaariti, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhuj, nojori mosacari Esteban. Janiyari jaarajaaja sequequiaarini: ‘Cuaara mosaaria’”. <sup>21</sup> Naa cua sequesacariti, Jiyaniijiaari saaja cua sequereeni: “¡Niiquiji quia quiaarejaj! Janiyacuajaari tucuaaanu quia jiyaronutaniya taucacaacuani”.

*Comandante jitiiasacari Pablo*

<sup>22</sup> Pueyari sanaa tojitiariquiaa Pablo pohuatasacari. Saniniuujia, Pablo jaara jiyaniquiquiaari taucaca,

pueyari jiyacari coteequiaari nacoonu, taucuaca soojeaca nojori quiniuucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriguaa.

<sup>23</sup> Na juaaquionuta na nacoosacarijia, na toqueya quejootuquiaari jiyocuacaanuuri quera na macaaniutia. Naa quejootuquiaari jiyojuaariuhuj. <sup>24</sup> Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuaara sequeera casaara naa pueya nacoyani.

<sup>25</sup> Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniijia César rootasanotee, naa nequesoreesoojua nia majacunura narta Romano pueyanotej?

<sup>26</sup> Capitán jaara tojiquiaari naa Pablo sequesantej, ritia netequiaariiri. Na comandante sequeeseri:

—¡Quiaa cocuaatia miya! ¡Cuno pueyanona Romano!

<sup>27</sup> Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucuaaree:

—Taaquiririnij.

<sup>28</sup> Comandanteeri na sequerohuacuhuj:

—Romano pueyano cua quiniuria, janiyari queraatia cua cumaneeca niquitioquiaarini.

Pabloori saaja na sequeree:

—Janiyari Romano cutarani, nojori tiacajinia cua rasaanuucua.

<sup>29</sup> Cuno pojori, Pablo majacunura seeratasaaquiaari juucuan, naa nojori tojitiasacaritij, Pablo shuriucuaji ritia shiriquitiaquiaariiri. Comandante niishishacari Pablo

seetanujuanaa Romano quiquiaari, puererejaariuhuj,  
Pablo na morojotenuucua.

*Tama nocuaji Pablo tacusacarijiaaja Judiocuaca jiyani-  
ijianucua niquiara*

<sup>30</sup> Tariqui saniniuujia, comandanteeri maninia  
niishiniu paniquiaari casaara Judiocuaca na-  
cootariquiaacuaa naa Pabloni. Naaratej, comandanteeri  
Judiocuacaacuara secojonaa jiyaniijianucua  
rerejotequiaari. Puetunu Judiocuaca camarucua  
nacasunaa maanujuanaa rerejotequiaarijiaariuhuj.  
Nojoricuajaari Sanedrín maanu. Jiyacari Pablo  
numatucujajiniji rupareetaquiaari cumayocua  
saatijiotasanoori. Puetunu nojorijianaa jaara tari  
rerejoquiaari, jiyacari Pablo tohuatequiaariiri. Nojori  
tacoji na nujuatereeri.

## 23

<sup>1</sup> Pabloori juhuacatecara pohuatanu coteequiaari ca-  
marucua niquiara. Nojori sequereeri:

—Cua tapueyocucanaa, janiyari pueyaracaanu juhua-  
janiya quiquiaani, Pueyaso tojijia cua quishacari pueyara-  
caanu.

<sup>2</sup> Naa Pablo sequesacaritij, pueyacuara secojonaa  
jiyaniijajanaari juaarii. Ananías na sesa. Nojuajaari  
Pablo jiyaniquiaari najuhuaana pocuaa naasucua. Nocuaji,  
Ananíasri Pablo shuriucua nujuatunaa sequequiaari ritia:

—¡Na rupaajinia nia piri naa pocuaaniquitij!

Pablo shuriucua nujuanaari jaarajaaja na piquii.

<sup>3</sup> Majaari Pablo niishiniu quiquiaari casaate Ananías  
quiquiaarini. Naacuajitij, Pabloori juhuajaniya Ananías  
sequequiaari:

—¡Pueyasoori saniniuujia cucua quia naminiu-  
tianiycujua, Moisés Rootasano tojiyashijianaa! Nia  
jiyanishacari janiyari Moisés Rootasano tojiyashijiani,

niaari coteenu cua nequesoreya maninia taa Moisés rootaquiaaricujani. ¡Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

<sup>4</sup> Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

<sup>5</sup> Pabloori nojori riucuaaree:

—Cua tapueyocucanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaraatia rimiaaquenu nia camarnuucuaa”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

<sup>6</sup> Pabloori niishiquii cuno Judiocuaca camarucua naca-sunaa cuniqui quiriquiaani, noojiaqueya nojoriijnijini-oori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacuja. Naaratej, Pabloori jiyanoohua na rupaa paaretaquiaari naa na sequenura nojori:

—¡Cua tapueyocucanaa, janiyari Fariseo pueyanoni! Cua shipininioori Fariseo pueyano quiquiaarijuhuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitiani-jionutaniuhua taa puetunu cuarta Fariseocuaca niya quiniaa tiuyanijia. ¡Niaaquiiri jiyamitia cua nequesoreya!

<sup>7</sup> Pablo jaara naa sequequiaaritij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raquitiiquiaari. <sup>8</sup> Saduceocuacaari jiyaniya maja macunucua samiitiaconu quiniutianiuhua. Nojoriiri sequeyajuhuaj: “Maja Pueyaso seya quiniu”. Pueyapuenaari sohanuujujuhuaj. Fariseocuaca cutaraari nojori cuaracashitishanoocua tiuya. <sup>9</sup> Naacuajitij, puetunu pueyajanaari nacooriguiaa na juayonuutasacari. Jiyacaritij,

tariucuacaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijia-juhuaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiqiuani! Maninia sohanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujere Pueyaso panishano na miishacarini?

<sup>10</sup> Pueyari socua jiyacatequiaari nacoonu. Comandanteeri puerequiaari, na jiyanihacari Pablo naasucua socua sureesaanutaniyaquij. Naa jiyaniquiaariiri, puerajanaa pueya juaaquiosacari. Nocuaji, comandanteeri ritia na soldadohua jiyaramiquiquiaari, na tiajinia nojori tiuquininiuhara Pablo pueya tajiniji. Naa miituiquiaariiri.

<sup>11</sup> Cuno niucuajani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhuj, Césarjanaa niquiarajuhuj.

### *Judiocuaca roojotoosacari Pablo na motunura juucua*

<sup>12</sup> Tariqui saniniuujia, noojiaqueya Judiocuacajinijiniori Pabloocuara roojotooquiaari na monura. Nojoriiri naa sequetuquiaaritij:

—Paa jaara Pablo moyaquirini, pocua miaqueyaquirini, pocua ratuyaquirijianiuhuj.

<sup>13</sup> Nojoriiri cuarenta canuu quiquiaari, naa sequetuquiaarini. <sup>14</sup> Na nuhuaji, cuno pojoriiri pueyacuara secोजना jiyaniijianucuaacua quiaquiaari, Sanedrín maanucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaraa more Pablojaatijia. <sup>15</sup> Niajaniya, pueyacuara secojona jiyaniijianucuaanaa, puetunu Sanedrín maanujuanaanio, nia sequere comandante cuara

nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyaquishacarijia nuu cajiniocua na moreni.

<sup>16</sup> Tamonu pueyanoori Pablo raaquia caminiujuquiaari naa cuno pojori sequesano camarucuatej. Pablo raaquiaari nocuaji ritia soldadohua quijia tijinia quiaquiaari na cama Pablo na pohuatanura. <sup>17</sup> Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu paniya.

<sup>18</sup> Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

<sup>19</sup> Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

<sup>20</sup> Caya samijiaari na sequeree:

—Noojiaqueya Judioacuajinijinioori Pabloocuara rojotoorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujuanaa niquiara nequesoreesocoriquiano. <sup>21</sup> Quiaa jaara sequesaaere, majaari nojori tojinuu. Cuarenta canuuri tari nuu cajiniocua nocuaji jamaatiuya. Cuno pojoriniari maja na miaquenuunu quiniutianiya, majanaari na raruunu quiniutianiyajuhuj, cuara moture Pablojaatijia.

<sup>22</sup> Comandanteeri caya samijia sequequiaari:

—Maniniacuaja. Majaari tamasaca pohuatanu quia sequesano janiya. Tariucuaja. Quia quiaarohua.

*Soldadohua jiyatasacari Pablo camarnu Félix*



<sup>23</sup> Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriquiano cuno niucujaja. Mariyata cuara quiojoora setenta soldadohua caballohua nijinia cajituijacajuhuj, socua dosciento soldadohua saacashiriacaanio. <sup>24</sup> Comandanteeri na capitáncuaca sequequiaarijuhuaj, nojori niojotanura cajitiucua tamasaca caballohua nijinia Pablo cajjiara. Nojori sequequiaarijuhuaj:

—Niocua maninia cojuare Pablo, cuara tiuquiiria camarnu Félix nequesoreesocoriquiano.

<sup>25</sup> Comandanteeri na naajione niqutioquiaari Pablo jiyatanaa. Naa naajiosanoori quiquiaari camarnu Félix-cuara:

<sup>26</sup> “Camarnu Félixnaa. Nio Claudio Lisias naajione. ¿Taa quia quiyani cua panishano camarnunaa? <sup>27</sup> Cua jiyarotasano pueyanojiniji quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocua-caacuaji nia quiare ritia cuno pueyano, mariqui na motureeri’. <sup>28</sup> Maninia cua niishiniuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. <sup>29</sup> Nojoriquiiri na nacootacanu Pablo tojiyaquiniucua tariucua-caanu tama nojori supuetanaa rootasanojuaja. Cunora na motunu paniriquiaari. Janiyari quia

sequeyani, ¿maatucua cunora mosaareeri? Ma-  
jaari quenaaja sesa na miiniu quiquianu, pueyara-  
caanu na nujuatesaanura. <sup>30</sup> Janiyari sequesaru-  
cuaajuhuj, noojiaqueya Judiocuacajinijionaari  
na monu paniya. Janiyari jiyamitia quiocua cua  
soldadohua na jiyarotareeni. Janiyari nocuara  
saquiriojotanaa sequerucuaajuhuj, cuara quia  
saquiriojotatuura nocuara cutara. Cunojuanaa  
quia sequeyanijia cua camarnunaa. Tariucujaja”.

<sup>31</sup> Soldadohuari naa miiquiaari taa comandante se-  
quequiaari nojoricujani. Nojoriiri cuno niucujaja Pablo  
jiyataquiaari. Antípatris tiacajinia tiuquijioseeri. <sup>32</sup> Na  
niohuacata quiojonaa soldadohuari Antípatris tiacajiniji  
tariquicuaji riujiuutiaquiaariuhua Jerusalén tiacajinio-  
hua. Caballohua nijinia cajitiuniaa soldadohua cutaraari  
Pablo jiyataquiaari. <sup>33</sup> Pablo jiyatanaa jaara tiuquijiosee-  
quiaari Cesareya tiacajinia, nojoriiri comandante na-  
jionee niqutiosee camarnu Félix. Pablo na niqutioturee-  
jaariuhuj. <sup>34</sup> Camarnu serojonu nuhuaji comandante  
naajionee, Pablo nequesotaquiaariiri:

—¿Tee quia rasaaquiaarini?

Pabloori na riucuaaree:

—Cilicia jiyajinia rasanonijia.

<sup>35</sup> Camarnuuri na sequeree:

—Janiyacua quia nequesoreeriquiani quiocuara  
saquiriojotanaa jaara tiuquijiose.

Jiyacaritij, camarnuuri na soldadohua sequequiaari  
cuara maninia cojuatuura Pablo tariucuaaanu jiyaniijia  
Herodes tiaco. Herodes quishacari jiyaniijia, cuno tiaari  
nocuaji tiasaaquiaari na quijara.

## 24

*Tama Pablo tacusacari nocujijiaaja camarnu Félix  
niquiara*

<sup>1</sup> Pabloori cinco juuca camueequiaari tari Cesareya tiacajinia. Jiyacari tiuquijioquiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jiyaniishano pueyanohujaj. Jiyanohua pocuanu niishijia. Puetunu nio pojorijianaari camarnu Félixdua tiuquiti aquiaari Pabloocuara na saquiriojotanura. <sup>2</sup> Pablo jaara tohuatesaaquiaari nojoriicua, Tértulo juhuacatecara co-teequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jiyanohua niishijia. Naa niishijia quia quishacaritij, quiaari maninia quia pueya jiiitaa. Canaari naacua juhuajaniya quiyani, maninia canaa quia jiiitiasacari. <sup>3</sup> Canaari cunora quia timitiaani camarnunaa, maninia quia jiiitianuucua canaa pueyara-caanu, puetunu canaa jiyajiniyajanaa. <sup>4</sup> Maja puera cua tarishitiniu paniniu quiajaniya. Quenaaja rupaquijia canaa quia tojiricuara. <sup>5</sup> Nio pueyanoori tariucua-caanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiniaa Judiocuacajuhujaj. Naa sesa na niishitiojonuucua pueyatej, tamasaari maja tari na rupuenu paniniu narta pueyano. Nio pueyano tojitiajacaari sesojosaaquiaari Nazarenoocua tiuuniaa maapue. Nio pueyanocuaajaari cuno pojori jiyaniijia. <sup>6</sup> Juucua Pueyaso juaatiniu paniquianujaariuhujaj, tahue na tiuquininiu panishacari Pueyaso Secojoua tiajinia. Canaari jiyamitia na quiarucuaani, canaa nequesoreesocoriquiano taa tariucuaaanu canaa supuetanaa rootasaaquiaaricujani. <sup>7</sup> Comandante Lisasri canaa na jaariuti arucuaa saajani. <sup>8</sup> Canaa sequerucuaajaariuhujaj: “Cante nio pueyanoocuara saquiriojotanu paniyani, cuara quiaara camarnu Félixdua”. Naa canaa sequerucuaari. Nio pueyano quia nequesotasure,

quia niishiniuria maninia. Seetanujuanaacuaj, canaari cunora nocuara quia saquiriojotaani.

<sup>9</sup> Cuniqi quiniaa Judiocuacaari jaarajaaja sequeturee:

—Taaquiriirinij, camarnu Félixnaa. Naacuaaquiniatejaj, taa Tértulo sequeyacuajani.

<sup>10</sup> Camarnuuri na juaashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiriirinij, pocuashiyacuaaquiniatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. <sup>11</sup> Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. <sup>12</sup> Nojoriiri maja quenaaja na riuriatanu quiquianu janiya tamonu pueyanota juayonuutaano. Majaari na riuriatatanu quiquianu janiya pueya ruutaqueyano quenaaja Pueyaso Secojojua tiajinia. Majaari quenaaja nojori riuriatanu quiquianu janiya canaa Secojojua tiajinia juayonuutaano pueyata. Majaari quenaaja naa cua miiniu quiquiaari puetunu tiacajinijanaa cua rucuanijosacari. <sup>13</sup> Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miijiani. <sup>14</sup> Nojori sequesacari janiyanaari Pueyaso tojjia tamaatia nojorijinjini, cua tojjiniucua cuno Nazareno pueyano, taaquiriirinij. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua tiuushacari puetunu Moisés naajiotasanoocuajanaa, naajuhuj, cua tiuushacari puetunu canaa supuetanaa caminiujiushano Pueyasojiniji naajionuutasanoocuajanaano. <sup>15</sup> Janiyari juhua cucuara

saquiriojotanaa pueya tiuya Pueyasooquajuhuj, taa Pueyaso samiitianijionutaniuhua macunucuan; maninia miijiaca, sesa miijiacanio. <sup>16</sup> Naaratej, janiyari pueyaracaanu sesa miyaquiniu saniniujuquiaani, maninia cua quiniuria Pueyaso niqiuara, pueya niqiuarani. Naacuajitij, janiya jaara samiitiarohuani, majaari cua macuhuajenu quiniutianiya.

<sup>17</sup> 'Queraatia marijia cua shocotejonu nuhuaji cua rucuanesacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiuniaa niqitiojosano cumaneeca tiuquitiarohuacuaanijia. Janiyari na tiuquitiarohuani na jatanuhuara Jerusalén tiacajinia, Jesuucua tiuniaa casamiiijuniucua niqitiojosocoriquiano, mariyata cua jiiitianojiniji cua niqitiohuara Pueyasora. <sup>18</sup> Naa cua miiniu nuhuaji Pueyaso Secojoua tiajinatej, Asia jiyajinijinio Judiocuacaari cua naacutucanu tohuataano juucua Pueyaso Secojoua tiajiniji. Janiyari juucua tohuatariquiohuani cua cuaqueya cua jeequenu nuhuaji, taa canaa supuetanaa niishitiojosaaquiaaricujani. Cuno juuca, majaari queraatia pueya quiniu quiriqiaa Pueyaso Secojonuujajinia. Majaari quenaaja pueyata cua juayonuutani quiriqiaajuhuj. <sup>19</sup> ¿Teete cuno pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni. <sup>20</sup> Cucuara saquiriojotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quituquianu jiyacarijuhuaj. Nojori cuara sequeera, ¿cuno camarucuate cua sequecanu janiya sesa miiquianuni? <sup>21</sup> ¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarijia, cua niishishacari macunucuaari samiitianijiosaanutaniuhua”? Janiyacuajaari naa nacacanu camarucua nequesoreesacari janiyani.

<sup>22</sup> Camarnu Félix jaara naa tojiqquiaari Pablo sequesantej, nojuajaari pueya sequequiaari:

—Comandante Lisias cuaara tiuquiirijaara, janiyacia Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pabloocua saquiri-  
ojotanaa pueya tarinitiaquiaarijaara. <sup>23</sup> Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupuenaa, tapueyocuacanio, nojori jaara Pabloocua nimiaquia, majaari nocuaji na tenujununoj. Nojori cuaara na niqitiotuura na panishano.

<sup>24</sup> Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niqiuocuata na tojinu paniyani. Cuaara canaa niqiara pohuataara taate Jesuucua tiuushanojuaarani.

<sup>25</sup> Naacuajitij, Pabloori Félix pohuataquiaari nojori niqiara taate pa naata maninia miijiara pa quiniuni. Pohuataquiaarijiaariuhuj taate pa naata tama pa cuaqueyajaaja pa cojuanu maniniani, sesa pa miyaquiniucujaji. Naajuhuj, Pabloori na numootequiaari Pueyasoori sesa miijiaa saniitionutaniya.

Camarnu Félix jaara naa tojiqquiaritij, jiyanohua shiriqiquiaariiri. Pablo sequereeri:

—¡Tariucujaja! Quia quiaarohuacuarajaara. Janiya jaara jeya quiriqiani, janiyacia quia sequereeraniuhuj.

<sup>26</sup> Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niqititionutaniya na cartesaanura.

<sup>27</sup> Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuuja camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

## 25

### *Pablo pohuatasacari Festo niqiara Jesujiniji*

<sup>1</sup> Jiyacaritij, Festoori tiuquiuaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. <sup>2</sup> Jerusalén tiacajinia na quishacari, pueyacuara secojona jiyaniijianucuaari tii Judiocuacajinijinio socua tojishano camarucuata Pablocuara saquiriojotaquiaari camarnu Festo. <sup>3</sup> Nojoriiri camarnu Festo sequequiaari cuaara na soldadohua jiyarooro, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nuquamaji na nishacari. <sup>4</sup> Camarnu Festoori saaja nojori riucuaquiaari:

—Nujuatesano quiya Cesareya tiacajiniacujaruhua. ¿Maatucua casaara niyara rishaareni? Janiyacuajaari nocua tacatenutaniuhuani.

<sup>5</sup> Camarnuuri nojori sequequiaarijuhuaj:

—Niajanijajinijinio socua tojishano pueya cuaara quiojohuara cuata Cesareya tiacajinia. Nojoriiri na naata Pablocuara saquiriojotanu cua niqiara tii, cua niishinuria maninia, Pablote seetanujuanaa sesa miiquianujuuara.

<sup>6</sup> Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaarihua Cesareya tiacajiniuhuari. Na tiuquiniu

nuhuaji, saniniuujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohua-teera na nequesoreesocoriquiano. <sup>7</sup> Judiocuacaari tari tiuquiiioquiaari Jerusalén tiacajinijiihuaj, Pabloocuaa na saquiriojotanuunura. Pablo jaara nujuatesaaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocuara saquiriojotanuquiaari najuhuana queraatia casaa. <sup>8</sup> Jiyacaritij, Pabloori tama nocuaji na tacusacarijaaaja naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano tojiquiaajaanihuaj. Majaari sesa cua miiniu quiquianu Pueyaso Secojoua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

<sup>9</sup> Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

<sup>10</sup> Pabloori na riucuaquiaari:

—¿Majateeri Roma tiacajiniji pa jiyaniijiajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhuj, majaari sesa cua miiniu quiquianu Judiocuaca. <sup>11</sup> Janiya jaara sesa miirii seetanujuanaani, cuaara cua motuuraqui. Cucuara cuno pojori saquiriojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.



<sup>12</sup> Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quijaniya pa jiyaniijia Césardua, nojuajanaa nequesoreenura quijaniya. Janiyari nocua quia jiyaronutaniya cua soldadohuatani.

*Jiyaniijia Herodes Agripa niqiara Pablo pohuatasacari Jesujiniji*

<sup>13</sup> Naa Pablo sequesaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanura nojuaja. Agripaari tiuquiquiaari na rimiatu Bereniceta. <sup>14</sup> Nojori camueenujusacari camarnu Festo tiajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. <sup>15</sup> Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camarucuata. Nojoriiri cua sequetucanu Pablo cua motenura. <sup>16</sup> Janiyari saaja nojori riucuacanuni: “Roma tiacajiniji jiyaniijiaari maja ritia na monu pueyano. Nocuara saquiriojotanaa cuaara nijioma niya nocuara saquiriojotanuunurajaatijia. Monu panishano cuaara rihuaneera tamajaaja quenaaja nocuaji, jaara seetanujuanaa quiyaquiri nocuara saquiriojotasano”. <sup>17</sup> Naacuajitij, Jerusalén tiacajinijinio pueya nocuara saquiriojotanuuriquiano jaara cucua tiuquijiocanu, majaari socua cua tarishiniu quiquianu. Janiyari tariquicuaji nequesoreeja cajitujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. <sup>18</sup> Cuno pojori Pabloocuara saquiriojotanuucanuni, nojoriiri maja quenaaja na saquiriojotanuunu

quiriucuaa juhua cua niishiriojosano. <sup>19</sup> Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyanishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyanishanonaari samiitiaquiaariuhua. Saminionaari quiari quiyajaa. <sup>20</sup> Naa cua tojishacari nocuara pueya saquiriojotasantej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quijaniya?” <sup>21</sup> Nojuajaari saaja cua sequecanu: “Jiyaniiija César Augustojuanaa cuaara cua nequesoreera juhuari”. Janiyari cunora niyaja nujuatesano na jiitiaani, janiya cuaara na jiyarore jiyaniiija César Augustoocuaajaatijia.

<sup>22</sup> Jiyaniiija Agripaari camarnu Festo sequequiaari:

—Janiyari cuno pueyano tojiniu panijajaacuhuj.  
Festoori na riucuaquiaari:

—Quiaacuajaari tariqui na tojiniutianiya.

<sup>23</sup> Tariqui, jiyaniiija Herodes Agripaari niquiaariuhua Bereniceta. Nojoriiri tiuquitiaquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niquishano. Nojori tiuquitiasacari, nojori cojqiquiaariiri soldadohua camarucua, mariyata tama cuno tiacajinijinio camarucuaajaajanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. <sup>24</sup> Pablo tiuquishacari, Festoori sequequiaari:

—Jiyaniiija Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niquiyani, queraatia Judiocuacaari nocuara cua saquiriojotannuquiaa, Jerusalén tiacajinia cua quishacari, niya Cesareya tiacajinijahuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara

mosaaria camarnunaa”. <sup>25</sup> Janiyacuajaari tari niishiyani, nio pueyanoori maja sesa na miiniu quiquianu. Naacua-jitij, janiyari niishiriojiyani, ¿pueyanotucua casaara najuhuana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustocua, pa Jiyaniijajanaa nequesoreenura nojuaja. Janiyari cunora na jiyaronutaniyani. <sup>26</sup> Saniniuujia majaari cua niishiniu taa cua pohuatanutaniya cua jiyaniijia cua naajiojini-ani. Cunora, nio pueyano nitirii niya nia nequesoreeso-coriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustocua casaara nio pueyano cua jiyaroree nocuani. <sup>27</sup> Majaari cua naata naajaa jiyaronu quiasano pueyano, maninia nequesoreyaquishoojua.

## 26

### *Pablo riuhanesacari jiyaniijia Agripa*

<sup>1</sup> Jiyacaritij, Jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiyaquiri quiocuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

<sup>2</sup> —Timiyaniijia jiyaniijia Agripanaa, quia sequesacari cua pocuanura quia niquiara, tama cua tacunura cucuajijiaaja, Judiocuaca saquiriojotasanojiniji cucuara. <sup>3</sup> Quiaari puetunu cuarta Judiocuaca miijosanojuanaa niishijia-juhuaj, puetunu canaa nacojotasanojuanaanio. Janiyari cunora quia sequeyani, nareja cua tojiri cua pohu-atasacari quiajaniya.

### *Pablo pohuatasacari taa na quiquiaari Jesuucua na tiuyaquishacarijiani*

<sup>4</sup> Puetunu Judiocuacajanaari niishiyajuhuaj taa quijia cua quiquiaari cua naatujuajiniji nojoritia cua quishacari

cua jiyajiniani, Jerusalén tiacajiniano. <sup>5</sup> Cuno Judiocuaca quia nequesotasureeraj. Nojori cuara quia pahuataara jaara paniri pahuatanu. Cua mashajinjiji, janiyari seetanujuanaa Fariseo quijiani. Fariseocua-caari puetunu canaa supuetanaa rootasano Pueyasojinijijianaa tojtiaja cutara, socua tamasa cuarta Judiocuacajiniji. <sup>6</sup> Nojorijiaari cucuara saquiriojotacanu cua tiuushacari Pueyasooqua, taa na samiitianijionutaniuhua macunucuanu. Pueyasoori nojori samiitianijionutaniuhua taa na sequequiaari tariucuaaanu canaa supuetanaacujani. <sup>7</sup> Quiarijiani, canaa supuetana Israel doce niqiuohuacujinio caneno pueyari naa seetanujanaa Pueyaso sequesano niqiniuria sashiyajaa. Naaratej, nojoriiri pueyaracaanu Pueyaso secojonuuquiaa, juuca, niucuanu, Pueyaso na tojtiasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuuquiaa. <sup>8</sup> ¿Niaateeri jiyaniya Pueyasoori maja na naata macunucua samiitianijionuhua?

*Taa Pablo miitiaquiaari Jesuucua tiuuniaa tarijiani*

<sup>9</sup> Janiyari tarijia sequequiaari tamajaajani sesa cua niishiriojosacari Jesujiniji: “Nazaret tiacajinijinio pueyanoocua tiuuniaa pueya paracaariirij”. <sup>10</sup> Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacujitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosaquiaarijuhuaj, janiyari jaarajaaja sequequiaarini: “Maniniacuaja, cuara puecoosaaria”. <sup>11</sup> Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

'Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanoehua nojori juaajia quiquiaarini. Majaari quenaaja nojori cua niqiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

*Pablo pohuatasacari taa Jesuucua tiuujia na quiquiaarini*

<sup>12</sup> Naacuajitij, janiyari juucua quiariquiaa Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano. <sup>13</sup> Nucuo cua quiasacari jiyaniijia Agripanaa, janiyari jiyocuacaanuji nunusaaquiaarini, cuata quiojonaa juhuaj. Cuno shacantuucaari socua jiyanoehua shacantuuca quiquiaari pananujiniji. Panacariiri jiyacari quiriqiaa. <sup>14</sup> Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiqiaari rupaani. Hebreo rupaajinia cua sequeriquiaari: “¡Saulo, Saulonaa! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitaaajacujua. Juhua juaajia pueyano, na juaashacari saaja mocoshoco patiyashiyari”. <sup>15</sup> Janiyari na sequereeni: “¿Cantequia Jiyaniijianaa?” Cua riuquareeri: “Janiyacuaari Jesuni, quiaa na miitiaquiaani. <sup>16</sup> Quia sanerohua. Janiyacuajaari quiocua muetareeni puetunu cua panishanojuanaa miijiaa cua jiyatenura quiajaniya, quiarijia janiyajiniji quia niquishano quia pohuatanurajuhuj. Naajuhuj, na nuhuaji janiyari quiocua muetanutaniuhuni janiyajiniji quia niquishanorano pohuatana quia quiniuria. <sup>17</sup> Cua jiyarosacari quiajaniya, janiyari cuarta Judiocuacaacuaji quia cojuanutaniyacujani, tamonu jiyacajinijinio taucuacaacujinio, tiqiyocua quia rucuanesacari janiyajiniji quia poojotasacari. <sup>18</sup> Nojoriicua quia jiyaroyanijia, janiyajiniji nojori quia pohuatanura, maja

juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriojosano puey-atajanaa nojori rupuetootenutaniya, puetunu Pueyaso jiiitiasanojinijijianaa nojori jiiitianurajuhuj”.

*Pablo pohuatasano Jesu tojjiara na jatanujiniji*

<sup>19</sup> Naacuajitij jiyaniijia Agripanaa, janiya jaara naa tojiquiaari sequeshiyano jiyocuacaanujini, majaari cua tarijionu quiquiaarinioj. <sup>20</sup> Janiyari jiyacari juhuacate-cara Damasco tiacajinia Pueyaso rupaa Jesujiniji pohu-atanu coteequiaarini, na nuhuaji Jerusalén tiacajinia, mariyata puetunu cuno Judea jiyajiniajanaanio. Maja saaja cuarta Judiocuaca cua pohuatanu quiquiaari Jesu-jiniji, janiyari taucuaca pohuataquiaarijiuhuj. Nojori nacasuquiaarinijia cuara sesa nojori miishano carteera, Pueyasoo-cua nojori tacatonuhuara nojori jiuujia. Janiyari nojori sequequiaarijiuhuj, cuara saaja maninia miijiaca quiriya, na niishishaanura Pueyasoori seetanujuanaa nojori jataniquianu. <sup>21</sup> Naa cua pohuatanuucuatej jiyaniijianaa, cuarta Judiocuacaari cua quietucanu Pueyaso Secojonuujua tiajinia. Cua motunu paniquianu-  
uri. <sup>22-23</sup> Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohu-atanu Pueyasojiniji; poonijionuutesano pueya, tojishano pueyano. Majaari tama cua niishishanojuaaja cua pohu-atanu quiquiaa. Janiyari pueya niishitiojoquiaani taa tari-ucuaaanu Pueyaso sequesano caminiujunianaa naajionu-utaquiaaricujani, naajuhuj, taa Moisés naajiotasano quiya tariucuaaanu Pueyaso Rupaajiniacujani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaninya. Na casonu nuhuaji, nojuajaari coteenu samiitariquianohua. Jaara samiitiarohua, nojuajiniji pohuatasanoori puetunu pueyapuejanaa cuhuatanutaninya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhajuahuaj; Judiocuaca, taucucanio”.

*Pablo tiuutiniu panishacari jiyaniijia Agripa Jesuucua juucua*

<sup>24</sup> Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablonaa? ¡Quia mueyocuaquiseesere quia niishiniuucua!

<sup>25</sup> Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuaracashiniu. <sup>26</sup> Jiyaniijia Agripaari puetunu cua sequesanojiniji niishiyajuahuaj. Cunora majaari cua puerenu na niquiara pocuanu. Nojuaja naasucuaari tarijia tosaaquiaaricuaaja Jesujiniji, Jesuucua tiuuniaa pueya miishanojinijijiuahuaj. Puetunu canaa miishanojuanaari maja jiyasohuaja na miishaanu quiquiaa. <sup>27</sup> Jiyaniijia Agripanaa, ¿quiaate tariucuacaanu Pueyaso sequesano caminiujiuniaa naajionuutasanoocua tiuyajuahuaj? Quiaacuajaari nocua tiuya. ¿Naatejaaratej?

<sup>28</sup> Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

<sup>29</sup> Pabloori na riucuaquiaari:

—Naajaa, ritia, na nuhuaji soj, taa quia paniyacujani. Pueyaso maara seetanujuanaa naara quia jiyatere taa quia sequeyacuajani; maja saaja quiajaniya, mariyata puetunu

pueyajanaa niya cua tojitiaani, juhua janiya nia quiniuri-  
ajuhuj. Maja naatej, taa cumayocuata moronucua cua  
nujuatashuyanijia.

<sup>30</sup> Jiyacaritij, jiyaniijia Agripaari sanequee, camarnu  
Festojuhuj, Berenicienio, puetunu cuniqui nojoritia ca-  
jitiuniaa pueyano. <sup>31</sup> Nojoriiri cuniquiji tamaqui pacu-  
taquiaari jiyareta nojori pocojonura Pablojiniji. Tama  
nojoriiri seque-tooquiaari:

—Cuno pueyanoqui seetanujuanaa maja sesa na miiniu  
quiquianu na mosaanura, maja quenaaja na nujuatesaa-  
nurajuhuj.

<sup>32</sup> Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia  
sequeyaquiquianu pa jiyaniijiaacua quia jiyaronura no-  
juaja.

## 27

*Roma tiacajiniara Pablo jiyarosaanujiniji pohuatasano. Nio  
naajiona Lucasri nata quiriquiaa na cojiriquiano*

<sup>1</sup> Camarucua jaara sequequiaari canaa buquejinia  
jiyarosaanutaniya Italia jiyajiniani, Pabloori jiyacari  
narta quioosano pueyata cojiritiasaaquiaari niqutionu  
soldadohua capitán. Cuno capitán sesaari quiquiaari  
Julio. Na soldadohua maanuuri sesojosaaquiaari  
“Augusto”. <sup>2</sup> Jiyacaritij, Adramitio tiacajiniji  
buqueeri quera ruparetariquiaa, Asia jiya tiacajinia  
shiiniuquitiariquiano. Canaari cuno buquejinia  
jaaretaquiaarini. Canaata quiriquiaajaariuhua Aristarco.  
Nojuajaari Macedonia jiyajinia Tesalónica tiacajinijinio  
pueyano quijia. <sup>3</sup> Cana quianu nuhuaji Cesareya tiaca  
tacatajajiniji, canaari tariqui tiuquishiiquiaari Sidón tiaca  
tacatajajiniani. Capitán Julioori jiyacari cuniqui maninia  
miiquiaari Pablo. Nojuajaari Pablo tarinitiaquiaari  
cuara tacaara na rupuenaa pueyacua, nojori na



saruhuatanura Sidón tiacajinia, naajuhuj, na rupuenaa niqutionura puetunu Pablo panishanojuanaanio. <sup>4</sup> Canaa jaara jaaretaquiaari Sidón tiacajinijini, canaari canaa muenecara niquimiaa Chipre jiya tucuaatijani. Paratuuri buque nacaacoji piyarojoriquiaa saaja. <sup>5</sup> Canaari Sidón tiacajiniji niuutiaquiaari Cilicia jiyacuani, Panfilia jiyacuanio. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

<sup>6</sup> Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniuujia. <sup>7</sup> Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taqijiriani. Paratuuri saa canaa pätariquiaajaa. Naacujitij, canaari Salmón jiya tucuaatijaniyoyua shuriucuaratamaani. Canaari Creta jiya tucuaatija camarucutamaajaaniuhuj. <sup>8</sup> Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

<sup>9</sup> Canaari puera tarishiquiaari tarini. Judiocuaca miquenyaquiniu juucaari tari shocoquiaari. Jiyacaritij, shoniacu caminijiniaari puereeta quijia tari buqueta jaaretanura. Pabloori juucua sequequiaari:

<sup>10</sup> —Camarucuanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusonuunutanijajuhuj. ¿Casaatejaj pa toyani?

<sup>11</sup> Pablo jaara naa sequequiaaritij, majaari buque jiyatana capitán tojiniu quiquiaarinioj. Saaja buque camarujanaa tojiquiaariiri, buque capitánnio. <sup>12</sup> Cuno tacatajajiniji canaa tii tiuutiariquiaani, majaari maninia

quiquiaari shuniya canaa tajitiniuria tii. Nocuaji, puetunu pueyajanaari sequetuquiaari:

—¡Niiquiji pa quiaarej! Fenice tiacajinia pa quishii shuniyacujaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajaacuaja.

*Shoniniacu caminiajinia paratu piyarojosacari jiyanohua nojori*

<sup>13</sup> Jiyacaritij, paratuuri jacaria piyarojonu coteequiaari pananu shuucujaji, canaa muenecarajiniji. Naaratej, nojoriiri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiaja shuriuquiumia jaaretaareeri. <sup>14</sup> Na jaaretasacari shiitianiyojua, paratuuri canashiyaquiji jiyanohua piyarojoquiaari buque. Cuno paratu sesaari quijia “Noreste”.

<sup>15</sup> Paratuuri buque capotariquiaa na shuucujiria saaja. Naaratej, majaari canaa naata jaaretanu quiriquiaa paratu piyarojosacoji. Paratuuri saa canaa patariquiaajaa. Nocuaji, canaari buque tarinitiaquiaarini paratu cuaara na capotaara tamajaaja. <sup>16</sup> Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanohua poonijioquiaari cuniquini, canaa tacaniniuhuara buque cacojiria cuno boteniyojua. <sup>17</sup> Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucujaji. Pueyari na puerenuta sequetuquiaari:

—¡Paratuuri pa capotanutaniya jaaquiajiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari.

Paratuuri saaja capotaquiaari buque. <sup>18</sup> Jaara juhuaquequiaari, paratuuri saaja jiyanoehua piyarojoriquiaajaa. Naaratej, nojoriiri buque pasano casami quejoonu co-teequiaari moojinia. <sup>19</sup> Canaa camueenujusacari jiuujianaraca juuca naquiya canaa miishacari, canaari buque casamijianaa quejooquiaari socuani, buque namuenura quenaaja. <sup>20</sup> Tari canaa shocojoquiaariiri queraatia juuca. Majaari quenaaja canaa niqiniu quiquiaari pananu, riyanio. Paratu piyarojosacari canaacua, mohuacaari socua jiyanoehua cajiniuucuaquiaari canaacua. Nocuaji, canaari niishiriojoriquiaani canaari quiarijia cusonunutaniani.

<sup>21</sup> Majaari tojetaarucujanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiquianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyani. <sup>22</sup> Naajaa, nioojia nia cumaquiri. Maja quenaaja niquiriyatu pajaniyajinijinio cusonu quiniutianiya. Pa buque cutaraari juhua rapitiasaanutaniya puetunujuanaa. <sup>23</sup> Janiyari quiarijia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojjijiani. Janiyacuajaari na pueyanoni. <sup>24</sup> Pueyaso seruuri cua sequeree: “Majaari puerenu Pablonaa. Quiaacuajaari jiyaniijiajanaa Augustoocua tiuquiniutianiya Roma tia-cajinia. Quiaari na taccoji nujuanutaniya quia pocuanura. Naajuhuaaj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutianiyajuhuaaj”.

<sup>25</sup> Naacuajitij camarucuaanaa, nioojia nia cumaquiri. Janiyacuajaari seetanujuanaa niishiyani, naa quiniutianiyari taa Pueyaso seru sequeree janiyacujani. <sup>26</sup> Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

<sup>27</sup> Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adria-jinia quiri-quiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneeteta-riquiaa jiyareta. Jaara shiyaqueya quiri-quiaa cuno niucua, buque jiniacuma poonijionaari niishiquiaari canaari tari jiyacua catecanoyani. <sup>28</sup> Buque jiniacuma poonijionaari jiya shanacuquiaari, na niishiniuria queroniti quiri-quiaajaa. Na shanacutusacari, saaja treinta y seis metro queroni quiri-quiaari. Jaara socua na tacoji shanacutuquiaariuhua, saaja veintisiete metro queroni quiri-quiaari. <sup>29</sup> Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaji, buque pajamaji sohaneyocuata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuara juhuaqueera. <sup>30</sup> Jiyacaritij, buquejinia poonijionaa pueyari juucua cuno niucujaja jiyasohuaja mashiyocuatunu paniri-quiaa buquejiniji. Naaratej, nojoriiri buque nacaacoji sapojonu tinijiotariquiaa niajaaca casaa moojinia. Jiyasohuaja roshinitiuriquiaa jiyocuacaanu tacanishano boteeri, tii na mashiyocuatunura. <sup>31</sup> Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara niya juhuaqueyaquimia pata, niaari cusonuuriquiano.

<sup>32</sup> Soldadohuari ritia jiyocuacaanu tunusano bote neyocua jiyatajotaquiaari. Moojinia na tinitiuriiri. Paratuuri na piyarojoquiaari tamoco nojorijiniji.

<sup>33</sup> Juhuaquenu panishacari, Pabloori puetunu buquejinia quiniaajanaa sequequiaari cuaara quenaaja miaque-nuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhuaj. <sup>34</sup> Quiarijia nia miaguerecuara, nia cuaqueya nia cumaquitajara quenaaja. Majaari quenaaja niquiriyatu nijaniyajinijinio cusonu quiniutianiya quiarijia.

<sup>35</sup> Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niqiarajanaari. Na nuhuaji miaguerohuari. <sup>36</sup> Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhuaj. <sup>37</sup> Cuno buquejinia, puetunu canaajanaari quiquiaarini dosciento setenta y seis pueya. <sup>38</sup> Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

*Buque coquesacari caminiajinia*

<sup>39</sup> Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatijatejaara cunoni, nojori na niquiriquiaani. Nojoriiri cuno jiya tucuaatijaacua niquiquiaari puereetuuca surocohua. Jaaquiaari puetunu na shocujanaa quiriqiaa. Naacuajitij, nojoriiri sequetuquiaari:

—Buque pa saniri shiitianiniu cuno surocohuama.

<sup>40</sup> Buquejinia poonijionaa pueyari nijaaca sohaneyocua jiyatajotaquiaari. Cuno nijaacaari caminia jiuujiajinia jateequiaari cuniquijia. Nojoriiri buque niqinijietetajaa roshinitiaquiaarijiuhuaj, buque tacutajara. Buque nacaacuaji teeja toque tacanitiatureejaariuhuaj. Buqueeri canujutaaree jaaquajiniara, paratu piyarojosano. <sup>41</sup> Buqueeri saacariji jaaquajinia riitaseequiaari, caminia cajiniuucasacari

mohuaca paatishano jaaquiajinia. Buque nacaari jiyanohua tiuquishii cumaatia jaaquiajinia. Majaari quenaaja na naata pooniu quiriquiaa na matasaquiji. Na pajaari maa rapuequiaarijia moo cajiniuucuasacari jiyanohua nocua. <sup>42</sup> Soldadohuari nojori jiyatasano quioosano pueya puecoonu paniquiaari cuniquijia, nojori jiyanishacari cuaconutaniya naasucua, mashiyocuatumaari. <sup>43</sup> Capitán cutaraari Pablo tiuquitiniu paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya puecotunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuara cuacoora coteenu, jaaquiajinia rupaatiushiicuaari. <sup>44</sup> Cuaashijianucua saniniuuja cuara buque jiniacumaji suruhuatuneeaca cuacamatuura na cuatajara. Tamasaca cuara buque neecaacua jacamatuurajuhuj.

Naa miitiuquiaariiri. Puetunu pueyajanaari jaaquiajinia rupaatiushiicuaari.

## 28

### *Pablo quishacari Malta jiya tucuaatiajajinia*

<sup>1</sup> Puereeta canaa cuaconu nuhuaji shoniniacu caminiajinia, canaari namitia puetunujuanaa maninia tacataseequiaari cuno jiya tucuaatiajaacuan. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. <sup>2</sup> Cuno jiya tucuaatiajaacua quijia taucuacaari maninia canaacua jiyanooquiaari. Shiniquiaari quiriquiaa. Maruuri niriquiaajuhuj. Naa canaa shiniquiosacaritij, taucuacaari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushii.

<sup>3</sup> Pabloori naanacucua reratejoriquiaajuhuj. Manijinia na quejooriquiaari. Jiyacaritij, soconuquiiri maniicuaaji

mashiriquiaa juucua. Pablo juaashiquia saariiri. <sup>4</sup> Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niquitiquiaaritij, tama nojorijaarijia sequetooquiaari:

—¡Nio pueyano naasucuaari pueyano moju! Cocuaatia miirii juucua shoniniacu caminiajinia na cuasacari buquejinijiiri. Pueyasoori quarijia saniniuujia cunora soconu na sajitirii na cusonura.

<sup>5</sup> Pabloori saaja manijinia majiriatatee soconu. Majaari quenaaja na sajiyashi noonu quirii. <sup>6</sup> Puetunu pueyajanaari na sashiriquiaa, taacari na poreenutaniyani. Na sashituriquiaajaariuhuj na jiyaniushacari canashiyaquiji cusonutaniya naasucua. Naa pueyaracaanu na sashitiusacari juucuatej, nojoriiri socua tamaatia niishiriojonuuquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanajaj!

<sup>7</sup> Cuniqui canaa quishaquini, canaari tamonu pueyano cuhuariquia shuriucua quiriquiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojujaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajinia camueequiaarini. <sup>8</sup> Cuno camarnu queeri jiyacari cusosu matariquiaa. Jiyanohua nasecaari quiriquiaa. Coriyacau rurequeriquiaajaariuhuj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secojosacari, nocua niaquiaari na juaashiquiaari. Pueyanoori naatarohua. <sup>9</sup> Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarjiuhuj. Pabloori puetunujuanaa na naatanijioquiaari. <sup>10</sup> Naa Pablo miiniuucuatej, cuno pueyari na jittiasano casamijiniji canaa niquitiojoquiaari nareja. Na nuhuaji,

canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niqutiojotuaaari narejajuhuj.

*Pablo tiuquishacari Roma tiacajinia*

<sup>11</sup> Canaa sashishacari shuniya cuara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandría tiacajinijinio buqueeri tii nujuatariquiaajuhuj. Shuniyacuaaji tiuuti-aquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. <sup>12</sup> Canaari Siracusa tiaca tacatajajiniji tiuutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. <sup>13</sup> Cuniquiji canaa quiasacari, canaari cuno jiya tucuaatiaja shuriucuataareeni. Canaari Regio tiacajinia tiuquishini. Tariqui, paratuuri maninia piyarojoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. <sup>14</sup> Puteoli tiacajinia Jesuucua tiuuniaa pueyari canaa masuuquiaari na tiajinia. Canaa sequetuquiaariiri:

—¡Maja canaa shoconu pueyanaa! Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. <sup>15</sup> Roma tiacajinijinio Jesuucua tiuuniaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jyanishano tiacajinia. Pablo jaara narta Jesuucua tiuuniaa niqiquiaari, noojia cumaquiquiaariiri. Naaratej, Pueyaso sequetuquiaariiri:



—¡Paacarasho cua Pueyasonaa!

<sup>16</sup> Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niq-uitioquiaari Roma tiacajinia quioosano cojuanaa camarnu. Pabloori saniniuujia tarinitiasaaquiaari tamonu tiajinia na quiniuria tamajaaja, tamonu soldadota na cojuariquiano.

*Pablo pohuatasacari Jesujiniji Roma tiacajinia*

<sup>17</sup> Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuacanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niquitiotucanu Romano pueyari, cua morosaanura. <sup>18</sup> Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. <sup>19</sup> Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuara cua jiyarotuura jiyaniijajanaacua niya Roma tiacajiniani, Césarjanaa nequesoreenura janiya. Naajaa, majaari cua saquirojotanu quiniutianiya saniniuujia nojoricuara, cuarta Judiocuaca nojori quiniucua. <sup>20</sup> Janiyari cunora nia niquiniu paniriquiaani, cua pohuatanura niajaniya taa puetunujuanaa parta Israel pueya niishiyacujani, niajanijajuhuj; macunucuaari samiitianijiosaanutaniuhua. Janiyari cunora cumayocuata moronucua niya quiyani.

<sup>21</sup> Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionee, canaa pohuatasaanura quiajanijajiniji. Cuniqijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pohuatanuunu quiquianu canaa quiajanijajiniji. <sup>22</sup> Canaari saaja niishiyani, puetunu tiqiyocujanaa sesacasaquiaaquiniaari Jesujiniji pohuatasano. Quiaa mariqui cunojiniji canaa pohuatate, canaa niishiniuria socua.

<sup>23</sup> Jiyacaritij, Judiocuacaari Pablo sequetuquiaari:

—Canaacua tamonu juuca quia tojiquiiani.

Na nuhuaji, nojoriiri na sequetusano juuca nijioquiaari. Pablo quijia tiajina mishitiquiaariiri. Pabloori nojori niqiuara pohuatanu coteequiaari tariquicuaji. Naa niniyareejaari. Juucua nojori niishitiojoquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaariijaariuhuj taa Pueyaso jiitiaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujiuniaa naajionuutasanonio. <sup>24</sup> Noojiaqueya nojorijinijiniori Pablo sequesano tojiquiaari cutara. Tamasacaari saaja na cuaracashitiquiaari saniniuujia. <sup>25</sup> Nojorijinijinio jaara Pablo niishitijosano tojiquiaari cutara, tamasaari nojoritia juayonuutatanu coteequiaari. Naa na juayonuutasacaritij, toharetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiiri seetanujuanaa tariucuacaanu Pueyaso sequenu panishano caminiujiunia Isaías pohuataniquiaari parta Israel pueya niqiuara, jaara na sequesquiaari:

<sup>26</sup> “Quia quiaare cuno pueyacua. Quiocua nojori sequessee: ‘Niaari cua rupaa tojiniutianiya. Majaari

nia niishiniu quiniutianiya casaa nia tojiyani. Ni-aari cua cumaacata cua miishano niquiniutianiya-juhuaj. Majaari quenaaja nia niishiniu quiniutianiya'. <sup>27</sup> Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosano-juhuaj, na niquitiaaquiniuucujaji, maja na numaata na tojitianura, noojiata na niishitiuyaquiniuriano. Naa jiyatecanu nojorinjia, maja na niishitiuniuria janiya, mariqui cucua tacateturohuari, nojori cua naarajonura".

<sup>28</sup> Pueyanaa, nia niishiri. Niaa jaara ruuretare cua pohu-atasano Jesujiniji, taucuacaari saniniuujia pohuatasaanu-taniyacujua, taa Pueyaso jiyanooniua paniya pueyani, maninia na jitianura nojori. Taucuacaari na tojitianu-taniya cutara.

<sup>29</sup> Pablo jaara naa sequequiaari nojoritij, Judiocuacaari quiojiyarohua. Tama nojorijaaritia juayonuutaarohua na quiojosacariuhua.

<sup>30</sup> Caapiqui marijiaari Pablo shocojoquiaari rupaquijia na masenano tiajinia moronucua na quishacari Roma tiacajinia. Puetunu pueyajanaa jaara nocua niquiaari na niquiniuria, nojuajaari maninia na masequiaari na quijia tiajinia. <sup>31</sup> Majaari jiyasohuaja na pohuatanu quijia taa Pueyaso jiiitiaa na jiyanooshano pueyani. Jiyaniijia Jesujiniji niishitiojuajaariuhuj. Majaari na sanaajasaanu quijia.

Quiarinio pueyaso rupaa pa jiyaniijia Jesucristojiniji  
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

